

元艾性夫剝語

元王奕玉斗山人集

元張觀光屏巖小稿

元楊宏道小亭集





刺語卷上



元

艾性夫

古體詩

感物

中園植佳橘插棘為儲胥橘根陽未萌棘枝已扶踈終年  
高且深勢盛凌橘孤豈以雨露偏良由習性殊非類不可  
依橘其防厥初

老奴鞭群羝長鳴度荒圃眈眈黃於菟怒攫連四五弱肉  
強之食茲事由來古天地果好生生羊勿生虎  
溪翁擷佳草日恐飢其魚霜枯野水落獼獼搜無餘翁歸  
束藁人寘彼溪之隅責以警長夜翁計何其愚  
有山莫栽桃有地宜種竹此竹豈不佳清陰蔽茆屋朝有





有孤鳳翔暮有白鷺宿桃花艷春風蜂蝶起麝俗花謝不  
復來相媚一餉足

古意六首

折柳繫離船船行柳條短賴有枝上花飄泊隨君遠  
采蓮莫采花采花損空房留房結青子種作明年香  
匆匆采桑女花雨濕襜袖春風十二絃生世未觸手  
浣衣輕浣布布縷不如絲絲堅猶易穿布弱從可知  
佳人買明鏡意重輕千金結以雙羅帶欲照蕩子心蕩子  
渺不歸鏡影春雲深  
賤妾燕子身銜泥巢君堂遊子黃鵠志辭家猶南翔采花  
為誰容襲蘭為誰香安得小心風寄子雙明璫

雜言

蒼梧閔弓劍阿閔無祥禽魯叟已長喟矧敢求之今區區  
蓮勺人伯氣方浸淫紀年後嘉瑞作物誠何心隱顯殆偶  
然豈元聞韶音黃河千丈渾歲月亦已深矯首不可俟

里芝山陰

勛華不並世揖遜無餘傳緬彼巢與津佳兵豈其天履霜  
一何微坤冰一何堅誰謂知幾人尚俟觀伊川谷衮了不  
公正閏雜紀年豈擬王仲淹而愧魯仲連

燕趙多佳人珠華銜天街鄭魯有游女折柳弄青梅春風  
趨姿媚諧笑爭徘徊幽閨有貧醜修潔不自媒縫布以為  
裙斷荆以為釵簪沙事機杼蓬沓蒙烟埃誰將好德心為  
爾停漸臺

枯桐斲山骨絃以冰蠶絲信指發孤調悠然造希夷揚以



寄吾歡抑以寫吾悲悲歡生我心無庸他人知我若有黃金不鑄鍾子期寄語伯牙翁絕絃良可嗤

牧童

柳髮吹松陰坦腹睨岩石細雨整短蓑斜陽擷長笛採花艷兩髻挾草暖雙腋欸欸跨牛歸蒼山暮烟碧

題東坡蔗滓窠石

空洞如虛拳擁腫類竒癭槎牙老樹身相依以為命智士能用屈榴皮勝毛穎先生倒啣餘此正入佳境

憫盆松

物生天地間細大各有容偉哉霄漢姿厄此盆盎中嗟吁爾索駝局促吾蒼龍駝兮顧我笑可憫豈獨松

猫犬歎

飯猫奉魚肉憐惜同寢處飼犬雜糠粃呵斥出庭戶犬行常低循猫坐輒箕踞愛憎了不同拘肆固其所虛堂夜搜攬忽報犬得鼠問猫爾何之翻甕竊醢脯犬雖出位終愛主猫兮素餐烏用汝

答釋子問詩法

汝家有子蘭詩體能入選爾後島可輩往往以肆變選律固無擇語意思庸淺大音尚和平至味貴悠遠歸歟事斯語妙理千萬變歐稱九僧今不見退之擬過紅樓院

諸公賦東園兄銅雀硯甚夸余獨不然然蘇長公

詩名梅都官長句皆爾如謂舉世爭稱鄴瓦堅一枚不換百金頌不作鴛鴦飛乃有科斗情入用固為貴論古難與并之類是已敢併為之反騷



臨兆健兒衷甲衣曹家養兒乘禍機匹夫妄作九錫夢鬼  
蜮敢學神龍飛負鼎而趨不遑死築臺尚欲儲歌舞但知  
銅雀望西陵不覺妖狐叫墟墓分香賣履吁可憐所志止  
在兒女前竟令山陽奉稚子出爾反爾寧無天陳留作賓  
向司馬包羞更出山陽下國亡臺廢天厭之何事人猶拾  
殘瓦古來觀物當觀人虞琴周鼎絕世珍區區陶甃出漢  
賊矧可使與斯文親歛溪龍尾誇子石端州鵠眼真蒼璧  
好奇不惜買千金首惡寧容汙寸墨書生落筆驅風雷要  
學魯史誅奸回請君唾去勿復用銅雀猶在吾當推

天下第二鐘歌鐘在弋陽真如寺破廡下其誌天聖  
二年也劉石扁曰天下第二鐘旁書江南徐鉉書  
筆力皆道勁可愛不知第一竟在何許如此又濱

於埋沒可慨已因歌以遺寺僧使屋庇之

瀕江破寺如膠舟大鏞露立寒颼颼金繩鐵紐作斷綆土  
花苔碧生樂頭我來摩挲攷歲月俚指落落三百秋想當  
營度欲鼓火野鬼夜哭山精愁鑄之紹威六州之鐵釁之  
以景升千斤之牛載之以長河萬斛之艦貯之以齊雲百  
尺之樓風高一撞撼天地世更幾變宜追蠡眼中驚見已  
無雙天下才稱為第二庚庚古扁磨蒼珉徐郎妙墨吹元  
雲聲光啞啞盡埋沒宇宙顛倒方紛紜昭陵石馬化為土  
于上蒲牢幸存古山僧作屋穩蓋歲他日岐陽求石鼓  
題危見心所藏陳常菴水月障及松鶴蘆雁各一

首

陳郎筆勢并州剪十幅生綃秋綠遠老蟾欲作騎鯨遊推



墮玉盤波底轉謫仙濡袍窺采石東坡醉客歌赤壁兩翁  
已矣愛者誰我欲扁舟擲長笛

墨池幻出虬龍蟠徂徠山頭烟雨寒胎禽獨立衣縞縞骨  
瘦西風拾瑤草靈根琥珀三千年紫皇勅賜青城仙乘軒  
竊祿正自惡何似歸來一邱壑

風吹黃沙石磧冷霜葦無聲弄寒影兵塵隔斷衡陽雲溪  
藤捲送瀟湘景蘆花雪老菰米秋芙蓉露下天悠悠阿奴  
呼起字不斷寫出萬斛江南愁

贈福希範遊

伽梨點破長羅綠瓣香問信黃梅契筇雲笠雪霜色寒法  
宇歸來詩滿腹春風破曉來打門行矣廬山與天竺天空  
雲遠意未盡却上天台恣遊目吾聞天台石橋滑如竹千

僧萬僧畏沙足請師了此一大事一洗世間凡眼肉浮杯  
試罷海風高歸就梅花結吟屋

贈后山僧謙自牧遊

為僧不遊醯甕鷄遊不名山沮澤龜見山無詩僧亦俗詩  
不高古猶無詩吾謙年少鐘老氣髮根甫斷撥雲去歸來  
笠雪兩肩寒已覺囊中有佳句一枝瘦杖萬里心策策尚  
欲窮幽尋湖光山綠上下竺谷花溪月東西林我亦愛山  
行不得把酒高歌壯行色為語春風九里松題詩野客今  
頭白

歎屨詞

履穿無下歎東郭靴椎尚欠居士屨是誰業屨捆秋芒絕  
勝編襪便行腳花泥溶溶草露滴山石齒齒苔烟碧江南林



整天下奇不識春申珠履客

臨邛道士招魂歌

錦襪生塵脫紅玉瓊蟾夜抱金蛾哭芙蓉露瘦寒花鈿鵲  
鵲樓空冷銀燭輕鸞小鳳橫紫簫彩雲密漾青霞綃桂心  
沁入瑣子骨蕊宮貝闕天都遙玉床夢斷心欲死獨抱秋  
衾燕香髓方瞳白羽青簡書駕月騎風渡瑤水瓊樓碧戶  
翠霧香紫蘭結佩紅薇囊雲車仙子不可識芳卿寄謝真  
荒唐蔗漿不飲啼寒淚不悟齊人少翁詭安得天上蓬萊  
宮却着人間馬嵬鬼

別離詞

郎從江上買行舟妾對江楓生晚愁雁雲不斷楚天碧望  
郎怕江水邊樓

渡江桃葉郎莫歌巴西竹枝愁更多黃塵百丈水花黑把  
酒勸郎無渡河

了頭巖詩載墻壁間無慮數十百首形容蓋有盡  
之者矣輒復寄興以俟採詩者擇焉

色盛人自憐色衰人見棄人心不可憑女色焉足恃未笄  
化為石不願從夫壻厭華喜質如梁鴻布衣操臼當相從  
君不見漢家天子劉文叔郭后容衰亦遭逐何如山頭化  
石不嫁老亦足  
女色無醜妍入宮皆見妬蛾眉等烏蛹嬉笑藏刀鋸未笄  
化為石不願長門去國風直待歌螽斯委身事主妾不辭  
君不見趙王如意今日死明日佳人亦投廁何如山頭化  
石千歲老無子



題曾達臣草蟲

蝮蜓走昂頭螳螂怒張臂走欲捕生怒欲制華活能融兩  
 虫意無人飯汝金沙紅糜肌粉肉牢守宮草間敢爾誇豪  
 雄捕蟬幸脫黃雀舌輕鬪懸知腰股折力微謹勿當車轍  
 書馬使君所藏草虫  
 晉陵草虫妙天下一幅千金不當價誰將此本送使君蜂  
 蝶數輩蔬一根比蔬雅淡無色香嗟汝蜂蝶空踈狂人間  
 桃李千萬樹有翅奈何不飛去

山谷跋楊妃齒痛圖謂多食側生致動搖其左車  
 是殆不然因為翻案天寶遺事云時羅公遠進藥  
 明皇自和飲妃故併及之

蜀帝化子規啼血思還家玉環苦微疾寄汝呼痛牙物類

相殊或相托悲鳴一夜梨花落三郎玉柙已成塵半七金  
 罌誰和藥紫駝翠釜不生兵向與涪南新側生人間極寵  
 皆禍兆莫把妖魂幻飛鳥平生誤識安祿山馬嵬欲死先  
 齒寒

雁塔

君不見春初淮白魚秋深黃雀兒川潛山洎誰得知災身  
 不幸甘且肥官饗弗渠赦竟作一網打頭顱千百奉苞苴  
 猩紅熊白風斯下吾生亦何好獨坐味頗厚急符星火督  
 虞人覆巢空類無遺噍寧逢江南射生手莫遇雁門餽太  
 守

荷葉

愛蓮盡愛花而我獨愛葉水仙剪圓碧萬柄相倚疊風掀



翠釜舉露浥鮫珠  
 暄不必滿川紅  
 香氣自薰泱  
 魚鱗涼影鷺鷥  
 憩別業潔可包  
 龍城賈客之飯  
 清可製三閭修  
 士之衣大可載  
 太乙真人之卧  
 高可蓋桐江神  
 女之歸醉仙  
 捲作碧玉盞歌  
 姬携來綠雲扇  
 有時聽雨隔窻  
 眼湖聲十里錢  
 塘晚

題葉氏分綠亭

山亭種花厭脂粉  
 純種芭蕉三百  
 本一心生意展  
 不盡四面蟠根  
 培自穩捲舒風  
 月閃流翠泚泚  
 清陰浸窻戶煩  
 君淨拭湘竹床  
 著我橫眠聽秋  
 雨

崇渡初雪

雪風吹凍冰人鬚  
 老梅著花明矮  
 籬黃蘆蕭蕭白  
 雁落野樹歷歷  
 青猿啼旗亭有  
 酒味苦短地壚  
 濕薪烟粗煖五  
 陵狎客不下樓  
 紅金火閣玻璃  
 盃

古鏡詞

人生兩瞳子爛爛  
 巖下電見盡天  
 下人不見自己  
 面古哉容成侯  
 作我眼外眼我  
 老得君照君老  
 還我見鮮花繞  
 背字痕青彷彿  
 陽水八分篆神  
 光一點未埋沒  
 尤物千年幾流  
 轉君不見揚子  
 江心水如練年  
 年鑄入凝陰殿  
 後來血染江水  
 渾至今端午人  
 閉門

次韻曠翁四時村居樂

欲晴欲雨天溟濛  
 林塘淡蕩搖春  
 風遊絲落絮闌  
 飛舞野花芳草  
 爭青紅南園北  
 園桑柘綠村前  
 村後啼布穀蚕  
 姑把葉祝絲多  
 田翁拜社祈年  
 熟藕花分房菱  
 出角瓜實累累  
 蔓籬落稻田水  
 多翁不愁日



抱筠筐晒山藥清溪濯暑生衣裳石甞煮透山泉香涯南  
 老屋頗宜夏草窻瓦枕松風涼  
 雁雲漠漠梧桐秋風露颯颯生平疇芭蕉葉黃夜氣濕老  
 壁屈曲行蝸牛林外炊烟暗青樹墻頭涼月驚鳴杵柴門  
 犬吠人語多刈熟歸來碧天暮  
 黃雞懶啼霜月低青羽亂咏梅花飛鳥捷怯寒不出圈白  
 犬耐凍時穿籬老松墮枝供武火枯蒲織席遮窻破一窩  
 容膝暖即休不問甕中天機大

木綿布歌

吳姬織綾雙鳳花越女製綺五色霞犀薰麝染脂粉氣落  
 落不到山人家蜀山樞老鵠銜子種我南園趁春雨淺金  
 花細亞黃葵綠玉苞肥壓青李吐成秋蠶不用繰回看春  
 箔真徒勞烏鏐筇滑脫茸核竹弓絃緊彈雲濤按芋玉筋  
 光奪雪紡絡冰絲細如髮津津貧女得野蚕軋軋寒機緯  
 霜月布成奴視白氎氈價重唾取青銅錢何須致我爐火  
 上便覺挾纊春風前衣無美惡暖則一木綿裘敵天孫織  
 飲散金山弄玉簫風流未遜揚州客

題雲錦劉從甫水竹雲山亭

玻璃冷浸清湘玉白衣暖護秋屏綠淮南公子有勝情况  
 拾四美歸吾亭問君亭中更何有解事家人頻送酒客來  
 醉賞不得歸拍闌朗誦亭中詩

解棊

兩雄相持機不發一着輸先知相軋退守皆虞虎穴空通  
 和不肯鴻溝割危枰已屬墮甌裏巧勢爭看強弩未疲思



嘿嘿鬼神寂寞運茫茫天地濶悍鷄趁鬪不暇味駁馬爭  
馳各忘秣矰禽睥睨欲高舉且免迷離思遠脫死中求生  
背水陣灰冷復焚餘燭跋白登條報沛公走閑與俄聞趙  
師活傍觀駭服算入妙對局虛驕氣方奪人生勝負何可  
期生達難欺死諸葛推枰一咲拍闌干滿袖松風涼潑潑

題陳搏題壁圖

長松梢梢老烟霧瀑泉飛落千丈布樹精搖手不敢呵雅  
是仙人熟眠霧睡蛇未死驚起來風吹野服冠崔嵬雙壘  
窸窸磨老瓦墨汁涓涓翻葦苔一翁擁篲供掃壁一翁聳  
膊觀落筆欲寫未寫方昂頭野趣含秋正蕭瑟先生壯志  
神龍驟欲跨八表提天網市衢呼酒沃俠客豈肯老死蒼  
山傍忽來驢上聽鳴鑄中原王氣開皇極心事西峯一首

詩真人自在陳橋驛

酬春湖史履庸惠四皓圖

有客有客吾春湖踏霜打門呼老夫寒溫粗了不暇坐兩  
手奉我商山圖皓首龐眉目如漆千古高人誰畫出疎行  
大字各題詩頗類涪翁老年筆綺里季夏黃公春風拍浮  
酒兩鐘仰天但覺宇宙窄麾塵一掃塵凡空東園角里更  
蕭散石鼎茶瓢風日晚琵琶不作兒女悲橫琴靜送飛鴻  
遠周家遺民方避秦留侯眼高識天人翩翩小出莫危社  
落落高舉連青雲感君持贈慰枯槁玉雪輝輝見諸老何  
當乘鶴參翱翔風露清涼咽瑤草

浣紗曲

浣紗如妾心皎然照冰雪秋聲入絡緯炯炯織霜月裁衣



嫁作梁鴻婦白髮相看如此布不學西施矜媚嫵粧成欲  
 覓君王顧忘却土城山下路貪向銅龍溪邊住明朝吳騎  
 猛如虎獻入娃宮作俘虜含羞短製衣楚楚忍學翩翩寫  
 翎舞土城山西施浣紗處

田家詞

大兒荷鋤去疏麻小兒提筐采茶翁自決水灌秧芽今  
 年續食不可望一夜老風搖麥花

昭君出塞圖

長門寫遍泥金帖春風暗老如花靨臂紗尚護紅守宮妾  
 命君恩盡如葉一朝結束嫁荒陲一馬前導五馬隨老奚  
 並轡相笑語雙袖自抱琵琶啼邊風吹碎心如夢雲長只  
 有孤鴻送早知羶帳是羊車却把黃金博青塚向來玉鎖

搖銅環咫尺不得窺天顏祇今墮在萬里外日光那到祁  
 連山女色自矜還自悞畫史欺君君莫怒甘向匈奴作婦  
 翁而翁首禍羞千古

與標軸工鄭老

君不見世南人間行秘書撐腸拄腹搜不枯眼空千古不  
 留物更用芸香祛蠹魚又不見王家樓上五百車錦奩玉  
 軸籤紅牙夜生光怪射東壁神鬼錯愕相驚嗟無形之書  
 不復見有形之書今亦鮮吳儂鞭馬馳京塵何曾著眼雞  
 林人弓刀自帶封侯相黃金不博青藜杖請翁少待三十  
 年怕有米家書畫船

舊有歛硯雅宜墨鏡賤號于陰以亂亡去十餘年  
 矣忽見之村學堂中睨視間有艷然持之却走者



如恐予之取也因作此以遺硯

冰蚕吐絲寒玉蒼老龍磨角元雲香半生食汝充飢腸正  
爾悒悒傷弓亡一日到眼驚餘皇欲呼未見誰鬣長庸奴  
自愧取不減艱然持之走蓋截嗚呼得失安可常我不善  
保遺渠殃苟能截之殃而祥但隨牛後失所當枯竹尚作  
神龍驥安得石精变化飛墮桑君傍塞翁失馬心清涼  
雪吟效禁體并去一切熟事

羣仙碎剪明河水須臾变换人間世重陰漠漠不分天萬  
里茫茫更無地回飛慢舞忽交急清磬汗溼受平施虛光  
眩轉混晝夜終日縱橫絕散氣埋深矮屋火無功捲入空  
蒼風挾勢無同那得羽相似怪見惟驚犬群吠調和稚子  
割蜜脾澁縮山翁鳥屐齒秃蒼捕雀花兩眼戲客控獅紅

十拍徑須醉賞臘前三紛紛盡是明年米

題陳所翁為葉半隱作全龍邀同賦

鳴夷飲江供曉汲塵尾拂屏翻墨汁密雲黯黯扶天來黑  
風冥冥吹海立濤奔浪駭恣神怪驚起蒼龍九淵蟄鬚鬚  
怒插霜戟寒鱗甲光搖春雨濕身蟠遠勢欲萬里吻渴滄  
溟歸一吸僧繇汗背葉公走祇合庸奴事供給所翁湖海  
陳元龍小傍皇華在原隰酒酣作畫特餘事大手能旋倚  
天笠只恐通神風雨急抉破天門夜飛入明日山翁倚屏  
泣

題趙大年奉議小景

江頭古樹片葉無槎牙老龍爪角枯風含雪意天欲晚凍  
棲不動鴝鵒滿翩翩四翼來何遲睥睨欲泊無空枝寫生



貴活意獨到明朝嘈雜聽渠噪

剪后山峰上人新茶

揀芽穰穰鷹爪黃活火熾熾魚眼湯掃花席地白日靜穿  
簾透戶春風香喚醒松根渴睡漢五更清夢從渠短泠泠  
灌頂欲通仙稽首法雲甘露椀

蒲席歌

君不見象床金縷黃龍鬚翠幃茸毯紅氍毹凝香燕寢環  
瓊姝美物作惡常須臾能令王孫泣路隅富貴不到山中臞  
霜空雁落寒陵膚西溪女郎織春蒲作席眼眼涵清腴  
髮僧方丈供橫鋪蒼烟翠霧不可摹摩洋温厚便鶴軀高  
眠齁齁忘朝晡遠夢颯颯生江湖楮衾竹榻蒲為徒觀美  
不足安有餘更生九節壽老夫百年與爾同卷舒清風傲

兀起几蘧

嚴氏古琴

蒼梧弓劍俱塵土一片枯桐尚傳古有絃彈入碧虛寒彩  
鳳應來獸應舞物真物賈不必論立名幸有古意存南風  
不作民正愠我欲抱渠招帝魂

禱雨積烟山之龍潭有應

神鏡鬼鑿深無底誰敢燃犀照秋水蒼生望霖龍不起蠟  
丸箋心貽龍耳鬚張尾戰珠脫腹仰天噓氣陽侯哭銅瓶  
偷湫未及屋黑雲崩山雨如竹

射虎行贈張生

深村落日啼寒鳥中有十數黃於菟飽吞獐狗未足醉時  
失行客驚相呼蒼鬚老翁百夫勇蹶張強弩金僕姑潛機



夜半發乘矢黃鬚白額殲其渠寢皮食肉爭賞快入穴取  
子無留餘嗚呼山中猛虎今已無人間苛虐誰驅除老翁  
負弩先辟易此席咆哮角而翼

題明皇醉歸圖

金車山重牛難挽五花嘶出長春苑大官供頓宴驪山三  
郎沈醉歸來晚酩酊馬上扶者誰秀眉照眼兩國姨紅香  
托臂手亦軟三馬相倚不敢馳黃門擁導盡端美錦衫繡  
帽春風起解醒尚恐需餘尊捧把玉卮行復止最後一馬  
壽王妃鵝扇夾侍雙瓊姬酣酣嘿嘿意自遠恨不醕我漁  
陽兒圖陳無逸今安有却作醉徒供畫手昭陵百戰大山  
河涼州幾甕葡萄酒

兒餒真郎罷妻寒怨豪砧唐眉山詩也戲為箋之

父天不可嗔夫君不宜怨要知古聖賢貴在素貧賤父常  
煮字不成飯夫常織文不成絹衣麗布衣斲菘莧去耕原  
上田往種陌上桑獲雲秋穗重綠雪春絲長汝溫汝飽官  
征忙翁出校書為汝償

賦壬一姪孫破硯

山翁手持青石骨疑是元賓瘞中物支淋搗練應不然中  
裂何由半存沒冰池既決不可堤鏡面已破那能規達人  
不必顧墮甌好事大率逢轟碑寒蟬飽飲供曉滴盡了山  
中病磨墨大和磔裂三千年何處人間有完璧

與圖書工羅翁

木天荒寒風雨黑夜氣無人聽東壁天球大玉生土花虞  
歌魯頌誰刻能翁持鐵筆不得用小試印材蒸栗色我今



白首正逃名運與黃楊俱受厄藏蜂少咲時或至精藝終  
為人愛惜固不必附名黨銅碑亦不必寄姓麻姑石江湖  
詩版待翁來傳與雞林讀書客

剩語卷上

剩語卷下

今體詩

杉樹牌晚憇

倦童呼不諾久客坐長嘆野色歸烟暝秋聲入雨寒閱人  
江樹老經火路牌殘近郭魚羹飯招呼作晚餐

客歸

髮僧行脚倦歸計上心忙秋老蟬聲短江空雁影長乾坤  
無了日霜露感殊鄉遙想梅花未還家定雪香

過石泉寺

蘚壁作怪畫石泉操古琴藤多山木老僧瘦道根深白鷁  
隨人飯青猿抱佛吟經過恨不數帶兩度遙岑

元 艾性夫 撰



雪盡

雪盡孤峰瘦家貧老夢寒春鞭雙影動歲節五更殘努力  
三餐飯滋身九轉丹時危從道喪不敢棄儒冠

吳種柳枉教輒復奉答

天地窮東野江湖困子長逢人雙白眼銜俗小紅裳舊句  
傳楓冷新吟帶柳香還能相料理亦足慰淒涼

平塘陶使君挽歌

今代平塘老前身靖節翁死知隨物化貧與不官同仕國  
棠陰在休亭蕙帳空容人方竹馬楚些已西風

飯客

菜剪堯時韭羹羞晉代尊家寒多食淡客好不嫌貧一夜  
小窻兩百年華髮人明朝未須去老別最傷神

謝呂雲叔餉墨

蒼蒼烏玉笏歲歲到山翁君眼何曾白吾顏自覺紅一生  
磨不死萬事寫成空回首柯山路淒涼不復東

丁亥冬大雪十數作鄧清曠以苦寒吟見寄

十雪勢未已一冬天積陰背風留更久入夜落偏深木稼  
連冰柱天花幻玉林遙憐五峯老尚寄苦寒吟

病中即事

支身惟首健隨事與心違病久藥為飯寒深火是衣矮窻  
看日度遠夢傍雲飛可比梅花瘦呼童試折歸

正覺僧榻

贊公分半榻卧近竹西樓四壁寒蛩夜一山黃葉秋夢隨  
三鼓動月尚半窻留零亂芭蕉影禪衣爛不收



哭林止菴

止菴諸老行今日九原人頭為談經白家因好客貧欲銘貞  
曜墓未哭廣成真俯仰南湖月瑤琴鎖碧塵

日永

日永駒難過庭空雀亦無花招蜂出早草礙蟻行迂蕉葉  
露臺掌水光天影圖下簾便道靜烟篆起茶爐

癸巳小至

舌在貧何害脾清瘦不妨天心半夜子道脈一分陽山色  
春秋老梅花天地香半鑪煨芋火意味頗悠長

盡日

盡日坐谷口看雲生嶺頭蟬聲偏占晚菊色欲專秋江碧  
水心淡葉紅溪樹愁乾坤萬萬古流轉一虛舟

次韻秋心

短髮白已盡寒花黃到今秋清山見骨年老樹留心獨鶴  
離騷怨虛窻大雅音冥鴻不知處引睇暮雲深

秋陰

老蟬吟漸懶愁蛭思無窮數點菊花雨一溪茅屋風苔衣  
秋井綠楓纈曉山紅急索鶉裘補寒先及老翁

番城晚眺

獨眺秋逾遠孤城日漸曛地平浮楚澤天闊見吳雲風靜  
漁歌合波搖雁影分未應陵谷變不得問番君

道中

共僧分晚供呼渡立橋東雁背西風緊漁梁落照紅雲添  
疎樹影葉補敗船蓬舊日津亭酒黃鑪蔓草中



乘言  
卷一  
三  
鈔本  
覓宿村溪遠逢人面目生習移多佩犢氣怒鬪呼鷹天濶  
秋陰重風高夜析驚遲明懷宿飽股慄履春冰

有感

江漢已維楫山林困蒺藜頭顱春雪重心緒晚雲依掛樹  
蛇留脫踰垣席印蹄遙憐伯勞燕辟地各東西

謝吳子與惠詩

解后西風野菊黃別來冉冉歷三霜未償詩債如山重曾  
結交盟引夢長老病終年親藥裏清談何日到書囊聞君  
讀罷多娛樂萱草春深棗萼芳

冬夜抄詩作

筆債窮年老髮僧硯寒還復夜敲冰西堂夢後無靈運夔  
府歸未有少陵諸老文章凡几變千年風雅欠中興矮窻

燭暗成惆悵忽見梅花月一稜

送客至靈谷

仙林路細出山腰靈谷峰高入紫霄立石借為題字壁倒  
松因作渡溪橋雨花濕地人歸晚烟草迷川馬去遙記得  
元都種桃處黯然分袂各魂銷

重贈星翁陳跛子

拄拐蹒跚鬢雪明向來小范亦分羹十年不見疑先死一  
旦相逢似再生儘亂亦收詩卷上長貧猶挾命書行試言  
何物妖星照是霧青山白骨橫

舊廬毀于亂十年矣吾老他寓每不能再葺戊子  
冬良異聚芸人之資自構小堂因以勉之

舊址相傳五世昌寒蕪忍墮十年荒老吾哀落空懷土幸



汝辛勤自肯堂袖裡莫忘無恤簡牆頭猶有孔明桑地靈  
舊日鍾文氣且要扶持此脈長

桂花

秋樹婆娑風露涼老蟾落子種虛堂  
脰渾天地中央色漏泄神仙上界香  
負裡忽驚添粟滿老來不動買花狂  
帶愁莫上黃樓去歸隱淮山興味長

酬鄰僧惠古杭蘆管兔毫

黃蘆笠澤剪秋兩褐兔中山俘飽霜  
千里能隨雲衲遠教君肯顧草廬荒  
無情書傳方高閣何處塵埃有畫墻  
留與素翁修菊譜寒花吹入墨雲香

義馬塚

許得寬伸意始休敝惟埋骨幾經秋  
獸心猶辨死報主人面却甘生事  
讎作傳自應班豫讓論功何止及留侯  
世間義字無識人寫在荒邱馬塚頭

題艾溪溪直嚴州學宮前余始祖實溪上人靖康  
避地於撫溪尾為艾原方干為原中客賦詩者此  
也

睦城西下柳陰陰以艾名溪古到今鼻祖桑弧蓬矢地耳  
孫喬木故家心應無別姓爭墩佳曾有高人對客吟  
欲向原頭拜宗老西風落日暮雲深

與雪舟楊子圓十五年不相聞一日辱和猥句更  
號皓隱因復奉寄

羞把長裾事走趨已將身世混樵漁畏途咫尺如千里老  
友多年欠一書最喜山人題皓隱莫教帝畫到幽居欲尋



載雪舟邊路來為樂翁賦遂初

寄清曠鄧隱夫

去年菊裡尋經過秋思蕭蕭又草坡  
兵火東南闕氣數交游湖海隔風波  
書緣辟亂經年少詩想憂時近日多  
倘有鱗鴻幸相寄青燈無奈憶君何

次大五姪問移家韵

天覺

投老移家僻塢來滿林秋露洗黃埃  
飯纔種麥須堪飽衣旋培桑未可栽  
萬古乾坤如傳舍一生風雪嘆江梅  
相看喜有青田鶴肯與詩筒日往回

移家寄諸丈

十弓荒圃百弓山縛草編茅屋兩間  
雞甕不知天廣大鶴巢已覺地寬閑  
勝心擾擾雙蝸角畏路岩岩九席闕  
退一

步行差得計野雲深處即商顏

再答諸丈見和二首

神龜為我作天山合住清泉白石間  
歲月短梭人易老詩書高閣士方閑  
秋鴻社燕炎涼勢滄海桑田夢覺闕  
近屋虬松三百尺時時相對各蒼顏  
肯為劉安賦小山幾時雞犬過雲間  
命窮無用三千字蹄蹶難供十二閑  
薄酒程頭多隔縣故人蹤跡半陽關  
何當共嚼西來雪嗅取梅花一破顏

遊古汴趙氏溪園

不起樓臺作熱官小園回合抱溪灣  
露溥花靨春紅濕烟護松髯晚翠寒  
已向掌中旋宇宙正須曾次着雲山  
可能再為蒼生出鶴怨猿啼攬夜闌



次吳壽翁溪園韵寄題

營營誰肯卧滄洲喜有高人此枕流得水最多知地勝種  
花無數欲畱春圖傳笠澤三分畫夢繞黃淤十里秋料得  
江楓吟未了載詩應汗謫仙牛

拜五世祖妣墓

敬脉人人似飲泉掃松羅拜喜爭先頌琴不朽終流慶石  
仲相看莫計年滄海桑田誰料此秋風宰樹幸依然五陵  
莫說驪山下愁絕求羊一穗烟

辟亂逢故人

亂裡相逢各自忙少依松影話淒涼古來尚有種桃處今  
去當傳辟穀方馬蹴黃塵遮日暗鬼吹青燐隔林光海田  
未必非天數空對西風老淚滂

題友人歸隱圖

買山長說欲棲身畫得圖成隱始真半枕虛堂生草夢一  
溪流水種桃人但知樵客當辭漢莫與漁郎說避秦早晚  
相從弄明月細聽喚鐵響蒼筠

意行

意行行到野人家門帶清溪石徑斜落日輕烟山可畫短  
籬頽塹菊能花歸遲悞客頻敲竹坐久勞人再煮茶那得  
寬閑無點事日搔短髮問桑麻

庚寅二月朔積雪初霽過和山見雪深堂瑞香感

開回過煙雨村則庭中花更早亦未歇也得數語

錄似二花主人

煙雨庭前錦繖張一般穠郁雪深堂偶扶晴日孤筇出連



挹春風兩屋香供佛省燒蒼柏子薰書不藉綠芸囊冰霜  
儘厄芳心在自與梅花是雁行

廢貢院為米廩過之值盤厥

擔夫勇似踏槐忙衛卒嚴於夾棘防千古文章成畫餅萬  
人場屋忽教倉籍存尚或思班爵禮廢寧容併去羊立盡  
斜陽還獨笑功名自古夢黃梁

示子良異

霜雪林頭又綠稠乾坤生意幾時休人情葵扇炎涼態世  
路瞿塘上下舟驚波未輸蛇百足茅封不敵橘千頭細看  
不似吾儒業一片書田或作秋

贈數學姜兄

向來塗抹趁春妍老去樓遲嘆雪顛一倍法靈君說數三

生緣定我隨天正須花外羈奔馬莫向橋南聽杜鵑見說  
侯封容易覓紫茸靴袴錦鞍鞵

贈談數陳改之

投老江南黃葉村菊花時節雨昏昏矮窻孤夢正欹枕拄  
杖一聲誰打門三字頭銜康節數一編心易華山孫吾年  
漸似璜溪老尚把靈光許獨存

謝惠楮衾

厚於布被擁公孫清似荷衣伴屈原捲送春雲香入夢剪  
成秋水淡無痕五更葭瑄噓寒谷一榻梅花近雪村直作  
黃綢紋錦看日高睡穩不開門

觀潮

按節波神逆水來魚龍掀舞鬪崔嵬浪高峯頂青天雪風



助江散白晝雷勢欲上時掀海立怒無泄處觸山回世間  
亡國知多少誰是靈胥恨未灰

悼亡

秋瑟淒涼忽斷絃自罷山石誌新阡稍閑即病身無福竟  
死難醫命有天會續忍看燒燭淚遺簪聊抵買花錢最慚  
誤看劉蕡策孤汝相依四十年

死生最怕墮危機亂世全身正自稀滿地干戈殊不定蓋  
棺邱隴未為非鹿門不共龐公隱鳳褐誰縫杜老衣愁絕  
梧楸烟雨地藁砧百歲擬同歸

人名詩戲效王半山

此體權德輿已有如半紀信  
不留齒髮良自愧之類皆勉

強湊合不混成惟半山詩云莫嫌柳渾青終恨李  
太白之句過權遠甚但青字亦外未似未純美耳

重耳盈盈岸柳黃九齡冉冉澗松蒼梅開小白添新雪鴉

引童烏弄夕陽樵唱轉低春谷永雁聲不斷暮雲長奔泉  
渾作三濤響濺入懸岩百藥香

偶來安石坐林塘因得棲筠受晚涼歸鳥衝烟方陸續寒  
花經雨尚黃香雲如仙客縱無定風作山賓語自長師古  
不成書謾讀樂天深結退居房

湖陰故人家

水痕落盡見晴沙步入湖陰處士家梅一兩花春尚小雁  
三五字日初斜百年耆舊多思洛五夜精魂半夢華珍重  
瑤琴莫輕拂西風江上沸蘆笳

撚髭

細撚寒髭縷縷霜未須惆悵惜流光近山歸鷺分明白過  
雨斜陽淺淡黃春入桑榆花影瘦門無車馬草心長暮年



一卷叅同契覓得安神不老方

賦太和寺同根紅白梅

雪影蕭蕭帶晚霞胭脂灼灼傍鉛華孤山夜合連枝木一  
樹春分二色花牛繼馬來幾換骨鶴乘鸞去忽通家向來  
逋老題詩處曾有紅裙拂碧紗

滕王閣

木老江空雁陣秋闌干倚盡思悠悠舞衫歌扇落春夢山  
雨浦雲牽暮愁半壁夕陽千古在幾朝王氣一時休獻陵  
無樹供寒雀信是勞生在白頭

贈繩伎

絕藝當場萬目傾兩竿朽索半空橫反提雙女摩肩過仰  
射孤鴻信脚行瞻似子龍身裡滿體如飛燕掌中輕弄潮

已嘆吳兒除更有人從死處生

日食

誰撒天門虎豹扃群妖食日上清冥一眉不及黃昏月萬  
目驚看白晝星絕響無人槌敗鼓洗光何地激滄溟仰天  
凝注需陽復寂歷西風老淚零

穆陵大禮圖

丹青百丈鵝溪絹標軸南郊大禮圖官隸威儀猶是漢山  
河風景已非吳秋陰汾水年年雁月黑連昌夜夜狐羣路  
莫驚荒草暗鯁膏燈滅出金鳧

史氏鐵笛

蘄川老竹未為奇橫截涼州黑玉枝陽燧無烟山鬼鑄蓬  
壺乘月浪仙吹一教響裂千崖石九曲亭標二老詩俗耳



從前聽不得壁塵蛛網故多時

武夷鐵笛亭胡致堂朱晦菴皆有詩

苦雨喜晴早作散步

寂歷山房久杜門清晨踏碎碧苔紋池經宿雨添三尺花  
怯春寒瘦一分滿地月涼翻竹露隔溪風細度松雲近來  
生計隨緣足半畝荒畦手自耘

歸大五姪天覺硯

天覺得乃翁遺硯於火壤中如初有詩志喜併謁子銘銘已就

用其韵以歸之

脈煖猶涵老蘚斑眼花仍帶淚痕潛厄於劫火元無恙意  
在斯文豈苟完一片墨光留手澤渾家黃色上眉間只消  
半滴水餘水漲起滿村烟雨寒

坡翁澄泥硯詩云經火尚含泉脉煖硯譜云鵝眼昏

者謂之淚姪所居號烟雨村予嘗為之記云

留城

夜半遼東白鶴歸舊來巢處立多時門關落日千家靜旗  
颭秋風萬馬嘶文堰石臺空有識畫堂翠幙更無詩悠悠  
往事俱塵土只有寒流是古溪

題洪厓仙壇

樹精不死卧松關呵護仙翁舊禁壇天濶難尋騎去鶴井  
香疑有煉成丹山如辟穀秋逾瘦屋尚凌虛夏亦寒行遍  
蒼崖無石髓空和涼月倚闌干

寒食後

寒具油乾火已新流觴水暖酒初曛薔薇半樹花孤注杜  
宇一聲春二分薄晚草心先浥露久晴山意欲生雲老來  
尚費閒精力自種窻前辟蠹芸

簡敬軒何行叟覓墨



兵塵漠漠暗窮山零落難尋墮水丸見說陳元老居士獨  
留何遜舊詩壇快刀肯截烏龍角破硯猶存紫馬肝一笑  
磨人磨未了曉窓搔首雪霜寒

老竹

蒼黃瘦硬立顏垣疑是栽時第一根早歲孤君惟二子暮  
年千畝盡諸孫雨鞭老迸蒼龍骨霜節寒封古蘚痕消得  
培滋號尊者把詩題作野人軒

題賤容

骨多肉少與梅同老向江南風雪中萬事羞稱司馬好一  
生不送退之窮偶貪識字頭先白稍欲工竿面即紅說與  
丹青莫饒筆肩山只合付何充

除夕感興

黔烏縞兔鬪飛梭春樹流年憶踏歌掃白了無燒藥法守  
元不及力田科人於淡處交情耐梅到枯時生意多寂歷  
風簾捲山雪醉眠不問夜如何

枕上

畫蘭重補紙床屏支石橫眠道氣清杜宇不啼春一半落  
花如夢雨三更老心暗覓餘年健萬感偏從靜夜生最憶  
寶蓮山下月照人扶醉聽吹笙

題古洪周君會梅閣

得梅境於洪因  
舍御而家焉

此花不受俗人知為汝移家亦絕奇至冷淡中參古意極  
高明處見南枝棟簾相望滕王屋風月重添水部詩夢入  
梨雲香不斷有人携笛倚欄吹

老梅



搖落荒村野水涯  
貌枯神澤骨槎牙  
一生知歷幾多雪  
絕好只消三兩花  
萬木尊為諸老行  
孤根淡似道人家  
兒時見汝今白頭  
正擬相看度歲華

哭菊存蕙山二兄

黃臺瓜蔓已淒涼  
五雁飄零不着行  
一脉僅餘三老在  
半年又哭兩兄亡  
菊園霜熟秋香寂  
蕙帳雲寒春夢長  
愁絕吟魂招不得  
西樓風雨憶連床

哭環州先生

閒却秋州野釣磯  
誰知遠出是危機  
一篙賴水虛舟急  
千里詩魂半夜歸  
前月僕來書尚健  
一生志與命相違  
親庭已老兒方幼  
最為先生淚滿衣  
曾隨計吏上青霄  
折翅歸來困一瓢  
湖海十年烏繞樹  
功

名兩字鹿眠蕉山  
圖不及生前買詩版  
姑留死後雕地下  
修文應未惡寒蛩  
虛館雨蕭蕭

檢歷即事

古來繫日欠長繩  
節物相催老自驚  
歲裡春為花早計  
蟄前雷是雪先聲  
移家燕子商量熟  
開國蜂王去就輕  
最憶長安三月事  
有誰重賦麗人行

七夕對雨

門無轍跡草偏青  
屋帶秋山意轉清  
打夢易驚碁電響  
載愁不去酒船輕  
幸無簾幕妨雲影  
尚欠芭蕉贈雨聲  
欲送星鸞過橋去  
夜深河漢未分明

重宿芳草渡

曾卧江樓聽雨聲  
蕭疎又似送歸程  
正如老馬倦行路  
忽



有鶉姑啼晚晴統屋種花春爛漫隔窻無樹月分明蒼頭  
不管人眠熟連報嚴城打五更

宿洪巖寺

寺負微甚而僧勤殊可語

枯形面冷住山人彷彿錢塘老惠勤寺窻不充黃粟飯佛  
寒添繡碧苔紋秋散茆屋三間雨野色松巖幾樹雲嚼菜  
薰香清語久一燈明滅夜將分

看鏡

自磨寒鏡看頭顛短髮蕭蕭不受梳天地風霜吾輩老江  
湖烟雨故人踈道窮分命真如紙世亂功名不要書縱有  
黃金難鑄錯一編殘易伴犁鉏

中齒忽折

老醜移形轉可吁凋零已到骨之餘似因漱石磨成磷幸

免投梭折得踈根笋尚如兒戲短醫師欲寶火田虛喜無  
乾肺勞吾決含咀猶能味古書

除日立春

晚山危謙夫來訪

歲如舊政方書滿春與故人同惠來白髮最愁新歷換清  
談且博笑顏開屠蘇卯酒紅生暈細菜辛盤翠作堆但覓  
年年各強健不妨日日小徘徊

竹杖

一枝九節稱身長扶得衰翁氣力強色點湘妃紅淚雨骨  
疑王屋紫藤霜結交最與芒鞋密寄友應含畢撥香獨有  
探梅時節苦相隨江路雪茫茫

詠眠窩

獨榻孤扉木几雙小窩可受北風降帶霜楓葉寒供火隨



月梅梢瘦入窻夢熟不知衾似鐵睡醒何用酒盈缸近山  
最有松穀好卧聽空潮上浙江

哭北谷羅先生

死到先生世道哀忍彈雙淚看銘碑動隨天去無心愧視  
得官輕事敢為他日史書廉太守四方人哭老宗師不知  
精爽歸何處定在梅花自在時先生云無人描畫無人咏  
始是梅花自在時蓋自况

涼棚

數柱伶俜不架椽密鋪松髮厚如氈禦風難覓深蓬島障  
日聊成矮木天肥瓠引藤高挹露間花借蔭省澆泉熱時  
構汝涼時撒不是疎恩勢使然

郡樓九日

虹影初消雨脚收憑高聊復散牢愁烟橫三市蜂房屋塵  
掩重門燕子樓黃菊自隨陶令節白雲那管漢時秋雁飛  
不盡乾坤大安得相從汗漫遊

文節謝公挽歌

不甘搖尾乞人憐視死如歸氣浩然千古六經俱掃地獨  
公一柱肯擎天乾坤萬劫英雄盡文節雙高日月懸惆悵  
老身空有淚玉亭無路薦寒泉

謝屏山吳顯父惠歛硯

蒼玉光寒篆紫烟重重封裹到梅邊得君一片歛溪石即  
我終身棉上田少達必穿維翰鐵儘窮共守子雲元老坡  
莫遣窮居後遠在茶坑鳳味前  
立春日雪



曉鑪香劑已燒殘  
謾捲機簾倚藥闌  
鞭底土牛方轉燠  
石邊鹽虎忽疑寒  
有人剪絲娛羔酒  
獨我煎茶續菜盤  
冰泮硯池呵未泮  
東風到底入毫端

雪消

紅日行天熨絳綃  
一番陽長便陰消  
青山又現本來面  
瘦竹方伸久折腰  
枯沼暗通泉細細  
晴簷忽聽雨蕭蕭  
獨憐點入吟翁鬢  
費盡東風不肯銷

糴踴感興

筆耕長餒拙生涯  
何用撐腸着五車  
甚欲療飢難煮字  
可憐不飽費吹砂  
老慚乞米修竿牘  
貧欲休糧種棗瓜  
夢裡不知時世換  
買珠猶自說京華

落梅

翠羽嘈嘈喚夢回  
羅浮峯下小徘徊  
霜風昨夜捲晴雪山  
路今朝無碧苔  
尚有瘦香供玉笛  
不將餘片點粧臺  
少湏昂實明人眼  
却帶江南烟雨來

歲菊

除夕正花故名

不逐登高老孟嘉  
同來守歲阿戎家  
能將秋圃風霜骨  
直作寒梅葦行花  
香穉屠蘇浮臘蟻  
色侵幡勝揮雲鴉  
老夫細把金英擷  
獨擬明朝早供茶

江上

江上春肥哀草生  
林梢烟煖乳鳩鳴  
青山與我一面雅  
白鳥令人雙眼明  
雲淨有時看雨泣  
水平無處覓溪聲  
折芳弄翠渾閒冗  
時與樵漁錯雜行

偶成



似是輪囷老蠹魚尚饒蘭露入銅絲詩亡正恐魯無史士  
賤豈容秦有書世味幾時回橄欖秋山隨地著蘧廬多情  
樵客能相問莫有餘閒賦子虛

即事

一片輕鴻度小坡半泓淺碧浸叢莎黑雲垂地雨散急黃  
葉滿林秋意多短髮未冬先有雪懶心如井不生波孤砧  
已報寒消息欠問眠鷗覓芟荷

過長林書羅文恭公碑陰

水心先生作

人家落落墮荒邱碑帶蒼苔獨自留博陸脊梁扶日月中  
郎筆銘法春秋一杯誰下尋墳馬片石今供礪角牛惟有  
斜陽閑照管肯和鴉影上螭頭

失題

格磔散高午夢殘戾戾歌罷酒杯乾漫天飛去楊花亂着  
雨歸來燕子寒世味淡如和蠟嚼春山好在帶雲看近來  
習性渾成懶抄畫陶詩獨倚闌

深冬

凍透松邊屋兩間孤床盤礴數更闌無情風雪偏欺老經  
亂衣裘不禦寒春意一爐紅楫拙故人兩坐綠蒲團敲冰  
自換甕瓶水浸取梅花仔細看

安南貢象

錦韉寶勒度南雲到處叢觀暗驛塵人喜此生初見象我  
憂今世不生麟半年傳舍勞供億德色中朝動搢紳粉飾  
太平焉用此只消黃犢一犁春

贈廣信醫博士陳雲泉



見說雲泉深又深定知巢入海棠林君醫尚副窮時願吾  
道全孤壯歲心藥龍有方元白髮莫腸無分服黃金近來  
覓得安身法諸老先生夜氣箴

郡中逢桐廬方冰鑑相士

七里灘頭曾識面五峯城裏又逢君人間一瞬白駒日世  
事幾番蒼狗雲竒骨誰當侯萬里匹夫那可帥三軍試憑  
冰鑑從頭問細雨青燈過夜分

觀放鸕鷀

烏鬼淋漓受指呼江魚終日為人歧扼吭不及能言鴨哇  
肉幾同反哺烏暫滿空喉如癭大竟無半尾塞腸枯少寬  
頸紐方謀飽水冷沙寒日已晡

臨汝書院落成諸公有詩用韻

魚躍鳶飛喜落成鵝湖鹿洞共崢嶸世無孔孟乾坤熄學  
到周程日月明議論高虛終害道聖賢平實不爭名光風  
霽月元無跡分付庭前草自生

追和晦菴先生十梅韻

貞姿抱冰雪粲粲楚江濱照水淡寒影寄人生遠春江梅  
微吟水部詩欲續廣平賦須是心鐵人方識花妙處梅賦

一陽未噓枯霜木最夢裡照眼忽橫枝令我折屐喜梅早

窮陰返冰壑霜月耿夜殘中有羅浮仙洒洒風骨寒梅寒

蒼涼遯荒野交與桃李絕遠聘不肯來為君三磬折梅野

蒼根封古苔空腹餐凍雪老意暗生香丁寧勿輕折梅枯

天風開瘴烟獨立山椒雪神人藐姑射相對成二絕梅嶺

好花不必大骨瘦花自小一點春有餘萬古香不了梅小



蕭蕭三五花影落寒溪淺佳處不在多詩興孤山遠疎梅  
東風捲晴雪山意頗空寂掃花歸作飯豫當調鼎實落梅

清趣

鴉叢桑椹紫蝶冗菜花黃水鴨眠依石竹鷄啼過墻  
雨闌流水急風定落花遲一老臨溪釣雙童畫地碁

晚霽

天空虹滅影風定水無紋半樹掛殘日千巖吞濕雲

題四止菴并序

淵明詩云坐止高蔭下步止華門裏好味止園  
蔬大歡止稚子四事適與予同因以四止名吾  
之草廬而為之詠

團團青楓陰綽綽萬間屋下有避俗翁掃石疊兩足

松關深更迂中有安行路從渠馬上人笑我不出戶  
本無食肉相每飯甘藜羹侯鯖豈不佳怯怯疑生兵  
紅樓艷歌舞樂極還生哀歌枕看兒戲好懷終日開

聞雁

枯樹淡秋影濕雲凜夕陰江天一聲雁世事百年心

題素庵壁間六首

兩椅熨秋竹一簾捲霜藤山風長夜寒兀兀挑青燈  
風簾或捲茅雨飽頗生草泓然老硯池照我髮編編  
閑花淡心事不作春風妍野竹三五枝引涼吹晝眠  
松影亂書簷鳥聲隔山屋有客抱琴來為彈芝田曲  
霜崖白石髓火鼎黃金芽生疎不入夢飽飯煎江茶  
紅塵野馬急老意飢蠶懶借取黃庭經時時漫遮眼



世言梅見外於離騷海棠不取於子美未有為解  
朝者因作二絕

不受春風半點塵骨寒花冷雪為群桂椒不敢攀同傳正  
是騷人獨敬君  
態濃意遠骨肌勻睡起精神萃太真不用分明更題品詩  
翁已自為傳神

月巖

不容天上妖墓食却許山中狡兔眠兩日見巖成二絕了  
頭不老月長圓

大佛頭

古杭志云秦王  
繫纜石刻成

錦帆翠楫照吳川繫纜猶存石巋然刻佛未靈山鬼過西  
風吹動鮑魚船

淵明采菊圖

餐英人去已千年留與先生泛酒船昔日避說今避世黃  
花獨識兩翁賢  
不緣斗米掛朝衣自是知幾勇賦歸莫把秋英等閑看高  
山芝草首陽薇

元旦

不管鬢鬆雪滿顛筆床茶竈度年年窮愁博得長清健多  
折梅花供老天

春溪二首

嬾溪晴穩麥風斜橋影款傾水見沙十里荒陂自春色一  
雙鷓鴣啖楊花  
雨香雲嫩散春暉細草初肥綠滿溪無數落花鶯背上避



人帶入柳陰啼

釣臺

不隨龍去只魚汀絕喜先生世累輕却把客星侵帝座豈因忘世未忘名

自有諸公作帝師故人相與竟何辭可能密密同床話不及周南第一詩

落第口號

萬里長風鷁退飛自澆澗水濺征衣滿身只有梅花影不帶西湖柳色歸

輕柔楊柳挾春妍孤梗梅花結雪緣此是乾坤大消息相逢切莫說流年此予三十年前贈先見趙太史二絕之一予亦不復記憶矣後三十五年太

史訪予山中恨詩不存惟為予誦此而亦忘其一竟莫省為何等語也既徵補之且告予以五星之將聚因作二首奉笑

識字田夫雪滿簪種桃久矣入山深五星便是叢奎宿不上黃花老圃心

太史談天術轉靈相看猶自眼青青步占若上清臺去莫說江湖有客星

留城寄曠翁翁時寓洪

吾年七十八城府君更老吾仍出山早歲相期作深隱至今頭白未能閑

六年不見雲巢老端擬此來消渴心花落鳥啼春事濶不知何處倚闌吟



東溪水長船多上南浦草深入未回昨日君家問消息書  
歸方索暑衣來

灌園

土渴群蔬不肯青  
轆轤百轉汲深清  
山翁到老謀生拙  
抱甕崎嶇博一羹

二十四夜夢到何許植物多瑞香覺而賦此

春風吹我遊仙夢  
夢到廬山頂上來  
不記花多與花少  
恍然如步紫雲回

秋風

千巖萬壑吼虛鐘  
病葉吹黃樹樹空  
寄語天公莫多事  
杜陵茅屋怕秋風

題龜峰僧閣

蘆竹叢高蔭石闌  
菩提香遠出林端  
雁聲忽斷梧桐雨  
草閣秋深倚暮寒

宣和御筆二扇面

紈扇輕盈寶月輪  
鶯花點染玉園春  
憑誰為障西風起  
萬里腥塵竟汚人

黃蘆白雁小汀洲  
奎藻香羅一片秋  
勝似紉干山下雀  
凍飛不去使人愁

武陽渡

空濛水氣濕溪烟  
閃爍沙星照客船  
一片西風吹酒醒  
秋容多在雁雲邊

題四皓對奕淪茶圖各一絕

疊足支頤落子遲  
松風冉冉動鬚眉  
斷蛇失鹿渾閒事  
不



直雲根半局碁  
石乳雲腴撥不開  
春風激灑碧磁盃  
應無俗客煩敲臼  
只恐東宮聘使來

山宇

一方湘竹卧春陰  
數卷唐詩醒老心  
俗客不來山宇靜  
新鶯啼入杏花深

春晚

花風擺脫老紅去  
穀雨將迎雅綠來  
我類文園病消渴  
曉窻和露咀青梅

觀碁

換先岐路不容差  
形定心忙寂不譁  
仙客莫嫌春晝短  
東風落盡海棠花

和靖祠與故宅皆無梅

得見梅花即見逋  
我未竟日覓無梅  
却于無處分明見  
月滿孤山水滿湖

術有道莘野釣濱者求詩各與一絕

擷青日日飯疲牛  
識字耕夫已白頭  
束帛不來山鬼笑  
有人馬上覓封侯

意釣秋江不為魚  
六韜尚擬載徵車  
東南腥血方塗地  
何用人間有此書

郡中元都觀追和劉禹錫詩二首

為愛聽琴亦此來  
道香庭院得徘徊  
羽仙羞種桃花看  
一味湘蘭透屋栽

龜頭突兀未生苔  
讀罷新碑老眼開  
前度劉郎吟未了  
溪



翁為作後身來  
守分

穿窬暴富竟飢死博塞得官終族誅不驚寵辱老瓦硯粗  
了暑寒羸布襦

九日登抱螺峯呈同遊

莫放龍山舊醉豪西風輦路暗蓬蒿目窮千里應惆悵賴  
得螺峯不甚高

補破為杜詩下轉語贈老婦

一寒誰復解絺袍百結重縫嘆汝勞莫遣海圖歸短褐此  
身正自困風濤

石溪二梅佳甚翫索晚歸

山根短日墮寒影溪上亂風吹結衣自憐野性老尚癖逢

著梅花便不歸

書琵琶行後

兒女情懷易得憐悲傷容或涕漣漣獨疑遷客方淪落猶  
著朝衣夜入船

蓮花市

春風十里蓮花市紅燭三更桃葉歌候館羈人眠不熟梧  
桐窻下雨聲多

避夢

困熟依然夢不閑起蒙絮帽待更闌矮梅窻下清如水淡  
月籠霜雁影寒

書無悶寮

斲谷冬瓜幸未生尚堪松下抱遺經春秋斷爛無人讀一



點寒燈老眼青  
風雪蕭蕭席作門  
奴星急把柳車焚  
臍中紅炷兩三日  
塢裏黃金十萬斤

喧啾百鬼瞰高明  
寂歷朱門野草生  
斗大山中茅屋好  
日長歌枕聽松聲

對客清談入妙神  
舌乾時與共先春  
東州米價北門雁  
一語不須來溷人

與林止菴葉半隱分賦郡中古迹得魯公祠右軍

墨池

遺像猶能立懦夫  
懸知生氣攝狂胡  
三郎阿堵知何用  
只識營州羯狗奴  
昏昏水氣吐玄雲  
自是先生筆有神  
不洗從來姿媚態  
可憐北面衛夫人

孺子亭

斷草寒烟改宅荒  
高風千古映湖光  
獨憐漢帝徵車重  
不及陳蕃八尺床

木芙蓉

露冷紅酥不帶愁  
湘蘭楚菊共清修  
靈均死去無人問  
閑却滄江一片秋

漫興

支離矮屋護松陰  
半刻清閑直萬金  
蟋蟀叫回秋夢薄  
一鈎涼月道人心

荒畦整整復斜斜  
不種春風兒女花  
却笑過墻蝴蝶亂  
懶隨野老問桑麻



凍耳蕭蕭天欲霜冬深門巷意蒼涼一筇徑為梅花出獨立斜陽影正長

富陽出陸

露溽芳綠茸茸淡靄輕烟古畫中行畫葡萄三十里海山青處日初紅

留客

棧欄葉碎風索索枇杷子熟煙冥冥黃鸝三請我未出白酒一樽君小停

刺語卷下

屏岩小稿

擬古五首

元張觀光著



腕中有幽蘭風露飽清抱含章不求聞坐見九秋老夫君日已遠佩飾為誰好何如斂餘芳山林養枯槁

驪龍有明珠奇氣久磅礴一為蛟人采夜半泣海若至寶諒難得珍藏思遠託如何賤所貴用之以彈雀彈雀亦何惜一去恐流落

名門有貞女始結絲蘿盟嫵婉席未溫良人已遠行遠行何時歸妾身不自輕空幃守寂寞誓以終此生雖云受恩淺耿耿懷至情

山中怪物變草木自四時秋水照短髮血氣日以衰寒藤



不知枯青青上踈籬繁陰縱有託已迫風霜期餘生方自  
憐孤吟欲何爲

徂徠有嘉木巍巍高連天脩柯濯雨露沃葉藏雲煙根蟠  
九地暖聲落四壁由來所養不與春相干歲久墜茯苓  
苓土色腴且堅山人劓爲藥至味通靈仙願言事服朗身  
可三千年

旦景

雞鳴起濯髮披衣出戶牖自汲古澗泉落月犹在手三漱  
吞朝霞餘光散花柳茲意難語人延竚忽良久

至後

道人坐茅半獨抱無絃琴對此景物異夕雲散還陰雨氣  
一簾潤雲意千山汲新陽暢微暄疎花點孤林芳時坐消

歇孰同歲寒心孤梅發清夜庭樹驚棲禽

故相賈秋壑舊府

當年構華屋權勢傾衛霍堂宇窮斧斤天氣煥丹牖花石  
擬平泉水陸致茲壑惟聞丞相嗔肯後天下樂朱門鎖荆  
榛花木已蕭索蒼生顛墮崖國亡身孰托空悲上蔡犬不  
返華表鶴丈夫保勳名風采照麟閣胡爲一聲鉦聚鍊鑄  
此錯回頭暮烟昏不能掩餘恠

九日會王修竹西樓預坐者七人以落霞與孤鶩齊

飛分韻予得字即席走筆

冉冉五雲深山西日光薄登樓集羣賢縱目天宇廓落木  
悲徂年寒光照杯酌浩歌興悠然意行非澗壑緬懷龍山  
遊此樂久寂寞胡爲落帽人白首戀賓幕醉餘發詩情分



韻盡佳作吾愛漉酒中西風吹不落

綠珠

娉婷石家姝榮顯晉朝使斛珠不論肯得備中櫛侍一笑  
金谷春粉黛皆歛避豈知步障中乃復為愁地念主愛妾  
深因妾為主累樓頭風朔愁殘花抱春墜

燕子樓

繁華隨逝水日暮高樓空哀哀徐陵妾主不及終空房  
輟膏沐明粧為誰容春風燕子來秋風燕子去去來影帶雙  
孤鸞抱樵悴回首醉嬌時百花不敢媚

潘淑妃

二八入宮掖一笑輕三千雲階渺何許步步生金蓮繡鞋  
不勝春風若凌波仙榮華一回首荆棘生我前君恩花上

露妾心井中泉井泉誓不波下照青青天

秋胡妻

陌上桑葉稀家中蠶正飢妾心知採桑安知使君誰結髮  
為人婦絕年守空幃婦義不移天黃金欲何為老姑倚門  
久不待盈筐歸為妾謝使君風化關庭闈

紀夢是歲大旱

老年屏人事北窓寄高眠夢魂御風去金闕開九天虎豹  
獰不噴知予有仙緣玉座擁五雲香鑪飛紫烟青衣兩童  
子舉手導我前下土蟣虱臣愚衷欲敷宣兵戈幸休息飢  
饑方連綿洪惟大生德實司水旱權願言回哀眷與世解  
倒懸上帝允臣請乃曰賜豐年再拜謝闕下回颺墮林泉  
夜雷聲殷殷甘澤朝滿田沈思喜且驚異夢非偶然士懷



當世憂膏澤期無愆貞觀有房杜斗米三文錢

鈔本

夜後謝友人顧問  
素居坐孤陋却掃甘隱淪荒徑無轍迹蓬藿方萋萋風雨  
撼四壁一榻寄屈伸誰念相如病豈堪原憲貧友人隔河  
梁懷思賦停雲柴車忽過我問勞何殷勤促膝話契濶道  
合情更親語邁流俗意氣舍至真盡懷談不盡浣我胸中  
塵盤蔬與束脯草草為爾陳瓦盆煮新酒味有太古春非  
徒洗磊塊亦足消鬱陲北窓坐終日薄暝生秋旻斜陽戀  
客影把袂不忍分此去歲月邁何時復相親我輩重道義  
勢利何足云榮華易消歇德齒久彌新願言保名節努力  
配古人

遊謝仙巖飛霞觀巖下李叅政墓

鬼工鑿山骨何年驅六丁飛霞遶石洞縹緲開珠庭永懷  
謝仙伯坐斷山水城我來事幽雅登臨委客情松風驅溽  
暑自覺毛骨清猿鶴亦仙意人生空營營石麟卧荒草問  
是誰家塋野老對我言其人昔公卿金玉埋黃壤送日冠  
蓋傾興衰異百年所重非脩名乃知鐘鼎貴不如芝薇馨  
所以世外人返老還孩嬰倚杖空嘆息洞口雲冥冥

約王琴所不來舟中偶成

清颿捲炎埃碧水出秋素迢迢見山亭回首隔烟霧酒帘  
颺漁邨笳鼓嚮軍戎倚蓬問舟人云是三江路籬落雞欲  
棲野水牛已渡釣翁炊荻烟稚子收漁具抱琴人不來殘  
陽在高樹

種松

壽春堂



去年種松樹未有蒿與蓬今年松漸長埋沒蓬蒿中老髯  
何蒼蒼歲華不改容回視蒿與蓬零落悲秋風

題三月梅花卷

紛紛姚魏家顏色競嫵媚人方眩春華東皇出古意素花  
飭鼎實縞袂立翠蒼猶如喧秋中孤鳳忽呈瑞歸然山林  
尊坐使衆芳愧

讀文相吟嘯藁

垂垂大厦顛一木支無力精衛悲滄海銅駝化荆棘英風  
傲傲几礎濱死猶鍊脊血洒沙場秋寒日亦為碧惟留吟  
嘯統千載光奕奕

雲間有懷

風流懷二陸才名動三吳荒塚今何許千載空烟蕪當時  
逞文筆萬象爭先驅有如明月壁美價傾鴻都世運有翻  
覆韞匱空良圖惜哉去就輕喪此千金軀人生各有死百  
年同須臾獨遺文字芳乃與天壤俱淒淒九山塞冉冉谷  
水枯白鶴久已寂黃犬不復呼斯人今已矣弔古空嗟吁

偶書

百歲集孤夜山樓起呼月秋蟲聲轉悲感此衆芳歇人身  
非金石青鬢忽已雪逾淮橘心秋出山泉水汨猗蘭抱香  
死不受蒸菴沒  
鳳德嗟已衰宣尼欲浮海賴有載道經神功補元宰刑詩  
挽風變繫易憂世駭春秋筆削嚴西秦書乃采微義將繼  
周逆悲大運改悠悠千古心後死文書在

古意



庭前有高樹風撓無停枝寒鳥噤不鳴夜半環樹飛託身  
未得所三匝情依依高飛犯霜露低飛觸茆茨乾坤豈不  
容振羽將安之徘徊戀明月顧影徒傷悲

感懷  
入山採芝薇豺虎據我丘入海尋蓬萊鯨鯢掀我舟山海  
俱有礙瞻望遠愁軋坤如許大此身常浮漚依託豈無地  
皇皇將安求何當跨鳳鵬相從安期遊

白酒歌為巖翁賦

火雲燒空日色烈暑氣著人方鬱結巖翁宴客水亭東竹  
色葉香獻清絕瓜削水晶蓮剖珠象箸犀盤盛陳列銀罌  
捧出白醞醅透鼻香濃風味別傳來未到心已寒灑灑瓊  
光瑩而潔初疑炎帝行冬令壺結冰澌洗袪熱又疑仙掌

流沆瀣破甕傾來和王屑誰向藍田拾瑤英釀成竒液色  
澄澈恐是太華井中溢脩綆銅餅汲不竭又恐夜半雷破  
山石髓分流乳泉裂既非西貉綿羊酥又非緱山仙鶴血  
胡為照眼光陸離藥玉盤中色難別令人敢嚙不敢漱怕  
有飛霜寒齒頰一盃一盃復一盃肺腑盡化為冰雪憶昔  
曾誦坡仙詩白酒無聲瀉油滑開編自覺饒泉流詎謂今  
朝得親啜主人醞藉如此酒氣味清醇韵芳冽糟

麴蘖

侍郎亭

東鄰花圃栽雙松一朝煨燼枝葉空侍郎亭前有雙松至  
今古色摩蒼穹此木受命本千載扶持若有神始終天留



真質表文獻柯葉蕃茂根本豐百年培植飽雨露虬枝風  
撼鳴笙鏞振髯相視雪貿貿擁蓋對立雪童童不知天地  
有黃落玄冥失柄春無功雲孫莪冠立亭下典刑如侍乾  
淳翁昂藏自是廊廟具天矯亦有山林風稜稜鐵面不可  
犯麾去秦爵如飛蓬諸孫奉酒立松下森森頭角皆虬龍  
題東山翫月圖  
斜陽紅盡暮雲碧一片天景涵水色海濤擁出爛銀盤千  
里婵娟共今夕主人領客登東山踏碎寒光看秋液星河  
倒影浸空明露華溥玉夜氣清馮夷激水水欲立海若辟  
易天吳驚孤舟捲帆泊煙嶼古木撼壑生秋聲馮高人在  
金鰲背閑看潮坐烟渚外老龍翻海雲氣寒長鯨捲雪浪  
碎茫茫萬頃滄浪中屹立孤峰鎖蒼翠山顛掃石羅樽壘

賓主傳杯不放杯騷客掀髯賦詩去山童踏月携琴來劇  
談浩飲不知醉仰天大笑歡顏開倒著接羅欲起舞乾坤  
清氣入肺腑天邊風月空四時眼底江山自千古謝安躡  
屐遊東山袁宏登舟宴牛渚庾亮南樓今在否坡仙赤壁  
知何許滿眼往事轉頭空千年人物俱塵去土人生光景  
若湍流霜痕易點雙鬢秋宵中勿著塵俗事眉間休鎖名  
利愁我輩適意在行樂古人所以秉燭遊月落山追憶舊  
遊處畫馬風烟入縑素我來見畫如見景想像高唐猶可  
賦諸君後會應可期雲萍合散今何之安得扁舟激川去  
日與杖履相追隨登山把酒對明月共看此畫歌此詩

醉時歌

茫茫古堪輿何日分九州封域如許大僅能著我胸中愁



澆愁須是如繩酒麴波釀盡銀河流貯以倒海千頃黃金  
壘酌以傾江萬斛玻璃舟天為青羅幕月為白玉鈎月邊  
織雲錦製成五色蒙茸裘披裘把酒踏月窟長揖北斗相  
勸酬一飲一千石一醉三千秋高卧五城十二樓剛風列  
列吹酒醒起來披髮騎赤虬大呼洪崖拉浮丘飛上崑崙  
山頂頭下視塵寰一培塿揮斤八極逍遙遊

律詩

漁隱為周仲明賦

一笠戴春雨扁舟寄此情世間塵網密江上釣絲輕不羨  
魚蝦利唯尋鷓鴣盟狂奴臺下水猶作漢時清

九日偶書

水國雁已到山籬菊未開判吹頭上帽莫放手中盃暮雨

滕王閣西風項羽臺人生能幾履惟恨付蒼苔

秋晚山行

鏗然短策聲無事覺身輕落葉山行輒流泉澗飲清蟹痕  
沙露濕雁影夕陽明歸路逢林交班荆軟隱盟

夜坐即事

對景坐清夜蕭然鬢已華詩慳難就藁燈暗不成花易醉  
愁邊酒頻歸夢裡家何時鋤舊圃學種邵平瓜

禹廟送春

歌鼓滿湖濱傾城出送春波光明畫艇山色醉遊人書穴  
靈何梅梁迹已陳我來閑吊古回首一霑巾

晚窓即事

一枕紗窓下池塘草夢安炷雲金鴨煖滴露玉螭寒晉帖



從頭寫唐詩著眼看晚來吟思倦和月凭闌干

幽居

幽居少塵事贏得一身閑竹屋無人到柴門盡日閑斜陽  
明月晚浦落日瘦秋山隔水雙飛鷺忘機自往還

宿龍瑞山房次周雲隱韵

木葉秋容瘦客懷思故園淡雲微見月一去忽經年莎草  
平詩屋江湖沒釣船何時歸舊隱風雨對床眠

翠峰庵即事

竟日尋幽處杖藜不憚遙客行黃葉路僧立碧溪橋巖瀑  
飛寒雪松風吼夜潮是山皆可隱何用楚詞招

王修竹館舍即事

池館翠深處寬閑稱客居未仙猶閨苑不夢亦華胥竹淨

堪居鶴荷香欲醉魚心清無箇事長日一編書

寄雲谷王府判

曾記還家日重來約夏初自從一別後又是十年餘原憲  
非關病稽康嬾寄書無從問消息近况果如何

餞越守

旌旆漲天飛江山慘夕暉傾城餞州牧別後淚點朝衣人  
指生祠說春隨祖帳歸自來言越瘠公去轉能肥

別山陰諸友

好春風殘臈盡春意動園林柳色獨青眼梅花同素心江  
湖方轉縱歲月自侵尋忍別山陰去徘徊憶舊吟

贈葛秋巖時寓能仁蘭若

蘭若分清隱秋臈飽看山風霜雙鬢老天地一身閑拄杖



穿雲去吟囊貯月還詩成誰與語時訪竹林間

書懷

平生湖海氣老去歎飄蓬知命難求富安貧不送窮江空  
思春月天濶欲行風俗眼從渠白無人識此翁

寄菊坡吳府判

客懷元自惡非是為秋悲一別又三載百年能幾時音書  
無雁寄心事有鷗知遙想菊坡菊西風香滿籬

夜坐即事呈脩竹

一室冷于冰秋高夜氣清月照攬燭影風葉亂琴聲寡慾  
知身健安貧覺累輕吟邊閑倚竹誰識此時情

晚春即事

園林芳事歇風雨暗荒城轉眼青春過臨頭白髮生啼鴉

亡國恨歸鶴故鄉情三徑多荒草東還許未成

登寶林佛閣次韻

曳杖陟高閣登臨思渺然開身空歲月老眼幾山川落照  
明秋浦飛流濕暮烟倚闌悵今昔餘恨付吟篇

夜坐讀書

寂寞寒窓下觀書勝苦吟青燈風雪夜黃卷聖賢心吾老  
關興廢斯文幾古今鳳兮胡不至三歎淚霑襟

春日西園晚步

為愛園林好支筇伴獨行花香能醉蝶柳色欲迷鶯但得  
青春在何妨白髮生斜陽紅盡處一抹暮山橫

書所寓

不厭茆廬小栖栖寄此身菊殘如倦客梅瘦似詩人有地



堪藏拙無醫可療貧并州故鄉夢長憶鑑湖春  
書懷寄贈諸友

寂寞茆簷下窮居更待時吾儕貧可忍餘子俗難醫風月  
偏宜酒江山都是詩廣文無鄭老誰與共襟期  
題義上人清虛閣

偶來成一宿便覺與禪通看塔月影盡捲簾秋色空因知  
釋氏學亦有晉人風吟到忘言處悠然此意同

秋夕和呂誦師韵

誰彈招隱搵雲外伴清幽午夜山林月一花天地秋經窓  
涼影淡禪榻古香浮不作蟾宮夢凄然憶舊遊

偶書

豪氣消磨盡携書客海濱文章難遇主天地不憐貧家累

依劉表妻兒笑買臣彼蒼還可問吾道幾時春

九日

萸萼今朝是秋光又一年但教樽有酒休問篋無錢白髮  
羞唐帽黃花識晉臣賢龍山渺何許回首思凄然

送別胡汲古

自憐身是客又送客登舟雖有重來約難禁一別愁風烟  
迷柳驛草樹暗春洲後夜懷人處山空月滿樓

西嶼即事

松陰迷草徑緩步曳吟筇秋鶴有仙意寒花無冶容漁洲  
煙笛僧寺夕陽鐘回首來時白雲深幾重

春日和韵

新晴天氣好老去倦尋芳桃李自春色園林又夕陽簾通



燕入掃徑惜花香寒食清明近松楸憶故鄉

卷

述懷

柴門閑掩畫雲護竹窻深茂草多生意枯松見古心有書  
消白日無術化黃金客問生涯事長年只苦吟

對竹

門對南隣竹青青玉萬竿雖然無地種且得隔離看露葉  
晴猶濕風枝夏亦寒但教休剪伐日用報平安

秋色

山陰詩社中選

憑高望不極望斷動愁情落日淒涼處西風點染成丹楓  
明野驛白冰浸江城馬上人回首戎戎黯客程

幽居

結屋依山住幽窻與靜宜藤花土踈竹苔石卧荒籬挈榼

童沽酒敲門客送詩老慙生計拙役役又何為

懷友

柴門春事盡未老故人來樹密鳥相語山空花自開傾心  
多日別屈指幾時回為問頻書札何時共酒盃

夏夜小酌

小酌酬清興凭闌看月移分茶醒醉客添燭了殘碁螢影  
明桐井蛙聲出草池荒城江漏遠試問夜何其

王脩竹約觀打魚分韻得圓字

隔岸呼漁伴輕破晚煙鳴柳舟葉聚撒網浪花圓饒鷺窺  
高樹驚鱗過別川洋洋聊付物生意自無邊

新雁

來賓何太早嘹唳過南樓數點乍離塞一聲初報秋行行



驚客恨字字寫鄉愁仗節人何在帛書能寄不

病中

讀易窓開久多時不點硃研乾蟾渴水篋破蠹侵書氣味  
如僧淡形容似鶴癯交遊空滿眼誰念病相如

月山書館

山色青邊屋幽深稱隱居瓶梅香葦硯窓雪冷琴書壁有  
先賢像門無俗客車代耕惟古在何必耦長沮

秋夜獨坐

黃庭重讀罷掩卷剗寒絜髮為憂時白心因學道清一牕  
秋月色四壁夜蛩聲坐倦開欹枕詩成夢不成

古松

天矯生寒翠髯蛟勢倚天喬陰無六月老氣已千年斲藥  
人能壽巢枝鳥亦僊秋風響柯葉彷彿奏虞絃

九日書懷

客鬢同秋老鄉心逐雁飛重陽今日是三徑幾時歸籬下  
多黃菊門前少白衣無人慰岑岑獨立對斜暉

聽雪

撲簌敲窓紙寒齋刺水瀆六花初落夜孤枕未眠人耳靜  
聲逾細心清趣自真愛梅情更苦恐壓一枝春

石窓為明上人賦

何年鑿山骨八面鎖蒼苔海月照還白天風吹不開玲瓏  
宜丈室明潔稱登臺眼界皆通透間雲任去來

對鏡

勲業夢不到曉窓時一看是非須內照妍醜付旁觀客鬢



從渠白詩肩本自寒儼然瞻視處賴尔整衣冠

夜坐

世事等輕雲遠廬寄此身青燈少年夢白髮異鄉人按劍  
驚山鬼吞丹養谷神黃庭重讀罷吾得葆吾真

西州即事

一雨洗空碧江城獨倚樓山吞殘日沒水挾斷雲流燈影  
溪村夜鐘聲古寺秋西州舊遊地十載此淹留

春日即事

扶杖行幽徑園林欲暮天錦棠紅濯雨柳綠綠煙春事忽  
三月風光又一年客懷正愁絕那復聽啼鶻

採菊

籬東閑採菊三迳碧苔深曉露冷雙屐秋風香一襟餐英

供小酌嗅蕊伴清吟會得悠然處方知靖節心

春日

春色濃於酒何須醉玉觴柳疎鶯占影花雜蝶分香往事  
隨流水閑愁付夕陽吟邊自歌舞猶學少年狂

石門

羸馬東山路駸駸抵石門落花春夜雨流水暮烟村久客  
悲行役清愁攪夢魂勞生多感慨餘恨付乾坤

書山陰驛

迢遞三山道重來感舊遊潮聲寒帶雨山色淡生秋寄驛  
通鄉信題詩記旅愁江湖十年客兩度到西州

江樓

凭高閑眺望老眼倍增明林白山雲出潮紅海日生登臨



懷舊恨吟笑遣閒情客裏逢心友開樽叙昔盟

竹杖

一枝蒼節瘦恰稱地行仙不但挑詩卷尤堪掛酒錢看梅  
敲雪落引鶴草書穿莫近葛陂水化龍蜚上天

次韵書懷

風霜頭已白悔不早歸耕客路遠千里儒冠誤一生世情  
雲共薄心事月同明老去便踈散逢人嬾送迎

贈皎上人

破衲和雲看何時下赤城高年頭未白得道骨全清詩思  
秋空潤禪心夜月明何當捐世事來結遠公盟

王直翁相過

芒鞋朝踏雨來自赤城山久別翻生面相看各老顏開樽

茅屋裡煮茗竹林間此去須榮遇寧愁行路難

鴛鴦梅

孤花忽撫嫵媚並蒂占春陽自有雙成意全勝姑射粧月  
溪同浴影雪樹共棲香玉笛頻吹處交飛落野塘

王琴所話別

羈懷不可述賴有古琴知客舍相逢日江楓正落時夕陽  
村店酒秋色野橋詩別去吳江上悠悠動遠思

除夕即事

除夕無詩侶燈窓酒獨斟三更風雪夜一片歲寒心衰老  
常憂病清閑不廢吟明年朝八十晚景惜榆陰

王可交昇仙臺四首

臺在青龍鎮南

人去臺猶在飛昇事可嘉神仙多變幻塵世總虛花煉氣



顏雖老勞心鬢已華  
千年留亦古跡題詠屬詩家  
異人鍾秀氣草木亦精神  
見說為漁父誰知悟道真  
仙家多勝景世路有迷津  
安得騎黃鶴相隨入昊旻  
仙翁不可見惟有一空亭  
地冷春留雪林深晝見星  
松篁團秀色蘭蕙吐幽馨  
立盡斜陽影閑看鶴刷翎  
我來閑吊古觸景覺淒涼  
踏石雲侵履捫蘿露濕裳  
森森林木茂馥馥野花香  
寺近尋僧話譚禪坐竹床

冬夜即事

獨寢書窓下其如寒夜何  
頭邊枕黃妳脚底踏湯婆  
紙帳梅花冷暖布衾春意多  
道人無妄想夢不到南柯

寄友人

相望咫尺地久不到蝸廬室  
迎人何處心親迹甚踈  
交遊

常念舊情意只如初我欲携囊去相逢勝寄書

偶書

老來驚歲晚愁裏度年華  
雲凍天將雪山寒樹未花  
晚窓留客飯午寺覓僧茶  
歸路江村暝行行及暮鴉

孤雁

長空獨嘹唳隱約背斜暉  
塞北離群遠江南失歸侶  
歸度雲憐隻照水認隻飛  
却羨投林鳥相呼入翠微

呈曾蒲澗提刑

乃茶山後人茶山曾以活字詩授陸放翁

詩自茶山後如公世所稀  
特來叅活字應肯授玄機  
寒澗孤芳老秋雲獨鶴飛  
台山千萬丈望望未能歸

和茅亦山韵二首

一生場屋夢老去付悠悠  
始信功名事難將智力謀  
有才



如孔孟無命不伊周吾道今如此蒼天可問不  
愛靜吟成僻耽書近欲癡事多因錯省節不為貧移長物  
新添畫生涯舊有詩窮通係天命知命復何疑

題嚴子陵

故人雖即位自不願為官天下事已定山中人可閑一絲  
江月色千古客星寒捷徑終南士聞風定赧然

除夕

爆竹驚殘臘冬春此夕分且斟分歲酒嬾賦送窮文客思  
思愁簷雨鄉心逐海雲陽和在何處明日問東君

和鄭梅溪

有錢塘十詠

江湖新識面恰似舊相知腹貯三餘學才工十詠詩聲名  
蘇太史家世鄭當時客路携琴去終須遇子期

即事

雀羅門戶靜無客扣柴扃索句髭先白看書眼尚青雲粘  
題石壁月浸汲泉瓶笑殺利名客沈酣死不醒

對客

牕下篝燈坐相看白髮新共談為客事同是異鄉人詩寫  
梅花月茶煎穀雨春明朝愁遠別離思欲沾巾

寒夜呈梅深

空齋對孤客寂寞似僧家爐冷頻燒葉燈昏不吐花夜長  
添睡思歲晚憶年華吟倦推窓坐梅簷月未斜

林霽山架閣同宿山中

秋風山館客移席近汀前共語忽深夜相看非少年斗垂  
枳樹鱗出雨餘天亦有茆簷下飯牛人未眠



遊東庵

庵連兜率寺三徑竹間開  
林密暑不到窓虛月自來  
暮山啼鳥靜雲樹嘯猿哀  
拂拭殘碑字年深半綠苔

贈了上人抄化

破納卷秋雲入山深更深  
近聞營梵刹應不累禪心  
寒瀑瀉蒼壁晚花生古林  
遙思明月夜誰聽穎師琴

呈毛一齋先生

前輩彫零盡如公尚典刑  
為僧眉獨白見客眼長青  
教子成三晉俊傳家有六經  
我來聞問竒字應許扣柴扃

別徐敬菊

契濶又兩載光陰一擲梭  
祇回離別久不覺語言多  
安得留此其如欲去何詩盟  
終未冷早晚更相過

寄姜仕可

獨學苦無友年來媿廣文  
懷賢歎伐木憶別賦停雲  
病後少出戶夢中多見君  
盍簪須有日却與共論文

歲晚書懷呈月山太守

光陰催我去衰病亦堪憐  
殘臍不多日餘生能幾年  
有為俱是妄無事即成仙  
近得安心法蒲團學坐禪

鶴林仙壇寺

古堦歸鶴杳野鹿自成羣  
嵐氣浮清曉鐘聲出白雲  
樹穿僧屋老水到寺門分  
人世窮事山中了不聞

枕易

越中詩社試題都魁

古鼎烟銷倦點朱  
脩然高卧夜寒初  
四簷寂寂半床夢  
兩鬢蕭蕭一卷書  
日月冥心知代謝  
陰陽回首驗盈虛  
起來



萬象皆吾有收拾乾坤在草廬  
考官李侍郎應祈批詩題莫難於枕易自非作家大手  
筆詎能模寫蓋以其不涉風雲雨露江山花鳥此其所  
以為難也予閱三十餘卷鮮有全篇純粹正如披沙揀  
金使人悶悶忽見此作若紛紛盆盎中得古壘洗把玩  
不忍手此詩起句倦字便含睡意額聯氣像象優游殊  
不廢力費曲盡枕易之妙預朕冥回首四字極其精到  
結句如萬馬橫奔勢不可遏且有力全篇體製合法  
度音調諧宮商三復降歎此必騷壇老手望見旗鼓已  
知其為大將也冠冕衆作誰曰不朕

棋聲

何處仙翁愛手談時聞剝啄竹林間一枰子玉敲雲幾

度午牕驚夢殘緩著應知心路遠急圍不放耳根閑爛柯  
人去收殘局寂寂空亭石几寒

題李藍溪梅花吟卷

孤芳不與衆芳同肯媚東君事冶容寒苦一生蘓武雪清  
風高千古伯夷風瓊瑤照樹偏宜晚鏡石盤根却耐冬幾  
度看花立霜晚斷腸都在角聲中

秋夜

博山香冷夜將闌紅影搖牕燭未殘庭樹露濃花氣濕井  
梧風老葉聲乾世情冷暖知心少朋舊東西會面難一段  
客愁吟不就無言背月倚蘭干

秋夜和月山韻

任月山人也

寒夜殘燈照客愁衾單添盡鷓鴣裘半窓明月三更夢一



枕西風兩鬢秋吟骨棱棱寬帶眼歸心切切望刀頭何如  
東篋家山去獨駕柴車訪伯休

蘭亭會飲觀晉帖

祇說清談晉業虛禊亭此樂後來無一時人物已陳迹干  
古山林空函圖鐘帶夕陽未遠寺碑和春雨卧平蕪昭陵  
玉匣猶難保筆意從誰認鼠鬚

春游次王脩竹監簿韵

天色新晴帶薄寒主人領客出城關蘭亭觴詠尋羲帖空  
石衣冠弔禹山春水斷芳草碧曉風啼鳥花開囊中詩句  
壺中酒何必仙人大小還

脩竹宴客東園

二月韶光潑眼濃携樽宴客小亭東酒當半醉半醒處春

在輕寒輕暖中拂檻柳添吟髻綠壓闌花妬舞衣紅晚來  
聽唱梁州曲聲繞吳姬扇底風

送張伯威提舉

人生聚散等浮漚憶昔過從與勝遊棋局敲殘清夜月菊  
花吟老半窻秋客中送客難為別山外看山捲是愁回首  
片帆江路遠疎烟斜雨到西州

春日即事

園林芳事漸闌珊客思無聊午夢殘紅杏花繁蜂窠飽碧  
芹香老燕泥乾光陰有限髮已白勲業無成心尚丹倚徧  
吟闌天欲暮一簷風雨捲春寒

小酌

小酌園林酒半醺落紅影裏惜餘春插花歸去蜂隨帽傍



行來鶯避人白髮尚為千里客黃金難鑄百年身何時歸  
賦滄水流我征衣萬斛塵

城南即事

支節破曉出南城古寺淒迷草自生  
幾處亭臺空鎖鑰百年人物盡丘塋  
雕梁燕語應無主廢圃殘花自有情  
世事轉頭皆夢境浮生何用苦營營

夜坐次林梅山韻

人倚幽窗夜未闌竹爐灰冷篆烟殘  
一天露氣星辰濕  
風聲草木寒老去客懷多感慨  
年來世事轉艱難何時歸  
隱孤山下明月梅花約共看

有感

自嘆文章不遇時平生壯志與心違  
十年湖海無家住千里

鄉關有夢歸殘月夜寒燈暈淡高秋天  
澗雁聲微傷今思  
古愁無奈老淚斑斑濕客衣

生朝自述

都道人生七十稀老逢初度歎衰遲  
飛觴醉月貧無酒走  
筆吟春富有詩憔悴自憐蒲質柳劬勞  
空起蓼莪思門無  
賀客清如水獨對蘭花課楚辭

雪

片片隨風整復斜飄來老鬢覺添華  
江山不夜月千天地  
無私玉萬家遠岫未春飛柳絮前村  
破曉壓梅花羔羊金  
帳應粗俗自掬冰泉煮石茶

九日客懷

烏帽斜欹白髮侵老來空憶舊登臨  
一枝黃菊西風淚數



鈔本  
酌蒼苔故國心梧顛秋聲庭露冷雁傳寒信塞雲深不須  
貴酒酬佳節只把陶詩細細吟

舟次樗蒲廟

短棹寒過浦東扁舟一葉載詩翁斷烟流水殘雲外古木  
荒祠夕照中吟罷小樓何處笛酒醒孤枕半江風潮生潮  
朝還暮堪歎人生自轉蓬

月夜登樓

玉宇澄清暮靄收吟邊怕倚仲宣樓寒蟾千里夜如晝新  
雁一聲天欲秋湖海誰青豪傑眼風霜易白少年頭更殘  
忽聽荒城再吹老梅花總是愁

送慈川茅主簿入道

儒冠不戴戴星冠人世榮華作夢看譜出三茅終得道趣

同五柳早休官月寒緜嶺來笙鶴春靄慈川憶枳鸞咲指  
方壺最深處凌空霞珮玉珊珊

月夜次脩竹韻

徙倚吟闌傍野塘古譙蓮漏滴更長月堦夜靜蛩聲切竹  
院秋深鶴夢涼坐挹水風侵袂冷眼分花露滿身香浩歌  
欲向明河去醉喚天孫織錦囊

寓浦東書懷

子規聲裏已非春消遣光陰只苦吟肘後無方醫白髮牀  
頭有易勝黃金年來不作功名夢老去全灰富貴心獨抱  
焦琴遊海角紛紛俗耳少知音

呈營田司杜希聖提領

行李擔書一鶴隨蓮香幰幕政聲馳山川太史九州記桑



稼函風七詩如晦箕裘傳相種少陵衣鉢付孫枝謀身儒術誰云拙堯舜君民正此時

寄毛素軒宣慰  
旌麾曾駐鑑湖邊別去匆匆又兩年清夜夢分千里月同鄉人各一方天素知心事有鷗在欲寄音書無雁傳見說使星來浙右明朝便買渡江船

酒趣  
濁醪妙理契心期小甕新筍香滿卮閑裡一生長是醉飲中三昧有誰知幕天席地形忘處枕麪眠糟得意時此味靈均應未解獨醒到死欲何為

愁懷  
雨裡西風已倦遊老懷悲感不禁秋世無阮籍誰賸清今有

杜陵人白頭雁擺擺行知兄弟義燕營巢為子孫謀誰憐湖海飄蓬客隻影孤燈相對愁

偶書

頻年踪跡墮湖江三徑苔荒憶舊廬身老方知生計拙家貧漸覺故人疎松薪拾去朝炊黍漁火分來夜讀書怨鶴驚猿應待我台山何日賦歸欵

觀史

梧風蕭瑟雨初晴涼入書堂夜氣清耿耿蘭膏照千古遲遲蓮漏轉三更力於興廢難助氣為忠邪幾不平掩卷長嗟方就枕窓前呶喔又雞鳴應

暮春

寂寞園林三月時客中幾度見春歸柳眉綠顰鶯無語花



臉紅銷蝶嬾飛節物晴催髮老功名長與寸心違百年  
身世成何事回首西山又落暉

對月  
萬里無雲天宇寬十分秋色上樓看月浮滄海蟾光濕星  
落明河象緯寒醉後儘教詩筆健吟邊莫放酒杯乾一聲  
長笛知何處愁殺夜深人倚闌

秋夜

十分秋色滿軒窗景物淒涼清夜氣涼篩月簾櫳金瑣碎  
搗霜砧杵玉丁璫井梧葉脫無多影巖桂花彫不斷香坐  
到更深吟興動研池滴露寫詩狂

寓舍即事

矮屋編茆槿縛籬詩人住處恰相宜萬間突兀夢不到一  
室淒清心自知窓下無燈童睡早林間有鶴月歸遲八荒  
便作庭除看南北東西任所之

書懷奉簡若提舉

十年湖海歎飄零晚景投閑百念輕看水看山真有味學  
書學劍恨無成竹風吟曉詩情動梧雨敲秋客夢驚老傍  
人門非久計不如歸去學淵明

登寶飛來峰

有井通海在塔下龜公墓越王臺在側

乘風飛步碧崔嵬萬壑千巖入眼來古甃直穿滄海破浮  
高拂白雲開龜公埋沒今無塚烏喙登臨舊有臺立盡斜  
陽欲歸去一聲孤雁過蓬萊

題吳實齋北山別業

北山佳景勝南山乘興登臨眼界寬樵斧伐雲春谷暗漁



柳敲月夜溪寒一區池古林泉勝四面天開圖画看竹屋  
數間塵不到主人日日凭闌干

書館

池館深深鎖翠涼課餘多暇日偏長屋連湖水琴書潤窓  
近花陰華研香吾道尚存貧亦樂客身長健老何妨十年  
心事閑搔首厭聽蟬聲送夕陽

依綠亭

數椽瀟灑瞰清漪蕩漾煙霏欲濕衣闌角寒光搖翡翠簷  
牙倒影浸琉璃荷邊鼓瑟游魚聽柳外敲棋睡鷺飛洗盡  
紅塵青眼客臨流何惜賦新詩

秋思

天容凝碧換秋容殘暑冷然一洗空梧葉多應愁夜雨葛  
衣漸覺怯西風十分冷淡砧聲外一片淒涼雁影中興動  
尊鱸欲歸去季鷹心事恰相同

題四暢園

四暢園中四散人藤床對坐遣閑情搔頭真有爬梳態搗  
鼻應無噴嚏聲捫蝨未聞談世事撚鬚元不為科名一時  
快意皆真樂誰把丹青寫得成

登寶林塔

屹立浮圖可摘星吟邊喜與客同登闌干六曲又六曲梯  
級一層高一層極目江山無礙障著身霄漢欲飛騰雁來  
疑是題名處拂拭殘碑問寺僧

偶述

漂泊江湖祇自憐人生窮達信關天老難干禄灰心矣貧



不求人氣浩然五斗豈能留靖節  
六歌亦足樂顏回淵客  
來問我生涯事閉戶開書對聖賢

涼夜即事

涼入虛堂睡思濃夜深剪盡燭花紅  
光搖珠箔梧桐月香  
透紗厨茉莉風欹枕覺來人不寐  
撚髭吟罷句難工小蠻  
問我詩成未詩在池塘草夢中

次月山少監客京韻

匹馬撓春入帝京秋深猶未問歸程  
一書不及因風寄千里空教共月明  
霄漢已隨黃鵠舉家山應負白鷗盟  
便須了却封侯事衣錦歸來客亦榮

聞角

誰角吟鳴到枕邊邊情似向曲中傳  
梅花三弄月將晚榆

塞一聲霜滿天織錦佳人應有恨  
枕戈老將想無眠爭如  
二月春風市賣酒頭樓聽管絃

舟行送王琴所之湫川

晨星寥落曙光浮柳岸風輕送客舟  
萬點遠山重叠恨一  
江流水淺深愁淡烟茅店家家曉  
白露楓林處處秋獨倚  
蓬牕還自笑此身漂泊愧沙鷗

寄峽山胡府判

鑑湖狂客又西湖筆硯生涯計已迂  
五斗自慚腰不折四方得口能餬家  
山迢遞鄉心遠燈火淒涼客影孤  
莫悞風前看落雁尺書還肯寄來無

送姜仕可去館

行止非人可預謀愛君無計與君留  
張儀失策猶存舌穆



傳知幾可掉頭黯黯別懷江路晚蕭蕭行李驛亭秋明年  
我亦携書去不落人間第二籌

梅龍

孤根蟠屈浸冰湖蜚裡陽和散朽枯雪樹鱗封寒水玉月  
梢頷吐夜明珠暗香吹冷龍涎濕踈影涵清蛻骨癯安得  
華光葉公筆共描橫水卧雲圖

江湖佛觀

環峙山川秀氣鍾人煙樓閣鬱重重潮生潮落東西浙雲  
去雲來南北峰海曙扶桑紅影濕堤春楊柳綠陰濃子胥  
已遠岳侯死斗酒聊澆磊塊胸

隨隱為祝南山賦

蹤跡何拘似白雲不尋丘壑避紅塵田堪耕稼即莘野水  
可釣魚渭濱無礙滯心寧擇地有幽閑處便容身一節忽  
入青山去豈是終南捷徑人

春日郊居

卜築幽居慰寂寥數椽茆屋傍江郊庭前滕薛筍爭長籬  
下陳雷蔓結交杏圃花香蜂課蜜芹塘泥暖燕營巢山窻  
對景渾無事吟得詩成手自抄

偶書呈王脩竹

琴心不復寄松蘿賀鑑湖邊水自波晚節黃花秋思淡夕  
陽紅樹客愁多何時歸鶴招丁令有意逃漁侶志和不管  
白頭烏帽落西風一曲付狂歌

寄鄣樞山

起敬英聲亦有年酒邊曾見錦囊篇吟情六義初刪後古



意三爻未畫前放曠嗣宗應絕俗清狂太白不妨仙如今  
海內無工部誰肯題詩寄鄭虔

燈花

簇生元不假栽培一點春從午夜回自喜結根依小草不  
愁飛片點蒼苔螢螢有艷蠶頻撲淡淡無香蝶不猜牕下  
敲棋紅燼落更深約客未曾來

樂道

門掩荒苔客到稀閑情已與世相違胸中宇宙自然景眼  
底江山不盡詩雲淡風輕皆道體鳶飛魚躍搃天機吾心  
與物同真樂此處寧容俗子知

次毛一齋韵

詩夢驚殘何處棋書窓又是夕陽時柳陰分綠籠琴几花  
片飛紅點研池覽鏡自憐添白髮傳盃不復倩蛾眉東風  
故國年年恨唯有啼春杜宇知

寄月山少監

一片襟懷海樣寬眉頭肯為別離攢臂鷹慣識從君樂汗  
馬寧辭行路難角帶邊聲關月冷雁傳鄉信塞雲寒歸未  
未許東山卧見說蒼生望謝安

送文正公遺像與王東廬

古畫來從寶繪堂遺君敢惜舊珍藏貌存故國三公貴澤  
衍來孫百世芳家廟幾年成闕典宗支此日倍增光當時  
種德根苗遠分得槐陰到鶴鄉

遊西湖次毛玉田韵

觸目錢塘昨夢非行春載酒憶當時花間不碾香輪入柳



外空鞭駮馬飛落日荒山和靖墓斷雲流水子胥祠忘情  
鷗鷺閑干我應笑江湖未盡歸

故國有懷呈任子宏提舉

十年不作還家夢荒草深深鎖竹扉無主落花隨水去有  
情啼鳥勸人歸儒冠寥落風流減客路淒涼故舊稀何日  
携琴賦歸去踏雲自採故山薇

寒夜即事

倚徧闌干更漏長柔髭撚斷為詩忙清芬梅影夜宜月寒  
入雁聲天正霜懷古頓添孤客恨追憶難學少年狂讀書  
寔下篝燈坐一卷雜騷一篆香

謝章平惠筆

管城二子樣尖新分惠山房勝與金淮兔拔毛誇匠巧魯

魚正字見功深抄書未得纖毫力握管難忘一寸心揮翰  
玉堂無夢到雅宜茅屋寫清吟

龍江館舍

幽棲俗事不相關家在青松翠竹間遠屋四圍都是水隔  
林一片不多山詩篇陶寫清秋景書冊消磨白日閒門外  
沙鷗如舊識忘機飛去又飛還

元日

睡眼朦朧撐不開雞聲唱曉夢驚回竹爐尚有殘冬火栢  
酒初斟新歲杯身世百年如夢幻功名兩字已心灰門無  
賀客清閑甚自汲寒泉汲古梅

俞景仁教諭相遇

江雲舒卷弄陰晴新綠園林似染成花怯曉風寒蝶夢柳



愁春雨鶯濕散栖遲茅屋無塵事深閉柴門遠俗情佳客  
相遇慰岑寂酒邊閑把近詩評

脩竹有樓名與造化游對秦望山五雲門

秦望諸山隱几看仙居縹緲五雲端天高地迴三千界月  
白風清十二闌滄海氣浸珠珮濕明河影逼玉簫寒造然  
身在鴻濛上何必蓬萊跨紫鸞

脩竹宴客廣寒遊亭分韵得香字

銀橋疑駕海天長金粟離離照玉觴影浸山河瓊殿冷舞  
分風露羽夜香衣亦知廣莫元無野却笑溫柔别有鄉閑  
折一枝驚昨夢素娥憐我授玄霜

酒邊呈張景純能画山水

蓬萊閣上咲談餘別後思君看画圖萍水相逢俱老矣家

山自好盍歸乎清風一榻莊周蝶明月扁舟范蠡湖此是  
達人真樂事客中何必歎窮途

江上客懷

鏡裏從渠白髮添吟邊抵掌復掀髯十年為客甘清苦一  
枕忘情付黑甜短褐怯風綿未絮破窓漏月紙重粘梅花  
應念人孤寂寒夜吹香入竹簾

夜坐

香篆煙銷夜氣清篝燈開卷遣閑情半窓月落梅無影三  
徑風來竹有聲樂道何須圖富貴讀書元不為功名白雲  
滿榻便高卧欹枕詩成夢不成

輓衛山齋

楹夢驚殘忽告終儒林多士失宗工雲間便覺無清氣江



上誰能斷古風蕙帳夜闌孤鶴怨  
為豈私情哭哭痛君亡吾道窮

武公後裔有仍孫德望才名世  
所尊擬向山中專註易忽  
傳地下趣脩文月樓不復賡詩句  
春閣猶思共酒樽痛恨  
死生千古隔西風吹淚濕秋雲

送任子敏司丞赴北

鞭影拖雲入帝京少年正好作功名  
不辭驛騎三千里欲  
奮鵬搏九萬里程白玉堂中揮翰墨  
黃金臺上被恩榮何  
須折柳送行色只寫詩篇話別情

和俞教授見寄韻

天邊日月似梭飛百歲光陰難預期  
有酒不妨留野客無  
錢何惜典春衣江山猶記登臨處  
身世都非少壯時晚景

清言宜學道黃庭一卷究玄微

任後魚池上有瑞蓮命予賦之

芙蓉開處傍池亭花結雙頭媚晚晴  
兩隗駢肩如欲語二  
喬並首似含情同心淨植真奇種  
聯蒂騰芳以瑞名若使  
漁溪當日見愛蓮有說恐難評

監

同絺入貢載遺經分賜羣臣羨水晶  
潤下作醎從海產熬  
波出素似天成享神潔白惟形似富貴  
珍奇以寶名此物  
方為可相事他時商鼎用調羹

餅筍

熱中竟日自煎烹音調都從一氣生  
緩緩煮湯方蟹眼微  
微聒耳忽蠅殼頻驚清夢愁無寐似  
訴羈情歎不平却笑



書生那解此聯詩石鼎羨彌明  
和書懷

杜門已與俗相違苔徑荒涼轍迹稀  
自愛清涼忘世慮肯  
富貴役心機  
隱居盤谷勝金谷耐著麻衣鄙錦衣  
百歲光陰皆夢境且看走兔與鳥飛

和杜柳溪韻

安貧樂道豈卑微肯羨黃金帶  
十圍爵到三公今却有齒  
踰七十秩古來稀滿頭霜雪客懷老  
過眼輪是非皎皎白駒在空谷  
好賢誰復詠緇衣

布金潤玉隱廢寺閑居

梵刹當年聚衆叢林深處著禪局  
金沙布地階無土玉軸堆函藏有經  
雲樹千尋張翠蓋烟蘿一片展青屏  
星移物

換今寥落古寺猶存栢子庭

和葦廬韻

地僻渾無車馬喧禪房脩飾稱居安  
莊嚴固是由心造丹  
艘多應被眼瞞佛法不須身外覓  
世緣只作夢中看我來  
欲問無生話萬頃西江一吸乾

偶成簡任肅齋教諭

百年光景易侵尋消遣閑愁苦  
只吟但覺筆頭風雨濕不  
知鬢底雪霜侵冥鴻已負九霄志  
老驥空懷千里心富貴  
倘來應有命何須彈缺扣知音

百歲光陰一轉蓬晚年不與少年同事  
回錯處人方省詩  
到窮時句始工獻賦未逢楊得意  
憐才難遇杜司空有時  
追憶承平事猶道繁華是夢中



貧病交攻久廢詩蕭然一室獨棲遲酒錢已盡琴將典瓶  
粟無儲鶴亦飢豪傑不多陳仲舉結交惟欠魏無知葷瓢  
鐘鼎都休計畢竟窮通各有時

奉謝月山太守

太守相過慶誕辰貴能下賤見公心行厨鼎列雙魚美衆  
客咸瞻五馬臨曲唱駱駝誇白雪盃傳鸚鵡擁青衿寵頒  
束帛尤增感恩與滄溟一樣深

夜坐即事

霜氣侵寒冷客羶青鏡白髮老堪憐先陰明日又明日世  
事一年難一年眼底江山元似舊胸中風月本無邊道人  
不作陽臺夢紙帳梅花伴獨眠

和茅亦山先生雜詠

風柳吹花糝白粘鶯愁蝶恨有誰憐不知春事又三月堪  
笑人生無百年清氣長留詩卷裡閑愁不到酒樽邊山窻  
晝永渾無事一榻分雲枕易眠  
身世飄浮水上蓬閑中清事有誰同吟憲夢草添詩料画  
筆生花奪化工酒後烏烏時擊缶愁來咄咄自書空園林  
寂寞春何處春在桑麻雨露中  
破硯塵封懶賦詩晚年才思覺衰遲耽書自咲已成癖煮  
字元來不療饑風月滿懷  
寫雪霜侵鬢鏡先知太公八  
十方榮遇把釣溪邊更待時

端午月山主人酒邊即事

憲外葵榴照眼明香滿沁酒注銀瓶自無量飲堪同醉非  
獨清名傲獨醒一日沈湘悲楚客千年吊古讀騷經他鄉



記節聊隨俗艾虎殊符挂戶庭慕  
時序催人易白頭端陽懷古客添愁殊符不寫累恨角黍  
難包楚國羞記節何妨斟蟻酒奪標無復見龍舟高歌思  
遠樓前路掩雨珠簾今在不湘

寄謝蔡松江路教

一別丰標又一旬尺書多荷寄殷勤交游滿眼誰知己契  
濶關心獨憶君蕙帳夢寒同夜月松江人遠隔秋雲明朝  
便買扁舟去來訪貞陽舊廣文

和杜柳溪韻

白髮垂垂一老夫年來漸覺世情疎石床夢冷和雲卧  
屋燈殘共月居客至何妨賒魯酒家貧不肯典唐書羨君  
種柳清溪上借我苔磯學釣魚

和茅亦山秋感懷

老來吟拙自知羞好景無詩未易酬湖海愁看今夜月功  
名虛度十年秋清光偏照廬同屋孤影自登王粲樓我欲  
乘風蟾窟去安能與世共沈浮

茅亦山相過

故人過我竹邊居譚咲從容樂有餘洗盞共嘗春甕酒挑  
鐙對讀夜憲書歸來尚憶淵明菊高卧誰知諸葛廬醉後  
達觀今古事寥寥千載只須臾

上廉訪分司

行部巡荒察吏奸皇皇使節古刑官聲搖天上星辰動清  
過雲間風露寒肅政嚴持三尺法卹民特放十分寬香名  
已覆金甌底便作他年宰相看



和鄭樞山竹夫人韻

玉環傾國起胡兵，有色終污後世名。九夏專房何在貌，一身空洞若為情。寵名本自無心得，婦節從來徹骨清。愁見嬈妍秋後扇，共懷幽恨幾時平。

斑竹夫人

汗清書墨沁微涼，李衛曾携近竹床。眼孔盈盈看熟客，泪痕點點泣秋房。湘紋冷淡宜湘簟，玉斝玲瓏稱玉郎。秦虢疏封無夢到，傍人空以睡為鄉。

遊虎丘山寺

浮生偷得片時閑，古寺尋僧借景看。樓閣倚雲山氣濕，輓撻水澗聲寒地埋吳。劍痕猶在碑刻唐詩字，未漫寄榻禪房不知曉。起來松日已三竿。

賈秋壑圃

不學蒼龍卧浙東，驚風吟珮墮青瑢。既無長策安江左，空有名園似洛中。危棧連雲晴亦雨，飛樓近海夜生風。人間富貴皆塵土，回首吳山落照紅。

聞鶴

寒蟾初上海雲收，何處仙禽過庾樓。清夜照人千里月，碧霄警露一天秋。玉笙縹緲緱山去，羽袂蹁躑赤壁游。回首女墻舊時事，千年華表動新愁。

和毛宣慰蓬萊閣韻

傑閣翬飛翠靄間，蓬萊元不在人寰。綠圍城廓千村水，青遍簾櫳四面山。華表鶴歸遼海遠，高臺鳳去夕陽來。倚徧闌干月雲鎖，重門夜不關。



送張按察移節江陵

滿載琴書事宜游皇皇使節重咨諏蒲帆風飽三千里綉  
斧霜寒十六州荆渚行觀新德政越人共憶舊風流市橋  
衰柳難攀折只拘梅花送去舟

次鄭朴國正見寄

雲潑紅日出林遲晞髮簷前力未衰老愛歸追靖節狂思  
入海訪安期春風巷陌楊花後故國江山杜宇時一種閑  
愁無着處倚窗重讀寄來詩

漁舍觀梅寄脩竹韻

寒雲漠漠護塘陰瀟灑梅枝出竹林落影荒磯和雪釣香  
浮老瓦帶春斟幾憑水驛傳芳信祇許沙鷗識素心回首  
孤山千樹遠扁舟乘興夢中尋

贈大禪寺昉上人

佛屋參差傍水涯天然富貴屬僧家油幢碧立當軒竹步  
障紅圍繞檻花隱隱磬聲春晝永亭亭塔影夕陽斜白頭  
道者留連客自汲山泉煮石茶

贈通玄觀唐道士竹鄉

通玄道士苦脩行坐見桑田幾變更雲屋苔封燒藥竈風  
林花落煮茶錯休糧勝有青松啖卻老應無白髮生月滿  
竹鄉騎鶴去欲邀子晉學吹笙

夜宴

醉月飛觴興未闌蓬壺影裏漏聲殘碧浮金罍香脂暖紅  
閃銀臺燭泪乾豔曲喜聽攤催拍近狂歌自覺入腔難賞  
心樂事輸少一點閑愁了不干



隱居

編笈卜隱讀書林門掩蒼苔一徑深當戶曉山長識面臨  
窓夜月獨知心花圍錦綉翻紅影竹列琅玕舞翠陰別是  
一般清富貴何須滿塢積黃金

見梅

孤根偷轉一分陽枝北枝南次第芳照冰曉妝冰鏡冷橫  
空雪樹凍雲香未成林實調金鼎先占春魁伴玉堂因憶  
西湖林處士年年覓句為伊忙

輓任宅雲

方擬柴除上玉堂玉樓有召返仙鄉才過賈誼同年少齒  
長顏回一歲亡師友交情從此絕生死異路寔堪傷雲邊  
宅在人何在腸斷西風淚幾行

寄王愛梅

塔下開館

諸生歸去暮庭空塔下遊觀倚瘦筇千尺寶輪擎海月七  
層金鐸話天風升堂儘可同僧飯持鉢何須聽寺鐘好把  
新詩舊壁他年應有碧紗籠

送人歸洛

白眉公子氣昂昂年少多才姓氏香腹飽儒書宗孔孟心  
傳醫學祖岐黃秋亭聽鶴游吳會春館看花憶洛陽老我  
自憐身是客江湖又送客還鄉

上李承旨學士三首

儒林學海老宗師每恨聞名識面遲一部山川司馬記百  
篇風月謫仙詩玉堂揮翰思當日金鼎調元定此時抱負  
大才應大用行看事業邁周伊



表表聲名動縉紳金鸞奏事舊詞臣胸中千古淵源學天  
下十分端正人猶記演綸依日月行看聽履上星辰枝南  
枝北雲山異何日振衣拜後塵  
中朝人物搃稱賢恬退閑居又幾年獨抱丹心長戀闕因  
思綠野且歸田未應雋執淹東魯行看文星照北燕見說  
君王思國老鶴書即下九重天

寄月山少監

南北相望各一天江湖久別思凄然迢迢道路三千里倏  
忽光陰五六年清節立朝君可羨白頭為客我堪憐折梅  
難寄江南信惟有新詩數十篇

哭劉月邨

交游惟子獨相知此老天乎不憚遺行輩彫零已益友文

風寥落失儒師在生曾與傳遺像臨死猶能寄別詩月落  
邨空人不見傷心千古隔幽期  
三山秀氣孕英奇表表才名冠一時唐殿策高第荆  
州人去祭何依傳家有子猶堪羨埋骨無山亦可悲留得  
帚金詩稿在燈窓讀罷淚沾衣

和仇山村九日吟卷

暮秋景物覺荒涼觸景凭高遡杳茫歸隱清如陶靖節苦  
吟瘦似沈東陽煙橫晚浦蒹葭碧霜落寒林橘柚黃追想  
故宮當日事賜奠宴罷謝君王

寄錢竹深

夢斷膏梁記幾年捨身事佛絕塵緣把茅蓋屋孤峰頂片  
衲蒙頭萬竹邊支遁才高交杜老參寥詩好動蘓仙何當



盡棄人間事特地來參一擊禪

見天地心 松江府學題

乾坤主宰妙難窺識破端倪便可知陽動於陰分太極剥窮必復露真機化工自有經綸處生意元無間斷時萬象皆春從此始參細義畫究精微

白雁

征鴻素縞過南樓衣褐同羣鴛與儔雲外排行分玉李天邊印字帶銀鈎高飛遠塞疑雲鷗低落平沙類雪鷗夜月蘆花無認處惟聞嘹唳數聲秋

即席和衛山齋韻并呈顧淵白路教

燭夜飛觴客在山同看明月上雲端粘天水濶蟾光濕捲海風高蜃氣寒會友幸逢三益在娛情休恨四并難座中

喜有能詩者便作唐詩願況看

梅魂 武林試中

夢覺羅浮迹已陳至今想像事如新相思一夜窓前月似見三生石上春的一孤芳永氣魄疎々冷蕊雪精神料應楚些難招至欲倩花光為寫真

甲子歲旦

天開正旦宿雲收宇宙陽回和氣浮裁換上元新甲子時同太古舊春秋朱顏不逐年華改清思惟從造化游栢酒滿斟吟興動題詩記節自賡酬

絕句

書懷

萬卷詩書千古事一燈寔火十年心功名夢斷身無用閑



補離騷學楚吟

偶成

淵明覺是新愁少  
白玉知非舊恨多  
畢竟是非皆一夢  
百年夢醒事何如

暮春

芳事闌珊三月時  
春愁惟有落花知  
柳綿飄白東風老  
一斜陽叫子規

書燈

書幌低垂風不來  
蘭膏花燭夜深開  
別殘猶有餘光在  
一點丹心未肯灰

海棠

臉暈輕紅酒力微  
真妃半醉夜時歸  
杜鵑叫落花稍月  
獨倚

東風睡不知

春陰芍藥

點滴簷聲濕  
徑雲翻階紅  
藥帶啼痕可憐  
花片都零落  
雨露雖多不是恩

芭蕉

翠葉離披傍竹林  
幾年雨露受恩深  
綠章封事今無用  
空對西風抱赤心

聞角

誰送寒聲入夢中  
遙知人在戍樓東  
明朝梅嶺花飛雪  
未必都因昨夜風

酒家

風颭青帘出杏林  
行人未醉甕頭春  
安知滌器茆簷者  
不



是相如行輩人  
贈醫者花道人

藜杖橫肩過竹扉  
半挑藥籠半挑詩  
笑予盤礴山雲裡  
泉石膏肓作麼醫

漫述

百拙懶營生計事  
一貧方識丈夫心  
簞瓢陋巷皆真樂  
何用多藏鄙鳩金  
青春易過不多日  
白晝得閒能幾人  
有限光陰空役役  
堆錢難買百年身  
對客莫談當世事  
閉門且讀舊時書  
蓬萊獻賦心猶在  
只恐無人薦子虛  
楚江何忍沈清客  
周粟安能活餓夫  
慨想前修千古事  
孤

忠高義後來無  
逢人休要說公卿  
老去無心慕寵榮  
李不封侯劉不第  
千年青史亦傳名  
世事艱難如意少  
功名榮耀誤人多  
浮雲富貴非吾願  
且買扁舟理釣簑  
脫巾漉酒心先醉  
看屐登山脚便輕  
浩飲清遊憶陶謝  
古人千載尚留名

眼前萬事皆一夢  
世上幾人能百年  
千古英雄今已矣  
北

印荒塚草芊芊  
文盟無主江湖冷  
詩社欠人風月閑  
老去盍為歸隱計  
却於何處買青山

烘柳日高花院暖  
炷沈烟冷竹窻虛  
閑編怕見傷懷事  
不



讀離騷讀四書

一春

新綠園林雨過時黃鸝無語恨春歸楊花怕逐東風去搭  
住闌干不肯飛

花心醉日蝶先覺柳眼窺春鶯未知景物繁華易凋謝一  
春消得幾番詩

江上

江上支筇眼界寬夕陽影裡水雲寒憑誰說與閑鷗鷺借  
我漁磯把釣竿

送筆與各菴和尚

恨殺毛錐久不靈特分二筆到禪局難書八萬四千字只  
寫多心一卷經

梅菊

菊清獨占風霜國梅白偏宜雪月天晉宋後來愛花者豈  
無靖節與逋仙

江景

寒生雁背天將雪冷入魚腮水欲冰釣艇歸來江路暝舟  
人分火點漁燈

聽雨

老來已覺此身閑近日唐詩亦懶看半榻白雲眠聽雨一  
窻簾影隔春寒

暮春

東風庭院夕陽天恨綠愁紅又一年春自要歸花自落莫  
將芳事怨啼鵑



柳老黃鸝遷別樹花殘粉蝶繞空林道人不管春光去看  
了紅芳看綠陰  
一鳥不啼春寂寂百花都落雨濛濛十分花鳥東風恨半  
在詩中半酒中

題漂母飯信圖

國士無雙未肯臣漢王眼力欠精神築壇直待追亡後不  
及溪邊一婦人

一飯豈能忘漂母英雄未遇有誰知可憐屏底丹青筆不  
畫登壇拜將時

詩窮

風愁月恨屬詩翁終日推敲向未工何苦辛勤學郊島嘔  
心博得一生窮

雷潭為定講師賦

縛草為菴枕碧漪蒲團長是坐禪時一聲霹靂驚龍起布  
衲蒙頭捻不知

雪居為安上人賦

雲壓西湖水欲冰雪封樓閣玉稜層夜未閉外深三尺應  
有齊腰獨立僧

傷春

園林芳事已闌珊梅未生仁筍未竿堤上柳綿風脫盡綠  
陰應在雨中寒

雨過

雨過山頭雲氣濕潮生渡口岸痕深一聲短笛斜陽外知  
有漁舟泊柳陰



即事

花露研殊朝點易藥爐分火晝焚香道人不管世間事自  
覺閑中日月長

木芙蓉

芙蓉一帶遠池塘萬綠叢中簇艷粧錯認園林春富貴不  
知葉底有風霜

論詩

三百餘篇豈苦思箇中妙處少人知籟鳴機動何容力纔  
涉推敲不是詩

書館即事

煙拖野色入書窓一畝平田隔草塘暮雨初收新水滿藕  
花香雜稻花香

對菊

菊似靈均帶楚愁餐英人去思悠悠西風籬落甘清苦不  
愛春光只愛秋

夜景

一池清浸藕花月午夜涼生菰葉風風月無邊詩興動品  
題收拾錦囊中

秋池

西風吹露冷銀塘菰葉蕭疎柳葉黃秋水不知時色老藕  
花猶學少年粧

簡孫治中歸維揚

聞君騎鶴賦歸歟謗寫詩篇問起居后土祠前花在否平  
山堂下柳何如



山堂題墨竹畫扁扇

淇澳分清入素紈一梢瀟灑勝牙竿此君不受人間暑葉  
葉生風夏亦寒

新昌大石佛

倚天巖石費雕鐫佛相分明在眼前莫與嘉州爭大小法  
身充滿本無邊

黃菊

壓甃秋色萬黃英多少金風染得成籬下年來無靖節寒  
香不似晉時清

螢火

化形腐草暗生風光數點隨風過野塘寤下久無人夜讀  
此身不入照書囊

懷友

聽雨思君淚欲流簷聲滴老鬢邊秋何時過我晴窓下共  
話思君聽雨愁

昭瑞宮月夜

飛仙挾我上瑤壇古桂香中夜倚闌鏡笛一聲吹月落滿  
身風露不知寒

東山謝太傅祠薔薇亭

圍棋別墅卻秦軍千載功名一窖塵今日江山非晉有荒  
祠花木為誰春

夢情為嬾菴上人賦

栢子煙銷嬾坐禪白雲半榻伴高眠分明記得莊周蝶飛  
向梅花雪澗邊



田家

流水小橋江路景  
踈籬矮屋野人家  
田園空潤無桃李  
一段春光屬菜花

春寒

客思重重山色外  
詩愁點點雨聲中  
看人料峭東風急  
墻角桃花未肯紅

春寒料峭透紗窗  
睡起晴蜂恰報衙  
怪得曉來風力勁  
滿堦香雪落梨花

池荷

紅藕花多映碧欄  
秋風纔起易彫殘  
池塘一段榮枯事  
都被沙鷗冷眼看

聽琴

一曲猗蘭按玉徽  
高山流水少人知  
紛紛耳聽非心聽  
安得人間有子期

蓬山堂訪王鶴隱高士不值

蓬萊深處訪仙家  
雲護巖扉石迳斜  
笙鶴未歸春寂寂  
青鷺啄碎碧桃花

過曹娥廟

細雨兩山眉黛歛  
怒濤千古哭聲寒  
須知此廟關風教  
莫作尋常神女看

禹廟行春

大禹祠前柳色新  
駢闐車馬闕行春  
登臨都道江山好  
話到平成幾幾人

子胥廟



伍相祠前雲氣昏  
奔吳心事與誰論  
怒濤夜半翻江月  
疑是忠臣一片魂

西湖行春  
畫船無復沸笙歌  
湖水年年自碧波  
回首蘓公堤上柳  
綠陰不是舊時多

明妃  
和戎何惜遣娥眉  
悔悟徒然殺画師  
漢主深恩如可報  
妾身死虜亦無辭

一函香骨埋沙漠  
魂魄多應繞漢庭  
惟有春風知此恨  
年年吹拂草痕青

煬帝行宮  
彩鳳樓前汴水流  
君王不復錦帆遊  
長堤舊日青楊柳  
曾

帶春風拂御舟

明皇按樂圖

一曲霓裳舞太真  
誰知鼙鼓動塵胡  
當時若按周姬樂  
治世音中無亂人

采蓮女

越女蘭舟泛綠漪  
采蓮花露濕紅衣  
萬荷影裡歌聲過  
驚起鴛鴦貼水飛

通玄觀

雲氣深深護石壇  
紅塵飛不到闌干  
清陰滿地無人跡  
一徑松風鶴夢寒

林高士隱居

家住西湖深更深  
古松陰裡禮茅君  
白猿攀樹藤花落  
點



破巖前一地雲

吟邊

落盡荼蘼燕未歸  
小園寂寂掩柴扉  
吟邊正苦無詩料  
風遊楊花撲客衣

道士夜醮

步虛聲裡碧雲飛  
珮玉珊珊謁紫微  
月浸剗風鳶鶴過  
仙都道士拜章歸

題梅花詩卷後

月香水影句清奇  
除却逋仙更有誰  
吟骨春風吹不落  
此翁已後絕無詩

贈王琴所

一曲絲桐餘古意  
百篇風月寄閒情  
君詩即是琴中撥  
底

用離鳶別鶴聲

謝聰講師惠桂花

廣寒世界仙家種  
金粟如來佛國花  
多謝高人分惠我  
一枝和月到山家

客懷

年々春暮客天涯  
愁見東風颺柳花  
自嘆身如梁上燕  
巢長傍别人家

春夜

銀燭燒殘聽漏聲  
春寒詩思覺淒清  
一庭夜色無人管  
分付梨花伴月明

枕邊瓶桂

巖桂花開風露天  
一枝折向枕屏邊  
清香重透詩人骨  
半



榻眠秋夢亦仙

問菊

山園獨立對秋光一袖西風兩展霜  
咲倚東籬問寒菊自淵明後幾番香

半軒疎雨

簷前數點弄晴光  
浥露庭花枕簟香  
池草夢回詩思杳  
吟意分得一邊涼

蝶

隨風粉翅太輕狂  
夜宿花房春夢香  
栩栩不知身是夢  
又將魂夢化蒙莊

見雁有懷

滿眼西風憶故廬  
親朋音問久相疎  
年々江上無情雁  
只

帶秋來不帶書

聰講師涅槃臺

莫將生死視如來  
要看蓮花火裏開  
勘到飛灰煙滅處  
涅槃不是涅槃臺

贈談命姚月壺

月中消息千年曆  
舌底窮通一世人  
試把五行推測看  
廣文官冷幾時春

中秋對月

十分蟾影照人間  
一片山河古影寒  
惆悵年々今夜月  
人生能得幾回看

秋意

梧葉翻風敲老樹  
蛩聲帶月泣寒莎  
只消些少閑風月  
便



覺客意秋意多

對菊

春花能得幾時紅萬樹繁華轉眼空黃菊雖黃偏耐久西風雅淡似東風

玉繡毬花

花神巧學傳官樣不屬針工屬化工疑是瓊瑤初琢就一團香雪滾春風

即事

春晴無處不繁華多少遊人逐鈿車盡道東風花柳好誰知生意在桑麻

九日感懷

新橙初試蟹螯肥一曲清歌酒一卮料得故園秋正好黃

花應怪客歸遲

黃蜀葵畫卷

蜀質何人為寫生金盃翠袖捧朝陽花前露重富題濕猶帶南薰殿裡香

春夢

銅匱艾納翠氤氳六六屏山酒半醺夢入秦中州看秦畫春風吹亂玉梨雲

題明皇按樂圖

五鳳樓前沸管絃春宵花暖月娟娟纖腰舞到霓裳曲驚猪龍地上眠

明皇楊妃圖

君主擁袖倚嬌容指法相同曲亦同料想馬嵬千古恨當



年已寓笛聲中

暮景

浮雲開合晚風輕白鳥飛邊落照明一曲彩虹橫界斷南  
山雷雨北山晴  
和靖墓  
木落孤山墓草荒梅花千古帶詩香吟魂仙去誰招得獨  
雀一聲幽恨長

宮詞

聞說君王御宴回宮人留鑰內門開琵琶撥盡黃昏月不  
見花間鳳輦來

臨平泊舟

客舟繫纜柳陰傍湖影侵蓬夜氣涼萬頃波光搖月碎一

天風露藕花香

錢府舊園

十二峰前富貴家亂離不復舊繁華亭臺寂寂無人到流  
水東風自落花

春雨詞

簷聲滴碎玉闌干開盡梨花亦嬾看燕子不歸人寂寞深  
深宮殿鎖春寒

山中

萬壑松聲撼翠微夜寒風露濕人衣山翁踏月巡幽徑竹  
裡籠開鶴未歸

客路

春風客路草萋萋小駐征鞍日又西回首山前雲樹暗竹



雞聲裡鷓鴣啼

金陵懷古

六宮禾黍千年恨一片江山萬古情  
明月興不閑吳廢事夜深還照石頭城

仙姑對奕圖

碧玉花冠素錦裳對拈棋子費思量  
經年不下神仙着想是蓬萊日月長

山村

小小荆扉傍水開竹橋分路入蒼苔  
呼童掃去堦前葉怕有詩人踏月來

虎丘阻雨

石闌浸碧澗池空池外秋聲萬壑風  
人倚僧寒看風雨亭

亭塔影有無中

山中秋夜

石床彈月鶴聽琴玉宇凝秋絕點塵  
萬里無雲銀漢淡一天風露濕星辰

寄別方蘭室

醉下山樓客袂分杖藜猶帶碧闌雲  
歸來紙帳眠清夜半夢梅花半夢君

水仙花

冰魂月魄水精神翠袂凌波濕楚雲  
雪後清閑誰是侶汨羅江上伴湘君

春閨

屏山夢斷整雲鬟金鴨吹香火未殘  
背倚闌干聽燕語一



簾風雨捲春寒

槿菊

槿菊叢、遶水涯深紅淺紫映山家平生不識春風面  
落秋深各自花

孔明高卧圖

未用胸中八陣兵草廬高卧掩柴扃當時不見劉玄德誰  
識先生是將星

蓮花亭避暑

日火燒空海欲乾蓮宮深處晝生寒佛家一片清涼景借  
與詩人盡日看

贈易數周仁山

河洛圖書非紙上乾坤文象只胷中煩君細算乘除數吾

道何時可變通

龍江無杜鵑

客裡春殘又一年落花滿地草連天綠何不動歸歟與祇  
為龍江無杜鵑

道院即事

月到松庭鶴未眠玄都羽士誦靈篇玉爐煙斷瑤壇冷金  
磬一教霜滿天

暮春

園林芳事已闌珊開盡荼蘼亦嬾看深院日長眠聽雨重  
重簾影隔春寒

傷春

東皇別我太匆匆急景相催鬢已翁杜宇一教花結局人



生消得幾春風

即景

籬落西風野老家  
閑看景物感年華  
柳衰荷敗芙蓉死  
交割秋光與菊花

贈上人

嬾聽人是與人非  
有耳如聾未是癡  
不采當時臨濟喝  
威王前事已先知

墨蘭

一幅幽花倚客窓  
離騷讀罷意淒涼  
筆頭喚醒灵均夢  
猶憶當時楚畹香

寄任子忠

老去懷人鬢已秋  
江山猶帶別時愁  
碧雲不隔相思夢  
幾度吟魂到客舟

和李藍溪梅花韵

孤山別後有誰憐  
踏雪看花又一年  
幾度相思空夜月  
角聲吹恨不成眠

覓句逋仙琢肺肝  
數名千古冠吟壇  
一詩香盡西湖水  
白雪陽春和者難

一枝寒玉倚橫塘  
和雪攀來袖亦香  
挿向胆瓶籠紙帳  
長教夢遶月昏黃

南枝開徧北枝開  
祇恐飛香落砌苔  
踏雪詩人應癖好  
杖藜日為詩來

折柳

陽關一曲灞橋春  
垂綠陰中別恨新  
漫折青絲千萬縷  
多



應絆不住行人

函笏

錦繡班、帶露痕毫端寫出此君孫清高不肯埋塵土根  
本雖無有節存

秋吟

蘆花零落點汀洲白鷺飛邊泊小舟水落渙磯風露曉殘  
荷數點冷擎秋

曉迤支筇步履遲西風吹露濕秋衣舉頭凝望青山外萬

江天一雁飛

里

秋高風急雁來初久客松江豈為鱸好夢不成人睡覺半  
寤殘夜月燈孤  
淪落天涯已白頭西風吹帽冷颼颼悲秋未了悲身世一

樣情懷兩樣愁

畧約當門石徑斜槿籬深護人野家炊煙起處江村晚一  
片斜陽萬點鴉

滿眼秋光動客情小園閑步杖藜輕黃花憔悴應思晉纔  
遇淵明香便清

王荆公廟

遺像巋然占古祠區區土偶亦冠綬無言似想青苗策面  
目猶如執拗時

項羽臺

失計鴻門恨未消一生霸業亦徒勞當時謾築臺千尺爭  
似歌風地步高

柳



腰舞東風未肯休西風吹葉翠眉愁誰知此是多情樹  
最愛春光最怕秋

梁燕

梁間兩處燕成窠來往含泥帶落花  
昵昵並頭休巧語相依穩在別人家

梅花

竹邊籬外樹封苔兩蕊三花帶雪開  
蜂蝶只貪梅杏艷嫌花冷淡不飛來

酒家

颭風青帘掛杏村田家新釀甕頭春  
十分米貴無錢糴買醉含盃能幾人

江村

極目江天一望賒寒烟漠漠日西斜  
十分秋色無人管半屬蘆花半蓼花

西山韓太師墳

古墓年深草樹荒石人石馬卧斜陽  
爭如湖上逋仙塚詩骨埋雲萬古香

床屏墨竹

淇澳新梢筆下分枕屏墨暈點寒雲  
詩人紙帳眠清夜不夢梅花夢此君

和靖墓

西湖下隱為詩忙吟到梅花字字香  
鶴不歸來山窵窵梅邊閑詠月昏黃

述懷



故鄉迢遞幾時還  
目斷長江杳渺間  
一雁天邊飛萬里  
白雲多處是青山

西廡寓舍古木無榮  
桃李門墻萬柳青  
詩人茆屋獨淒清  
簷前古木無春葉  
可怪東風亦世情

秋信筆不  
荳雨初晴浣滌埃  
報涼梧葉墮  
塔苔一聲新雁南  
樓外早送西風信息來

秋色草樹黃  
虹影界開微慘淡  
雁痕點破更淒清  
一番雨過天容碧  
盡是西風染得成

秋聲一  
庭外梧桐葉葉風  
樓頭過雁砌邊蛩  
隔牕砧杵敲殘月  
喚起鄉愁歸興濃

秋陰  
漠漠寒煙暗  
蓼汀江涵雁不影  
分明一天暝色迷  
清晝雲閣西風雨未成

秋霽  
雨過郊墟涼意新  
痴雲散盡十分晴  
隔江一抹斜陽影  
怪向蓼花紅處明

秋意  
庭前梧葉雨晴後  
江上荻花風起時  
涼遠書窗人未覺  
葛衣竹簟已先知

閨情效香奩體  
存素堂



金鴨煙消一字香滿懷春恨強梳妝看花又怕東風惡偷  
隔紗窗看海棠

淚院浣香腮粉未乾相思成病怯春寒此情欲向琵琶訴  
整得琵琶又倦彈

黛眉愁裏歛雙蛾別久無書爭奈何欲待怨他還又憶怨  
時較少憶時多

嬾向粧臺對鏡鸞羅衣怯薄正春寒黃金絡索珊瑚墜獨  
立春風看牡丹

江村即事

江村暝色漸淒迷數點殘鴉雜雁飛雁宿蘆花鴉宿樹各  
分一半夕陽歸

春日

紫燕評春語畫梁黃鸝挽曉轉垂楊博山煙冷書窗靜風  
颭瓶花點硯香

舟次九山

水雲盡處列奇峰螺髻參差杳靄中江岸維舟看不了煙  
嵐分碧入疎蓬

讀秦記

并吞六國獨稱雄經籍灰飛烈焰中書外有書焚不盡一  
編北土漢成功

脩竹館舍

乳燕銜泥春晝長枕書無夢到高唐桃花紅雨梨花雪相  
逐東風過粉墻

夏日陪王君王泛舟鑑湖



波光萬頃接天光  
畫舫歸來載夕陽  
一棹湖心天不暑  
萬荷風裏滿身香

秋夜登西樓

清逼金英玉露溥  
姮娥深夜不禁寒  
桂花香裏人敲句  
倚遍高樓十二闌

雜詠

柳嫌暮雨鶯聲澁  
花怯東風蝶夢寒  
偶憶故園春色好  
他鄉花柳帶愁看

人非陶令空看菊  
詩不林逋漫咏梅  
晉宋後來愛花者  
輸他高節與高才

天外科陽猶在樹  
林間宿鳥已歸巢  
黃昏莫把柴門掩  
恐有詩人帶月敲

稗柳已回春暖意  
殘梅猶結歲寒心  
百年身世詩中好  
景難消幾度吟

新綠園林微雨後  
落紅庭院夕陽時  
一聲杜宇催春去  
貪睡棠妃未必知

持螯已飽團臍蟹  
斫膾猶思巨口鱸  
風物秋來多感慨  
天寒酒醒客心孤

囊底詩成無賣處  
床頭金盡已多時  
元龍豪氣依然在  
慣守清貧豈足悲

人無氣節何足道  
腹有詩書自不同  
寔學真才誰具眼  
江湖難遇杜司空

地多種竹堪容鶴  
池不栽蓮恐碍魚  
小徑荒苔人不到  
閉門閑學換鵝書



竹林夏日

不受炎光玉萬竿仙林便作晉林看此君長帶冰霜氣醉  
卧綠陰詩夢寒

滴翠松

老翠蟠空一樣高月分寒影落庭皋哦詩猛把闌干拍宿  
鶴驚飛露濕衣袍

夜牕

香篆煙銷夜已闌硯池冰結漏聲寒梅花影戀書窓上應  
待詩人帶月看

玉斗山人集

祖庭觀丁歌  
吾祖河汾文仲氏受恩未報夫子靈末孫願言無忝爾幸  
際天地還清寧奔波水陸數千里袖香今得拜祖庭天欲  
使觀周禮在時哉巧值開上丁北方學者曹博士新膺上  
命來交承聖門不敢負所學事事必欲行六經爾時已丑  
八月朔大中門闕天微明左開毓粹右觀德燈毬燦爛交  
流星奎文閣下藝崇燎栢林鳴鵲爭飛鳴金絲堂前班引  
出笙鏞隱隱金石聲三氏諸孫列左右皎潔宿鷺排圓汀  
各崇尊長例就在深衣徽及江南生禮官三請詣罄所朱

祖庭觀丁歌

元 王奕



靡咿軋開中局太常金樂交佚奏秩秩邊豆環簪纓首役  
先聖告祝後鄒克次第彞罇頌却詣齊國父母廟泗沂分  
配隨重輕五賢推尊孔道者俎豆亦得陳其誠春秋天下  
祀文廟太常四丁惟魯行青衿白髮老學校觀丁未有如  
斯榮儼然清都聽雅樂耳目變換心神驚南門禮畢飲福  
昨公堂交錯飛兕觥飲餘獨立杏壇下予懷縹緲欣既并  
恭惟素王師萬世道如日月行天晴幾年讀坐甕牖景仰  
闕里真蓬嬴誰令溟渤化清淺温涼親得瞻儀形吁嗟麟  
陪鳳不至青霄翔翔飛梁楹想當削跡後未日諾仕委曲  
隨人晴不知無河無不可與時潛躍無將迎君臣大義要  
不廢豈應絃轍俱紛更匡圍宗害走列國哀誅漢祠垂千  
齡誰云木壞文寢喪墓林楷理猶縱橫文謨武烈悉斯燼

春秋無復陳嘗蒸皇王帝伯禪林休尼山泗水常朝廷孔  
林黃屋已八至功與泰山爭崢嶸惜哉祥符天子幸生晚  
不得隨公卿封疆萬里撤私町冠珮此夕仰大成八表雲  
昏塵眯目仲孫宣子視獨瞳觀周反魯學益進矇語聵語  
聞驚寔兩生此日既見聖中道未有傾蓋程箠瓢道不在  
房杜深慙禮樂孤汾亭歸與玉斗授論語願與諸子歌菁  
菁庶乎可以報因極蠢生未必終頑冥斐然成歌記祀事  
刊作學者座右銘

八月八日偕廟學教授曹彥禮及孔顏孟三氏諸孫

童齋集遊達泉到沂水緬想風雩之樂余乃浴沂作

詠歸歌

浴乎沂漱乎達

達泉一溝百步透晞予髮兮二水之湄風



飄飄兮吹衣高門出兮雲門歸千八百年之下兮何時得  
躡遐踪兮逶迤欣慨交集兮眇黃唐之莫追已而已而逝  
者如斯兮予將何之

八月望日深衣抱高廟御琴奠酒首歌南風繼作憶  
顏三氏諸孫環立以聽為杏壇一時之盛千古之下

令人憮然作歌云

秋日暉暉兮槐市成林白鳩闕關兮漢柏陰陰杏壇高兮  
幾尋奠桂酒兮孤斟蒼梧不可呼兮猶得抱南風之琴哀  
顏天之不永兮傷哉兮遺音契千古兮遐心歸兮歸兮乃  
今不負吾衣之深  
林黃乳廟既拜之後又不遠三百里過泰山過汶河壯哉  
春林斯遊上日觀作賓日歌少發葵戀之私

日月東行天左旋丸中久矣知乾圍稔聞泰山有日觀竊  
疑板墨多夸傳甚言抱鷄候其上鷄鳴海水如炊煎火輪  
磨蕩上復下崖撞石裂聲填填天門鐘鼓報清曉塵世正  
爾沉元元幾回掩卷信且惑安得臂羽如飛仙誰知白髮  
際同軌得來鄒魯拜聖賢竟遊曲阜至岱嶽捫參歷井登  
其巔濯足就宿會真殿如乘朽木棲微垣是時八月二十  
夜明月正值奎婁躔窻明斗落懼失曉一宵卜起無寧眠  
偕行諸子大軒睡笑我歷輓狂且顛深衣端坐逾不寐湔  
腸滌胃玉女泉少需道人謂予曰若欲觀日今當前忙迷  
扶策扶草莽翩躚摠奪諸公前諸公拍手笑於後被公吞  
了丹砂元鹽既一氣涉觀頂隱隱紅罅開東邊元雲荏苒  
幻紫色金樓寶闕蒸瓊田秋深露重濕我靴扶桑望決眼



欲穿須臾眉黛林天杪脫然寶鏡開微奩上下下復上  
 下千辛萬苦方團圓小臣不敢矐目視九拜塌額肝膽懸  
 起來恍惚抱影泣昔河容易沉虞淵羲和酒淫失賓餞掩  
 覆白日為元天蚊軀螳臂負不起忍渴未死甘氓塵穢號  
 蛄泣虎豹舞單衣尚網得瓦全夢醒忽爾登泰岱稽首再  
 拜清光還願保初陽守黃道重離赫赫行純乾泣餘收淚  
 盼下界西北迤逶生霞烟山如鱗甲水如帶八荒草木皆  
 新鮮回視秦碑與漢篆神光燦爛生蛟涎古今聖賢幾登  
 此乍覩莫不心虔虔歸來玩愒復弄影入夷出晉誰與憐  
 蒼梧不返放勳死願戀惟有葵心堅分陰寸晷正可惜人  
 間兒女醯鷄然登封觀日世不少作如是觀能幾焉作歌  
 歷歷紀其實後來請驗予長篇

金餘元遺山來拜祖庭有紀行十首遂倚歌之先後

殊時感慨一也

和元遺山一首

自南而北故先鄒而名魯孟廟在嶧山之下去曲阜七十餘里

魯橋卸淮舸淮安登舟淖塗歷蕞蕪翠嶧倚天末髣髴東

南隅薄暮曲紀城即春秋紀國城三清敞仙居平原積礫

柯靈河鳴泉珠小徑斗折上行與孤兔俱循崖索斯篆李斯

碑在恍惚東封書叢巔集蓮瓣蓮花巖巖瞰青徐正途

盡茅塞正爾宜羊車秦二世登車而上蚌珍不蔽美苔堯到粉

榆孟廟孟里皆嶧山南門肅孟廟縣南門冠袂先樞趨氣大

夙有配邾少不必都盡既覲慈靖孟母廟在東擇師誰復如

鄒縣閔王廟即子思教孟之舊基

元遺山詩曰荒城隅我昔入小學首讀仲尼居百讀百



不曉堂但有壁想藏書翻翻又十子佩服見舒徐概  
然望關里日南冠預庭趨隱隱金石聲恍如夢清

和元遺山二首  
儀奎門出浩蕩閣其高入雲杏壇歷逶迤在夫子廟前古

高垣門十一魯國有云是魯城基浮浮化荆榛孔廟存威

今帝王所形外影即隨入間此天闕可望不可躋詩書壽

老壁孫子綿遺規杲杲不可尚百世當前知

聖人與天遊擇地豈必巧寰廷十里林老翠鎮盤統斧斤

不可尋兵劫不能燎翁仲儼冠帶孔墓前石翁麟虎峙強

矯前亦墓物書生拜風木起立九腸攪築室今不多馳蹕古應

少春秋泉壤幽日月天地曉洙橋一線流洙水在夫子墓

而三尺已滲注入萬沼入陵見金梳公相計不早父乾兮母坤

白骨無壽夭啣冤絕歸鶴誰復訢華表九原信可作兩觀

事未了  
遺山詩曰堂堂魯三檜培植出天巧規模故十抱  
奇秀供百繞雖言甲戌亂煨燼入炎燎青烟千雲  
上群鶴空自矯哀哀嗥陽人腸肺痛如攪魯郊木  
何限名取惟一少神明信扶持厄運豈易曉雲臺  
存荒榛達宮餘曲治紛紛皮眼成壞何異晏與早道  
君看泰山石  
萬古青未了

和元遺山四首

西偏顏樂園屋角接聖境顏園在西偏想當坐忘時聰



明盡黜屏上植松數株下種麻千頃荒蕪蛛網結秋絲綿

密藏廢井東連勝果寺元此誕莊穎象教剝牀膚所事終

不永興止有定在雖帝不可請緬想書雲時莊公臺在孔子廟西即冬

至地書雲五色垂燦炳三家浚深井在相子井錄訖水亦冷卓

卓正憲祠正憲之太廟蒸嘗有定省金滕宗老心復辟直要

領照影弔伯禽魯伯禽之井在抱渴空望綆

遺山詩曰幽屏近郊無百畝負郭終半頃饘粥聊自

飲初取足惟一味久益永德隣興周旋聖域期造諸貧中

地有樂神轉盼德深省塵埃竟何有索髮忽垂領

共學講我容從之抱脩綆

### 和元遺山五首

高門連曲沼上有泮宮臺芹藻萃不復菰蒲美風埃靈光

突其右荒穢良可哀兩阜瓜瓞地驅車儼臨淮鷄虫爭得

失擾擾胡為哉何如袖春服行歌與時偕我来晞白髮歸

詠同此懷柴桑志童冠寤寐須偕來酌達洗逸盼達泉在

東清冷出雅趣孰此偕步零習風腋自覺聰明開沂水在

遺山詩曰泮宮何所有舞雩但荒臺泮水涸已久

北風捲黃埃顧瞻魯公宮感極令人哀

事規模到平淮作計萬方託錄聖師猶捲懷但欲

春服成風乎詠歸來我亦淡蕩人涉

世寡所諧浴沂行有日一笑心顏開

和元遺山六首

壯哉景陵宮龜夔極神猛洪惟大庭庫制度合雄聘聖世

尚封崇功擬天地並中天恠事發靈長轉俄頃我登望嶽

臺在黃帝一概心自領涿鹿策奇勳自謂出天幸大運旋

九棊捧首歸舊鼎富貴積金臺礎礫揜營屏倘無六籍在



詎肯狝獮下土位人上奈何不深傲

遺山詩曰大姦何所如狡偷雄且猛雖然耳伏

擇肉會一騁卵也不敗露名與聖賢並天刑竟莫

逃不待七日頃曹瞞盜漢昂僅得保首領與外均

市曹肆必就遠方屏兩觀此宜少傲

和元遺山七首

鷄豚隣柵翁盼盼延允譜仲尼土萬世豈必志百畝誰知

弗父何讓德報以魯蟻穴後王侯林廟此其所東周禮樂

心豈不在文武大器信有神予奪孰敢侮邾鄆鼎鉉唯弱

臂竟莫舉大厦庇生民雲仍合分庶詩禮世其傳嘉種無

莽鹵庭超揖鬚眉返此末代古

遺山詩曰不見講堂廢指仍存世諸遺基洙泗間

荒惡十畝聖跡既已老自衛歸在魯正樂脩六

其壯持用方禦侮如何盛唐日一整速建武太僕忠

授天地位寧復俟庶民所嘆世道衰師

和元遺山八首

荒荒望魯甸姬孔廟粼粼允祚五十代顏孟東西鄰旁求

侍坐翁草莽迷城闈豈應髮膚體竟此成湮淪爾續道

韻垂此天倫親犁鋤供子職猶裕耕鑿民可能百世祀不

廟三省身亦必有壇壝尚稽廓荆榛五賢配西序餘瀝波

揚荀肥馬視輕服此景良清新微言苟不及往迹亦易陳

安得沂水上菊泉薦斯久

遺山詩曰白塔表佛屋萬瓦青粼粼向幸勝果寺

西與姬公鄰塔廟恣汝為堂合魯城闈魯人或異

教吾道宜淫淪許行學神農耒耜手自親當時子

孟子真以為匪民况彼棄門家糞壤待其身一朝

斷生化萬國隨荆榛孟氏匪所期安得揚與荀丹



和元遺山九首

耕民味帝力馬用典與謨奈何降表後氣稟分賢愚天錫  
 孔孟氏一整綽有餘廓哉鄒魯地良足容軒車皇皇七十  
 國轍迹何區區誰知百世下流作章句儒掌股弄神器樊  
 跽直棄如遂令桐梓地盡化荆棘塗昏林畏饒啖秉燭未  
 趨隅巫咸倘可問為我還其初

遺山詩曰天地有至人六籍聖賢謨聖師極善誘  
 小智祇自愚文章荷物伎不直咳唾餘操戈論懸  
 名望塵拜高車所得不毫髮咎責滿八區公論懸  
 日星豈直小人儒喻彼失相者恨不知所如指南  
 一授聖門有脩塗陽光照薄暮尚  
 堦補東隅慙哉發深省灑掃今其初

人惟君與師得在天地間蜂蟻失所主生息決不蕃逐日  
 渴未死顧影悲余年平生東魯心皓首瞻聖賢上下二十

載歷歷觀遺鑄惜哉數墨子想豫成虛傳十章紀大畧盡  
 和遺山篇忠腸攪葵漆喉棘不忍信持歸刻瑯石何用勒

燕然

燕然山詩曰林墓連魯城方廣十里間百年懷人成一

遺山詩曰林墓連魯城方廣十里間百年懷人成一

慨何正名公賢博陵石翁媪名子無留鑄兩獸墓

前物歲久乃詭傳昨我遊魯門規作孔林篇聖人

與天大聖道難為言所見不一記來

者何述焉詩成私自愧小子良斐然

和杜少陵望嶽一首

封禪七十二萬古事未了兩儀一開闢三觀幾昏曉自昔

祖龍來訖吟歌鳳鳴吾當登東山魯亦未可外

和李白泰山一首

泰山天地極鄒魯聖賢闕周匝二千里卓然位其間五汶  
 合泗水八荒無競山扶輿清淑運日夜何曾閑尼山連嶧



阜豈徒翠浮鬢軒轅與羲醇孔孟匪曾顏正氣盡此出高  
裁其可攀蘇軾嘗望賀蘭風面二千里卓然其間正

和元遺山太山古句

我來拜鄒魯舟過歌鳳臺登嶧仰東蒙自謂高矣哉及登  
東山頂天級真難階河瀆走罅漏塢陵塌堦已大物自  
小夙學得所諧聖賢分地步高下隨其材於道既有覺沿  
崖別碑苔七十二君者太山紀經七十君來封禪謬迷良可哀王侯  
閔蟻穴休王滋無涯三千六百朞治忽知幾回悠哉身後  
史聊爾生前杯大塊圓軀殼客氣行風雷神功一收斂非  
去亦非來試出亭毒表岱峯亦微埃安得鉄柄帚掃盡兀  
突堆上下一無極釋然暢虛懷平明下山去天門掛芒鞋  
金童玉女夾道迎鸞鈴鳳翟紅雲開道逢明復與守道公

鈔本

居泰山拊肩携手歌崔嵬謂予如欲看白日請騎黃鵠同

上無色界外蒼梧帝子正與倏忽混沌高卧真蓬萊

和趙若倫舊題多景樓

大地山河合九州秋風吹起故鄉愁洛山冉冉機雲出漢  
水瀟瀟巡遠羞東望海連甘露寺北來詩滿鎮江樓金臺  
萬里天門杳且問東津汶上舟

和羅隱詩再題多景樓

老了英雄費了吟鹿兒化馬不消尋死生壽夭蒼生命治  
亂存亡上帝心播豕西來山疊疊焦金東望海深深眼前  
叅透坎中畫如識恒河只寸岑

和盧疎齋多景樓韻

一合乾坤氣脈連蜜甜本不棟中邊幾千萬劫本同此百

存素堂



八十年何間然北固英雄前去古中原文獻後來賢老懷  
登此成欣感日落蒼梧生紫烟

參題北固亭

杜老當年識恨遺與天爭漢苑奚疑伏獮猶憶分三日老  
驥空悲混一時往事竟隨東逝水新題全是北來詩如今  
多景樓頭酒免得諸公賦黍離

題焦山吸江亭

甲子三千六百期此山萃嶽起何時雄吞海瀆金獅子霸  
斷吳門鉄捷兒水鏡照空三國恨浪竈撞破六朝悲後來  
儘有無窮事番與他年再賦詩

題焦山客位

鎖斷長江鉄戶門風帆雲海幾朝昏能依佛教綿遺址大

勝焦家裕後昆鶴骨已仙義帖在

焦山有王右軍  
瘞鶴銘記故云鰲身不

動米碑存

又有米  
章所書銘

住山傳得文殊印遮莫前身是了元

題金山金鰲閣

誰索紅爐鑄寶刀闢開太極奠金鰲尾搖光岳星辰轉背  
負乾坤日月勞潮落潮生通氣息帆來帆去動毫毛不知  
南北車書混此是翻身第幾遭

書趙忠靖公祠堂

老臣將畧服先零撐拓淮江五十年不把壑舟移半夜未  
應把國墜中天父奢既不慙諸葛子括胡為愧仲連節義  
功名父兄在摩挲豐碣重潜然

到揚州

仙去瓊花不見根津橋明月共誰論百餘載作江藩翰十



五年來薊戶門淮海樓頭諸老眼  
平山堂外六軍魂翻愁  
吳楚空遺秀作史無人歲月昏

題維揚

半生書劍走閩甌三十年前欠此遊  
赤脚有心尊魯國白頭無力賦揚州  
花明靴巷新朝市草暗城隅舊敵樓  
橋上更無何遜迹梅花明月為誰留

登黃龍峯

黃龍峯頂接天高下視塵寰走蝟毛  
坤野未能休血戰鼎湖誰復戀烏號  
一杯彭蠡空浮淚萬里長江漫激濤  
安得駕虬鞭霹靂漲翻溟渤逞雄豪

題陶狄二賢祠

豐碑大字極譽揚並祀淵明與狄梁  
宇宙事皆吾已分君

臣義亦本天常休官彭澤當存晉取日  
虞淵合為唐自是後人無遠識不知遺  
臭與流芳

彭澤新縣靖節祠

已曾采石酌詩仙又拜書巖即靖節祠名薦菊泉京口火頭纒

負乘柴桑處士便歸田馳驅名並諸公  
駕尸祝誰碑百世

賢近代從容人死義後先二尹合俱傳  
池陽別駕趙昂發曾尹彭澤德祐問

死於池之從容亭

四絕呈周月湖

九中日月妙推移纒過三千六百暮  
霽月光風無盡藏不

應便黑小圈兒

不盡脩眉不易粧篋中猶是主衣裳  
起觀疆宇皆周土只

有西山尚屬商



君住山陽岸口磯風帆雨驛去如飛十年多少金臺客曾  
有沿津問泗沂  
草帶粘天只辨星燧樓化盡作郵亭柳橋梅驛多來使只  
寄山中養鶴經  
鶴林寺絕句  
應是鶻花笑口開火頭天子果何哉遠公蒲眼沾春酒引  
殺陶潛不肯來

題彭澤舊縣狄梁公祠  
周紀唐綱一線間旋乾容易轉坤難不將廟祔來雄辨馬  
得宗祧可再安國事固當元老定德碑留與具臣看寄言  
彭澤親民者須學好人為好官

題小蒜嶺

西風策策麥花涼重把新詩自品量禽不為人音自好路  
因無驛里偏長百年白髮空前輩兩載黃花笑異鄉歸去  
玉瑯牢閉門莫教舊隱姓名香

歸途有感

少小役師讀魯書幾回掩卷想風雩得遊鄒魯聖賢地誰  
創華夷道德塗地勢雖然有離合脚根却莫放模糊不知  
江右明經士曾識春秋兩字無

題池州郵亭

驛堠珠連轉北燕西風落日幾枝蟬唐儀漢令碑上下楚  
館秦郵世後先新柳不知迎送事短藜聊信去來緣如今  
亭長皆民尹那復圮橋更授編  
九月申屠伯驥字子同飲壽張蚩尤塚上



蚩尤一變四千年  
涿鹿如今又不然  
柵上懸絲重放下  
草門朽骨尚高眠  
昇鳥沉鬼人今古  
點鵲瘕蟬事後先  
醉挿黃花供一笑  
誰知吟客是喬仙

題泰山仁安殿壁

大極何年誕帝孫  
中居岱嶽鎮乾坤  
三千餘載昭明代  
七十二君來至尊  
魯甸齊邱雄地勢  
秦松漢栢護天門  
兵塵不動綿香火  
萬里車書壽一元

新州枕上有感二首

尼山拜了又何求  
馳鷲中原作壯遊  
秦岱峯頭觀日出  
汶陽城外看河流  
朝吟闕縣蚩尤塚  
暮醉新州太白樓  
從此不消刪白髮  
留歸江上對眠鷗

母祠前漢栢孤  
古篆蝕苔悲建武  
漫碑宿草憶祥符  
逢人不解從頭數  
牢記山名畫作圖

和遺山呈太山倪布山真人

其二 百二歲

江右書生在  
枉白頭杖藜始得北山遊  
手摩紅日登三觀  
袖拂黃埃看九州  
及下誠明殿  
名氣貌方知歲月老  
春秋更須梓就諸公  
軒焔焔聲名萬古留

呈申屠御史忍齋二首

世家矯矯漢申屠  
博古通今命世儒  
豪傑雅知真北學  
扶搖久已作南圖  
揚州臺近雀騎鶴  
關水秋深尚憶鱸  
好載白雲同一出  
簷頭新港即榮塗  
壯遊久負子長才  
斥鷃幾成困草萊  
千載幸逢皇極運  
兩生端為聖門來  
誰知白髮餘年健  
得共黃花笑口開  
明日



西風歸棹遠懷人空憶古樽罍  
當年雪片大如席獨立樓頭有此翁  
集霰已知漫大地行  
窓轉覺舞回風洛陽公子衾誰共  
姑射仙人夢不同且倚  
玉欄看世界郢歌一曲月明中

別宣慰王中齋

自笑靈龜久不靈巧逢天地換清寧  
典型頓覺空諸老肝  
鬲未能忘六經朔雪漸深頭轉白  
洛山雖遠眼還青杏壇  
寂寂遺音在靠得汾亭有父兄

贊見五峯燕先生

康廬萃嶺撐青空五峯詎有神仙翁  
黃金為佩白玉瓊跨  
虹飛上燕臺穹紫垣蒼瑣白日靜  
薇花韻的明丹表帝謂

公回久不井為提明月江西來某邱某壑無隱耳貯見漢  
庚堆陳紅周官六典冢宰事有功畎畝方為忠蹇予落魄  
不耕子半生煮字悲吟窮蓋頭不思戀茅屋負笈遠拜夫  
子宮黃河秦華幸一見於人須識歐陽公枯根纖芥盡收  
拾藥籠未必遺芳窮品題願借燕許筆可以報德歌幽風  
再和韻上石塘吳

髮燥聞君響泮宮玉溪盱水限西東惜哉宴罷瑤池晚乃  
在崇臺拜下風  
不能隨調轉商宮獨抱瑤琴過魯東  
霜滿烏庭無過雀非  
君誰與借東風

人心六籍未嘗焚千古師存道亦存  
見說汶陽官路口幾  
年鞍馬上君門



破笈兵韜久已焚床頭僅有易書存一觀周禮歸來後依  
舊白雲深閉門

見陳月觀

鰲轉山空海失深仙人抱月自高吟春秋兩字尊王義皇  
極一編經世心千載文聲扶學校萬年史筆寄山林太邱  
古矣元龍老天壽先生續正音

又

仲尼日月幾曾昏自古君師豈必存水陸三千遊聖域風  
雲萬里望天閣燕臺接武何多愧吳國孤騫未見雲觀上  
又分明月影漫漫長夜與誰論  
五絕呈李惟學山長  
嘗笑藍仙踏踏歌極知感慨欲如何簷頭白日蒼生共到

了聖賢分得多

鑄字為蟲聲猶泯磨石為碑字亦漫雜雜萬形歸五化燼  
餘方策更長存

朝飡暮飲逐塵寰清鏡無情不駐顏千古菊泉香火地  
賢多是靠名山

星氣西流一擲梭起看斗柄夜如何篝燈急了床頭易明  
發開門事又多

隻影隨陽逐稻梁故山元自富蒼筤孤雄不作山梁夢晚  
歲收聲在鳳岡

呈招討李春楚

太乙翁

元田種玉不傳方春去春來野自香鴈入燕雲丹未返笑  
援明月醉山陽



神拂徂徠涉太峯曾同太白舞西風歸程鶴瘦揚州遠著  
訪吾宗太乙翁

和中丞徐容齋貫戶維揚

嶽到東原掌樣平南州師友樹高名聖人門戶三千教老  
子胃懷百萬兵學要絕時須著繼道逢夷處不消爭鳳池  
烏府皆餘事急拯蒼生作九京

呈康和申屠忍齋隸籍秦郵韻呈苟治書生

笑認鸞江舊祐環大槐夢覺已無關看花要在雪霜裡品  
士莫於文字間烏府清風如有約鶴樓明月不教閒直須  
存活蒼生了却把丹囊貯九還

登秦郵文遊亭天壁亭長歌

湖天澹澹湖水碧雲風冉冉湖雲收湖白幾頃菰米地湖

浪幾摺蘆花洲幾千萬劫走盡夜三十六鏡磨春秋江南

狂客歸自魯騎驢載酒遊文遊文遊已落鐘鼓界斯文喪

矣遊人羞蚌胎明月吸葦老湖有大蚌名蚌湖鴉背落日悲少游

東坡雙井化異物神光奕奕穿斗牛文章不逐歲月老精

爽常與天地流賞心倘得際美景薄才自許追前修安得

老米雞距筆生綃百匹橫戈矛守臺舊卒年九十願隱於

臍肩過頭六十年前邊鄙事且言且泣氣咽喉甚言秦欲

帝萬世據此要地置急郵海田陵谷無定在如今非項亦

非劉王生感慨重抵掌驚起一片湖中鷗鷗飛沒入翠烟

裏乾坤納納歸隻眸何當飛出天壁外春風吹散眉峰愁

庚寅五月十二日偕趙平甫拜采石神霄宮太白墳

舊有暮



孤風吹黃鵠遠客歸自魯辦香拜公墳梁月重淒楚比魯  
登太山依韻踵遐武生平景仰心茲夕遂親覩何地無青  
山何人無黃土艷艷謫仙翁配月照今古惜哉生死世於  
道竟無補世之蹈海人此事與誰語徘徊暮雲亭元蟬訢  
輕暑

祭青山太白墓文

青山八尺之土不足以揜公萬丈之光采石長江之水不  
足以流洗一死之疑誦公大雅諸詩知公所志真有關於  
世教何止於風雲月雲露之為憶儀鳳不可以粟呼祥麟  
不可以繫羈唐朝齷齪組綬何足為公筋骸之維必朝蒼  
梧以元圃飛出宇宙之外然後足以快公之襟期凡晴俗  
皆何能窺公仙人之姿予浴沂而歸策蹇過此酌荒祠兮

一危其與公華陰倒騎之日越千載而一時安得起公髑  
髏還公智慧與公携手跨赤虬兮遊乎天地於是為之歌  
曰蘆筆書空兮風淒淒祠前有手種竹墨泌地兮雨垂垂  
墓前葉上青楓黑塞兮憂公者誰

青山二章章四句

不登南並祠青山吳郭李也於青山郭仆而李扶李顛而郭

策伐木久矣其廢今乃續之

青青者山並祠其間郭李遐矣高義莫攀

山之青青策蹇來經千君青田二公之靈

鵞身彭澤祭陶靖節祠蘇秦與一出於

嗚呼典午去矣榮桑歸矣黃花老矣微士卒矣尚饗

謝疊山先生己丑九月被執北行閩士以詩送之倚



歌以餞

皇天久矣眼垂青盼盼先生此行遺表不隨諸葛死離  
騷長伴屈原清兩生無補秦興廢一出誠關魯重輕白骨  
青山如得所何消兒女哭清明

襄漢無人替一肩遂令杞國墜青天是誰鑄此一大錯此  
事公知三十年盡愛中都為宰相豈知上界有神仙縱饒  
不返南飛翼也合津橋化血鴿

淮安路教謝西溪已丑二月飲疊山於敬義堂有詩  
後三月樸至西溪見示時疊山已行矣

收斂眉山草木英心潛義吼與時行浣花杜老驚人句采  
石震公貫真誠人並詞合上燕臺為上宰暫勞楚泮領諸生  
沉吟敬義堂中句莫贖豪狂禰正平

和疊山到山陽郡學四詩

一水西來衣帶然界開北極與南天軌文齟齬二百載豪  
傑踈違幾十年幸際干戈屯禍極挽回禮樂泰和先酒廉  
米賤山陽郡多少吟仙與醉仙

齟時蠹簡剔殘灰皓首誰知啣帶埃負笈有機尊魯國扣  
關無力上燕臺茹芝四皓還須出綿蕞兩生終不來中道  
喜逢傾蓋友相携一笑亦奇哉

神仙無藥不醫狂未死男兒未易量東海水應隨血碧西  
山薇亦逐名香君臣分義如能盡天地鬼神終不忘自有  
人心香火在不消畏壘與桐鄉

一代英雄不數人百年聚散重傷神歌闌牛角天還曉鐸  
振鱣堂道又春泗水尼山聖賢地江雲楚月去來賓淮安



蕩蕩朝天路附驥新吟英厭頻

聞疊山已丑四月七日死于燕

聲名如此付杯羹滿腹琅玕不得呈諾士倘能如孔子殺身未必死盆成骨埋北壤名山重寃入南天上帝驚當日刀圭成謾爾金華仙籍再書名

和疊山隆興阻風

休將鑄錯悔當年事契天心或不然殷士莫嗟留楚棹孟婆久送過河船惜哉燕谷空埋骨自是圯橋少授編畢竟火龍科目貴二山忠義貫蒼天

丙辰科文山狀元疊山二甲人皆死于燕

和疊山送淮安士友韻

金臺去棹倚雲開和餞諸詩已罄懷行計竟為尊魯出櫓聲相逐過江來定逢歸旆榮桑里豈料危機伏茗杯願梓

新吟留宇宙也勝蕪武得生回

和疊山小姑廟

舟如飛葉浪如雷寄與江神不用猜貞士偶因諸老出兩生端為聖門來但沿沂水求雩瑟即返嚴灘訪釣臺可惜漢江風浪定磯頭不見子卿回

和疊山小姑海門第一閣詩

此是長江第一閣孤峯矯首聳遐觀人今人古興亡事帆去帆來上下瀾廟有神明司地險舟藏鬼域過門難吾儕出處憑天道浪自春撞意自寬

和疊山舟過漕港

長江幾載界殘棋未著何知此地危萬舸軍中馬用汝一聲鑼罷竟何之六民墮劫誰階厲百罰鞭只悔莫追欲識



開頭搖手處推蓬一一問篙師

和疊山拜李白墓

唐朝組綬不能羈驢背人者醉似泥自欲駕虬憑化往不  
因飛燕誤宮題江涵采石吟天濶月落青山塚木齋雅廢  
倫止知己少青楓黑塞夢淒淒

和前韻娥眉亭

天經地緯脫籠羈團拓乾坤作彈泥采石青山知己少渝  
川明月為誰題令公望重恩尤重杜老名齋命亦齋擬和  
岱吟才氣短半眉娥影暮雲淒

和疊山拜靈雍公廟

滴血書箋籲帝言此功端已與之天是非成敗人間事生  
死去來方外仙龜背豐碑昏落日鴉巢老木倚孤烟廟前

萬舸隨風下應笑當年漕港舡

送泰山倪布山真人

赤松宗世遠嶽地作神仙粲粲龜瞳碧昂昂鶴骨堅五全  
皇極福三受聖朝宣道德交前輩聲名在集賢作詩聊紀  
實歸與世人傳

和徐中丞容齋舊太山一百五韻贊見

蹇予鉛槧生角角雞鶩食青衿學校身白髮書傳癖萬卷  
老邊筍一區守確宅媚俗懶低眉慕古展長揖少年捺抹  
技志願靡終畢幾載拂高駝蒼梧與西極開雲上衡山景  
仰昌黎伯史記在山川遐踪喜馳驟望嶽企少陵吟岱擬  
太白惜哉阻閩河遊齒朽塵屐悠悠鄙魯心生見歲月歷  
霄壇想風沂恨不沃焦腸文理思楷林手植槐檜栢雖難



陋巷回豈不束帶赤髻年誦魯論揜卷望天級神哉六鰲  
 轉一夜混藩國驅車上金臺卿相去如織逐日未化鄧心  
 血自撞激既慚西山夫尚堪東魯客心旌久搖搖夢寐在  
 屋壁忽逢緹山仙扶我王川腋百拜揖温良叙此宇宙隔  
 秋丁杏壇下展膝陪丈席三聖長幼間樽俎見徐疾翌朝  
 謁林墓稽首龍門詳符驛亭大庭與尼山歷歷撫遺  
 跡書腸廓鄙吝若有鬼物孽慨思今何時文軌混南北春  
 秋一太極鴻濛再開闢草木復甦鮮川原盡疏滌燕趙與  
 秦隴可以勁氣吸豈無中原學共此浩蕩臆扶輿久鬱翁  
 一發定無敵倘不登岱宗何由俯鵬翼遂偕二三子崎嶇  
 歷阡陌蹇裳涉五汶擊爽薄吟錫捫參上天門四海同一  
 碧偃然帝孫尊不於寸山出南衡走奴隸西華失名額中

宵展紅輪萬有破元閔王女毓淵泉流作聖賢澤正氣吐  
 長林不與錄俱訖洛陽帝王所興廢每不測尼嶧香火期  
 未可限千百偃指登封君令人重驚慄金丸巨巧昏何異  
 雉盧擲醜哉驪坑人終然化祀曠刻心假碑篆僥倖脫經  
 瓦豈知覲岳心正在述方職登望雖殊時聖狂不可域吟  
 人類夸譽誰復論順逆北方豪傑地罕見吾其惑遊覽下  
 山來低眉恣搜索或采之道途或求之方冊或咨新少年  
 或質古碑刻掩色到東平得士僅六七在昔遺山翁盛美  
 信難匹一笑洗簪膩臨風倚孤飾汰寥大雅餘古調寄篇  
 什東南十年間往往家有集想今在斗牛安得挹芳苾西  
 方有許平金陵不可襲翼翼望考亭直欲跬步陟四書門  
 戶正蹊徑掃曲筆閭侯上界仙塵溘聊暫謫中興聖人居



光燄出海室亦有河汾翁杜門守貞德深林見孤熊狐兔  
盡驅辟淮陽遺一皓留以鎮東邑復齋上玉樓徃恨抱萬  
憶蜂蝶不作復未暇採織志卓有容齋翁夜光難自匿弦  
鳴風鴈落孰禦箭鋒急所謂魯君子於斯信何必今石太  
山吟誰不媚封續投崖匹夫勇亦有夸介石雄文痛麾掃  
與岳競碣磔一指回萬軍衆質出孤戟古詩三百篇無邪  
是真識餘子月在雲乍明而乍蝕我來見長篇樓下卧百  
尺夫乃面餘人又復產今日文采起具瞻巖巖師尹赫北  
風盡化枳獨此見佳橘橘中有仙翁可望不可摘試把珊  
瑚鉤輕拂蛟龍脊馮夷坐幽宮海若不敢斥方壺靈山高  
借我寸階立從今學仙氣倘不絕塵粒茲行類南鵬九萬  
始一息越久初適齋語笑遺大國道無傾蓋程握手論疇

昔畏剛不三獻荆璞徒自戢舉葭置堂上更僕數一一保  
社多吟鷗望歸心未釋春風吹客衣臂羽不繫願勿距互  
鄉引手肅之入招賢自隗始敢謂崇臺岌人皆笑麾墻吾  
獨喜入室他時報國士豈必在岌漆定有隻白壁照我羈  
窮色山東出相地驛名在目即乾坤愈浩蕩人才寧促迫  
願言眼垂青及此頭尚黑

石塘歌呈吳侍郎

誰刻太素一拳石石殼皴皴涵芳塘塘中清淑族查滓積  
成土塊如浮航三千界分南有南瞻休王帝伯更皇王克  
衢漲作九年潦秦火蕝成百沸湯入昏出曉烏兔俗韜風  
蓄電蛟龍藏巫如鑿開通浩浩女媧煉熟補蒼蒼三山縹  
緲出塘外人云此是蓬萊鄉誰令海乾白石瀾黑風吹散



天風震奮腥蜚穢顛立蝦螺鯁鱔生毫光西江老子一  
口吸噴作萬頃澄汪汪何當長嘯擊拜柄與君塘上酬酢  
傾天漿六平微奉火莫成百報

謝吳侍郎二十

屋角梅花枕魯宮栢臺借運過江東月明鵝定文書靜九  
郡樵樓起烈風吳侍郎

誰道靈光獨不焚孔堂金室至今存皇王帝伯從開闢不

毀乾坤未合門謝吳侍郎

黃池大冰歌

玉斗山人歸自魯迂途携酒酌謫仙丹陽滯留十日雨坐

見平陸成長川不衝不激不澎湃漫高漫長漫囂塵黃池

地勢低且墮築堤種柳名圩田一圩動是數百頃畊民縛

舍沿郊邗良苗懷新交翠浪一刻湊作蛟龍淵倉皇老釋

競祈禱搬移兒女爭牽連村庄草屋浮斷梗黃流黑氣蒸

腥羶市民運一積塏春危如燕壘懸亲撫中宵突雨駛一

决盡與河伯相牽或云嶽瀆潞颺颺吟沫吹浪如吹奠

昌黎諭鯉許戮蜚古今此理容或然粵從天一中入坎水

德流動随乾圍彞倫攸斃五行水汨君舟民水幾復顛神

如鑿窟渝九載到今三十七百年俞時粟麥天不雨蒼生

何賴無瘠捐天變不能違者水民命自以君為天當今君

相即克禹蓄積期會誰當先靈燭李杜在水部叫為我

箋長篇謝吳侍郎

回建德寄馮和峯隱士

王子歸鄒魯知公隱德鄉道為千載惜身抱六經藏青壁



丹崖遠黃花白骨香百年交一臂梅不拜龐床  
和季提學存畊鉛山酌廉韻

先生在荷峯此日賦泉石及今又重午領客酌蓮碧教雨  
落九垓隨地成廉澤師友係天倫豈必同過客孔孟與曾  
顏日月照不息袖香拜鄒魯歷歷撫遺跡沂水并尼山雲  
壇儼如昔晞髮濯我纓揆溘盡湔滌歸來見佳吟轉覺肝  
膽易此事不得再此日良可惜自憐飲食身猶受氣形役  
何當坐百原一嘯脫塵屐

過江絕句

玉勒金臺逐去塵十年多少渡江民中流試扣金山老魯  
有深衣過魯人

泰山

爰梅坐至夜三更坐至三更意未平潛以晉來為己任亮  
將漢去與天爭是心或可道前哲此理如何語後生莫笑  
書生窮到老雖窮到老也留名

茂陵封禪壇

宸齋機魯鎮天闕左右微垣列兩班大展明堂俱翕受黃  
酒東畔少遊山

漢栢

祥符天子舊明堂二丈豐碑宿草荒人世已非壇更是摩  
挲老淚濕斜陽

存素堂

膚剝心枯歲月深孫枝已解作龍吟烈風吹起孤高韻猶  
作峯頭梁甫音



孫明復石守道祠堂

師生高掠二山名千載誰云道義輕  
嶽府栢林風雨夜衣

亭乃孫明復讀書之所琅然猶帶讀書聲

水簾洞

密織多因雨線添  
泉神高掛月鈎纖  
洞仙羞見秦丞相  
故遣東風放下簾

回馬嶺

嶺入青天不可梯  
六飛到此盡遭遲  
異哉猶有秦皇馬  
回向庭前化鹿兒

玉斗山人集終

原序

貞祐南渡後詩學大行初亦未知適從溪南辛敬之淄川楊叔能以唐人為指歸敬之舊有聲河南叔能則未有知之者興定末叔能與余會於京師遂見禮部閑閑公及楊吏部之美二公見其幽懷久不寫及甘羅廟詩嘖嘖稱嘆不已今世少見其比及將往關中張左相信甫李右司之純馮內翰子駿皆以長詩贈別閑閑作引謂其詩學退之此日足可惜頗能似之至比之金膏水碧物外自然竒寶景星丹鳳承平不時見之嘉瑞叔能用是名重天下今三十年然其容於楚於漢沔於燕趙魏齊魯之間行天下四方多矣而其窮亦極矣叔能天資澹泊寡於言笑儉素自守詩文似其為人其窮雖極其以詩為業者不變也其以



唐人為指歸者亦不變也今年其所著小亨集成其子復見予鎮州以集引為請予亦愛唐詩者唯愛之篤而求之深故似有所得嘗試妄論之詩與文特言語之別稱耳有記記述之謂文吟咏情性之謂詩其為言語則一也唐詩所以絕出於三百篇之後者知本焉爾矣何謂本誠是也古聖賢道德言語布在方冊者多矣且以弗慮胡獲弗為胡成無所作好無所作惡樸雖小天下莫敢臣較之與祈年孔夙方社不莫敬共明神宜無悔怒何異但篇題句讀不同而已故由心而誠由誠而言由言而詩也三者相為一情動於中而形於言言發乎邇而見乎遠同聲相應同氣相求雖小夫賤婦孤臣孽子之感諷皆可以厚人倫美教化無他道也故曰不誠無物夫惟不誠故言無所主心

口別為二物物我邈其千里漠然而往悠然而來人之聽之若春風之過焉耳其欲動天地感神鬼難矣其是之謂本唐人之詩其知本乎何溫柔敦厚藹然仁義之言之多也幽憂憔悴寒饑困憊一寓於詩而其阨窮而不憫遺佚而不怨者故在也至於傷諛疾惡不平之氣不能自揜責之愈深其旨愈婉怨之愈深其辭愈緩優柔饜飫使人涵泳於先王之澤情性之外不知有文字幸矣學者之得唐人為指歸也初予學詩以數十條自警云無怨懟無詭浪無驚狠無崖異無狡訐無媵阿無傳會無籠絡無衒鬻無矯飾無為堅白辨無為賢聖廟無為妾婦妬無為仇敵謗傷無為聾俗闕傳無為瞽師皮相無為黥卒醉橫無為黥兒白捻無為田舍翁木強無為法家醜詆無為牙郎轉販



無為市倡怨恩無為琵琶娘人魂韻詞無為邛夫子兔園  
策無為筭沙僧困義學無為稠梗治禁詞無為天地一我  
古今一我無為薄惡所移無為正人端士所不道信斯言  
也予詩其庶幾乎惟其守之不固竟為有志者之所先今  
日讀所謂小亨集者祇以增媿汗耳予既以如上語為集  
引又申之以種松之詩因為復言歸而語乃翁吾老矣自  
為瓠壺之日久矣非夫子亦何以發予之狂言己酉秋八  
月初吉河東元好問序

小亨集

蓄川

元 楊宏道



蓄川膾膾間田可耕孰非人子耕我先塋  
蓄川膾膾間田可藝孰非人子藝我塋域  
皇天后土日月照臨汝耕汝藝行者傷心  
姦回自終可按可考利見大人全我孝道

古興

貞松千歲質挺生喬嶽陰青崖樵徑絕斤斧胡能侵來者  
不可測禍福常相尋狂風吹暴雨倒瀉江海深霹靂根半  
斷直幹猶森森無人為扶持默傷仁者心  
平原陷為湖浩蕩迷津步中有斷纜舟楫舵失先具風濤



無定期浮沉付冥數忽忽已三年未知止泊處余生天地間正可以此喻春郊麥將枯吁嗟望雲霧

遺興

庭草泣晨露孝心悽以悲清溪有蘋藻誰當採擷之黃金入富室務積不務施孤鳥東南飛巢在西北枝

雜興

槐檀出新火金鼎羹大截螢尾有微明誰責烹飪事日月澈曾波老蚌含珍異采之光照乘魚目難擬議李白桃夭天上苑春明媚雨露成嘉實燕賞歌既醉無名閒草花開落自榮悴莊周談天倪垆野非棄置

幽懷久不寫一首效韓子此日足可惜贈彥深

幽懷久不寫鬱紆在中腸為君一吐之慷慨纏悲傷辭直

非謗訐辭誇非顛狂流出肺腑中無意為文章兒時捧書

卷十日讀一箱少年弄柔翰開口吐鳳凰正月號悲風總

帷掛萱堂先君官汝陰九月飛嚴霜累累二十口丹旒迴

南方餘年十一月喪有叔不讀書但知禽色荒呼盧畜

鷹犬置我遊戲場珠璧不受污拂拭增耿光郁郁弭南溪

絳帳縣郡庠組繡合尺度道業傳諸生摠衣無幾何义手

一韻成南溪具酒饌列坐子姪行青綾覆我身醉卧家人

傍雲間陸士龍秋試獨騰驤南溪先生之弟庭賢名天明

年桂枝春兄弟雙翱翔半途失明師欲濟無舟航故人何

元理庸名中白日照忠誠勸我從延賞然後學明經三年走

遼碣險阻實備嘗鯨翻地軸傾狼狽歸故鄉鐵馬逐人來

蹴踏般溪水朔風振屋瓦巷陌屍縱橫鳴鏑射迴鷹冰消



溪水清親朋半凋落殘月依長庚婉婉兩稚子面黥刀劍  
倉田園幸無恙出郭依農桑鋤耰于戈裏三稔無積倉一  
官調神京妻子不得將風塵復瀕洞齊魯多豺狼賡歌無  
家別揮淚哭途窮李侯藝九畹早播芝蘭香奇字來無趾  
側耳屬垣墻粒鈿剪翠羽墮珥捨明璫綴緝不憚煩既成  
衣與裳一朝忽變化頭角高軒昂男兒可如此陋質傾高  
風庶幾困而學否極承變通師說無賢鄙事業有專工苟  
欲為貿易入市審鞠躬恩袍映野草道與人俱東負笈遠  
方來岐路無修長拂衣叩君門樹屏遮長廊溫言當八珍  
令色充壺觴遠來誠饑渴蔓說辭乞漿秉心在黑白掉舌  
談青黃臉紅眼尾斜引手摩匡牀自惟珉珉石不中珪與  
璋君家杵臼閒何事春糝糠乃知畜奇貨韞匱方深藏仕  
途得捷徑改轍歸大商紛紛輕薄子仁義久已亡彼非仁  
義仁義何可當夫子青雲姿疑似令人驚在我固自存為  
君惜清名冰雪正凝沍屈指廻春陽皓鶴毛骨輕雲靜天  
蒼蒼

遊寧山寺入小敷谷

層層窳坡坡建標梵王家寶殿倚絕壁栢逕通門斜入山  
石龍從峽路銜犬牙長溪轉白龍架溜行青蛇迅激巨輪  
翻濺濕生石花出山望平野天鈿蒺藜沙暝色自遠至青  
林欲棲鴉蟬聲促歸思亂響如縲車

大名贈員善

小年嘗學詩中年多詩友員子豪於詩而復豪於酒不知  
何所見愛我心過厚報之以新詩金石非堅久



贈李正甫

富貴侈車服鮮麗生光輝貧賤竊慕之勉強終亦非東家  
借駿馬西家借新衣顧盼驕路人識者多笑譏貧賤當勤  
劬富貴起細微俸秩既豐厚不復布與韋詩人有佳句剽  
盜相因依逮其能已出此道方庶幾

贈李尊師

李君本神人冥晦居山中還丹九轉成顏色如兒童致虛  
感元氣語默與天通頻歲傷水旱下民食不充祈求降雨  
澤呼召生雷風上帝聞其賢行事多陰功策名紫虛府進  
位稱仙公騎龍上天去此樂無終窮

城隅有一士

南山一何高北渚青茫茫可憐佳麗地荆棘三十霜芟夷  
營大宅列肆來羣商倡優日歌舞鞍馬照地光城隅有一  
士坳垣繚茅堂習坎失生理家人知義方貌言外卑遜節  
行中貞剛荒涼衆所棄上帝歆其香

洛陽別友

羣居人間世品彙各相索性外更無物樂處當自識東州  
有詩翁西州有文伯欲往不計程相逢心莫逆茗酪以為  
飲梁肉以為食古今入商訂經傳爭辯析西風旦夕來面  
上無畏日何以說妻孥歸裝滿詩什

般水

般水出南山輦行渙與淄雖然未知名亦有神司之惟人  
神之主主亂荒神祠冥冥西南去河伯多禮儀沂沚接伊  
洛涇渭同遨嬉漆沮品秩下不敢相追隨竭來通漢沔增



大西南時泓澄潛怪珍名號遐方知馮夷御白馬導我朝  
天池長淮湧巨浪陰獸翻俯鬢蹭蹬返故溪歲早流如絲  
敢論尾閭泄甘受蹄沓欺三山興雲氣擁淹從靈旗云是  
東海君按節巡方維不言恐失人自獻誠非宜二者當處  
一故作般水詩

經歷司壯軒外新竹房

經周御子賦之

高人例愛竹居必置左右此君有雅操凜凜歲寒後黑水  
埋荒烟川闊多肩胷楚山昏瘴雨石罅挺纖瘦風俗事樵  
蘇斤斧莫恕宥蓮幕地深嚴得所逾靜秀青苔春雨足黃  
壤潛陽透瑤榭撲霜粉稚子解衣繡義伯歌朱華新綠鬱  
滋茂羣賢贊威德堡障息烽堠北軒洒蒼雪飲奕破清畫  
我本性介持禮法以自圖行年涉強仕懷玉賈不售何用

羨此君更積文行富

玄鳥

太牢祠高謀墜典今誰修何處王謝堂燒痕草芽抽玄鳥  
亦自至故壘不可求銜泥營新巢雲海浮蜃樓甲第金臺  
傍過者疑王侯晨曦明畫棟珠箔上銀鈎  
石盆石菖蒲  
山迴瀉流清瘦莖生九節參桂伯仲間芝蘭媿芳潔重城  
煙塵昏客土膏液絕靈藥不可活我心方蘊結巧匠刻雲  
根汲井注寒冽青青漸滋榮歲晚堪采擷

橙實蠟梅

鳳翔晉照方文席上與寶鷄主簿李時舉同賦

清霜洞庭實萬里登君庭香膚縷黃金粲明秋泉餘子甘  
棄置使與梅爭妍管庫七十家用則成才賢才賢



邠城僧院二首示縣令

君昔為高陵其治在渭北烽火照西邠樓山避鋒鏑東轅  
改邠城浩蕩弄春色莫壓公事繁客來方退食

清晨出都門西望小峨眉中途復徘徊試來一見之授館  
蕭寺中花木榮春熙竟日無人至虛庭看遊絲

送張縣令赴任符離

興定紀年後治道日修飭縣令選尤重非人莫輕得東陞  
控淮泗隱見吳山碧嘗獲白兔瑞賀書出韓筆百里今付  
君陽關歌祖席和風翻行裾花光照長陌十年宿重兵涉  
春微雨澤鯨鯢雖陸死餘孽尚狼籍二事俱可憂軍食與  
民力君名在蘭省安能淹此職勿謂不久留而遺後人責  
常思君子居一日必加葺

開闕子

我本闕闕子結髮事文章處世逢厄運坎軻徒自傷鷄鳴  
狗盜間溷跡潛輝光凶年大兵後荒城守空倉負擔非我  
事徒步昔未嘗四肢不勝勞憩息坐道傍仰觀雲悠悠俯  
視塵茫茫東風吹歎聲麗日為蒼涼

凌霄

凌霄失高樹體弱無所依幽禽辭其巢萬里將雛飛故園  
霜雪繁野水稻梁微孤根幸不死會有重芳菲刷羽待高  
風要趨花時歸

鄮縣道中

京東千里平孟冬如季春寸草不蔽日汗滴途中塵異哉  
中州地若與窮髮鄰誰持種樹書遍授東京人



次韻張敏之新居

廢地久不居荒穢難平治經營幾朝暮眼底無棘茨開門  
見南山山若因君移五言成新詠初不用意為陶謝無異  
源韋柳相連枝平淡含道腴好味同園葵賤子少年日壯  
志生馬馳句格喜孤峭劍鋒白差差有意不能達竟日持  
紛絲投筆忽自笑作者安敢期幸遇斷堊手運斤與刪釐  
毀譽不足信明者貴自知君昔登瀛洲物論咸稱宜忽有  
萬里行雨雪歌來思濟南一茅屋如在瀛洲時學道苟無  
得淚灑楊朱岐同年李夫子尚恨君來遲萬事一杯酒共  
和新居詩

赴麟遊縣過九成宮

百里蒼山深地高無畏暑當時移天仗巖谷化玄圃隋隨唐

迭廢興俯仰成今古行人過故宮馬蹄踏柱礎尚餘粉皮  
松野老談女武玉龍拏層崖直立嘯風雨最愛醴泉碑伯  
仲廁虞褚石本遍天下墨藪刈其楚年時北風惡淫火焚  
邑聚披榛拾瓦礫周歲何以處

稠桑道

悲臺號長風驚沙暗濁水枝股百道流剗削兩崖起南卧  
稠桑道天穿二十里黃塵深沒脛遊子心欲死讀書性所  
樂困阨苦違已何日息奔騰秋堂富文史

獅子石

奇獸生異域厥名徒耳聆百步走魑魅說多不經世俗  
或信之粉續當戶庭塊然園中石髣髴奇獸形強名初不  
不似園石本頑冥使君福未艾百指長康寧



木芙蓉

南陽氣候溫四序花相續十月木芙蓉鮮鮮鏤香玉花如  
朝槿妍葉擬文楸綠惜哉開既晚桃李占春旭

袁易靜春堂木芙蓉

少昊秉秋律白藏振嚴威淒其庶物肅颯然羣卉腓茲花  
性莫奪於焉抱貞姿紛披曲榭陰布獲蒼沼涯沁蓮混名  
族叢菊相因依衆芳固殊品相時各有宜承露愈幽艷被  
霜增華滋雖微後凋操詎先秋草萎臨流誰為容倚風猶  
自持踟躕翫芳態為汝發幽辭

東坡石鍾山記墨迹

先生元豐後筆法陵晉漢模擬徧天下真偽紛相半嘗經  
石鍾山作記濡柔翰流落百年間水漬頗壞爛從何得此

本裝軸成珍玩卷舒眼增明百偽莫能亂夢奠微言絕箋  
注多乖叛先生傳家學論著入條貫新經去王氏但付一  
笑粲水經文簡省陋者亦欺謾事在耳目外未可以臆斷  
李渤姑無論道元亦足歎

繡犬馬圖

乳狗銜雉尾驄馬繫絲韁舐筆不敢下衆史空彷徨匠人  
出新意一寸金針芒絨縷錯彩色毛滑浮神光閨中癡女  
兒七夕施新粧年年拜牛女乞巧羅酒漿自從見此圖不  
刺雙鴛鴦

古寺

荒陂廢佛寺古殿依閒雲殘僧杖錫去却駐防河軍天晴  
山色遠地迴河流分詩成獨立久壞壁夕陽曛



玉泉院

密竹不見地獨園不知門得門未逢人絮絮溪聲喧外階  
拂塵服合掌瞻世尊方袍二三子磬折禮數煩飯罷啜佳  
茗緩行腹自捫同遊喜清閱快飲卧空樽暗渠出泉眼細  
逕通山根正月笋未生積葉覆蘇痕亭午陽光薄竟日夕  
陰昏燃燈照虛室掃榻眠幽軒鷄鳴出門去溪流醒夢魂  
據鞍一回首但見翠浪翻

祀事不可黷

祀事不可黷客頻造靈祠拜跪膝成瘡堪笑還堪悲問之  
默無語良久方致詞有身處人間鬼神疇能知固當求之  
人余亦嘗求之千求不首肯萬求不俛眉違理而忘求閉  
拒固其宜奈何非妄求閉拒常如斯且復祈冥冥聊以慰

所思言絕仰面哭涕泗縱橫垂

中庭植梧竹一首

中庭植梧竹有意集鸞鳳孤鶴從東來雪衣曬朝陽主人  
驚且喜拊掌呼獲臧俾投數粒粟招鶴下階傍鶴雖不解  
語其意或能詳我非鸞鳳侶竹梧何可當亦非黃雀傳數  
粒安可嘗戛然欲長鳴恐遭彈射傷左右梳修翎翻身入  
雲翔

雲泉院

長原崩赤土形醜窮且卑人靈代天巧竹樹施屏帷蔭蔚  
凝青靄磨戛生涼颼隱見阿蘭若寅奉竺乾師劇場挿殿  
脚洞安門安榻陵霄燃明燈吐焰髯龍枝芭蕉駐翠鸞妥  
尾靈泉池方秋流不竭一片青琉璃裊裊架蒼竹水筋縣



無時甘冷怯漱齒雅與烹茶宜肘腋野人家屬屬聞離離  
聞說員莊好未竟神已馳去此無十里水竹尤清奇窮通  
常傍人落日遊子饑志顧恒滯違不獨在於斯滯違亦自  
佳庶曰昌吾詩

晨興

晨興意不釋茫然坐多時書帙空插架盤食懶拈匙筋骸  
厭踈躅曳履下階基傷心窓外樹霜葉寄寒枝

送仲遠

仲遠豪俠人蹤跡因超越舉世皆侏儒獨有專車骨我獨  
何為者折節希前烈嘗進上履屢結庭中鞅今夕祖君行  
坐愁長庚沒冷落盤溪雲相思夷門月

攬秀亭

微宵媚淑景國香渙瑤英流光追飛轍薜華爛朝榮木

紅粧蔭翠憶顏色俱傾城蓮清泉清靈藥細葉開瘦莖

石蒼頑蹲怯石虎兕伏威猗石子龜夫時曝背龜仙

馭能長鳴鶴碎金溥露白蘊叢玉搖風清庭使君衣縫掖

頽然早成名金紫豈不貴道重外物輕觀化一亭中卒歲

娛同情

杏園詩二首

綈袍倦晴晝者落瓶中花朝來借長鞭走路平堤沙杏園  
一片白不辨枝橫斜嗟余出最晚猶及見春華  
青雲二公子相約聯鑣出杏園色憔悴把酒酌春日攀枝  
紛墮雪嚼蕊香如密花落亦無傷綠陰催結實

雲巖



新軒有奇石既異人多聞何時名雲巖小字鐫八分承以  
青銅槃槃底歲清芬雲根浸新汲巖竇俄氤氳客來淨掃  
地侍香添寶薰主人竟無譽觀者心自欣物既得所主在  
君即屬君細巨盡如此不須強云云壽王辯漢鼎其說非  
虛文雲巖新軒石香乃雲巖雲

齒搖

齒搖眼始暗庠甲到知非菽粟價如土我獨憂年饑農春  
汗浹背暮汲月在衣弛擔長太息數口將安歸  
出門登長途風塵飄短組到家投空囊霜月照環堵同胞  
陷塗泥委蛻化黃土山陽夕羈客有客心<sup>獨</sup>苦  
我本幽棲士強廢彈鋏歌俾汝為馮驩所喪亦已多授書  
不耕獲藜羹養天和白圭有淑質微玷尚可磨

詠鶴

雲羅偶見羈憔悴離江浦剪羽久乃馴燒地教之舞圓吭  
引清唳似欲訴心苦客子居城隅哀吟<sup>吟</sup>淚如雨

聞有將遊空峒者示之以詩

塊破兩土山川獨濁涇注古城隨地形南方劣千步客從  
扶風來觸目意甚惡夢想終南山時咏退之句曉毛在眼  
前昧者不自悟十室有忠信貴耳多賤目竚頭倚青壁一  
舍西郊路昔在帝軒轅泳鹿赫斯怒允暨為鯨鯢一戰正  
王度猶慙廣成子清潔理亦具茲山嘗駐蹕北面承教諭  
何<sup>時</sup>起宮室土木儼像塑年年夏孟月虛邑事遊聚凝粧  
耀巖谷浮嵐潤巾屨亭高參青雲顛敞快瞻顧蒼松龍欲  
飛廢寺金重布君侯來西臺二府傾注措談辯驚賓筵戈



予森武庫名山契真賞駿馬思並驚當招列仙癯為解升  
高賦

悼亡

賡歌相思未歌先淚垂憶昔初裏頭娶妻濟水湄綢繆  
十載間憂患雜歡嬉一朝遭喪亂倉卒不得辭荒城落日  
哭悲在留兩兒兒癡誠可憐鞠養失母慈再娶般溪上婦  
道良同規願從髮抹漆得到頭梳絲奈何同冗志眷戀方  
再暮食負居難安一官調京畿分袂未云久故里嗥狐狸  
凌霄失高樹化作柔楊枝推枯與攀折寂寥兩不知沉痛  
傷人心出何所之路逢翁與媪偃偻行相隨感我少年心  
兩度生別離

赴京

栢舟泛清濟慄慄晚秋時畏途愁落日沂流行苦遲夷門  
望不見籠水牽所思默坐柁樓底寸心空自知

送李正甫赴渚詩

武昌在何方君今去處是借誰同舟秦氏佳公子我身非  
範氏安能長在此相思復相思滔滔江漢水

襄陽送秦才叔赴鄂渚詩

高門多驕子愛君性溫舒南北分彼此愛君懷抱虛黯然  
倍長情解纜傷何如從今槎頭鱸不及武昌魚

祝心

祝心同灰冷祝心同木稿典衣授衣月身口交相惱愁來  
出郭門散步入青草南山亦多情依然向人好

東林



翩翩優弓鳥日暮擇所托西林不可棲東林光沃若上無  
巢鳶巢下無狐狸窟一枝有餘安風細蟾光薄

過燕

正月到季月常厭風為政綈袍脫復着天氣殊未定花殘  
無奈何麥短農事病客驅長耳來道路方且迫故都廢未  
久所尚猶可敬慷慨憂人憂不但倚豪勁今歲歲逢酉古  
語庶有證唯酒可忘憂朝來風色淨

歸隱

客從長安來色沮氣不伸問之何因爾憔悴居賤貧忠誠  
照肝膈文彩通詞臣二者苟有一亦足其其身後前莫推  
挽坎珂秋復春嘗欲仗一劍萬里清風塵從軍亦云樂神  
武知何人又欲挾一策強國活斯民夜叉守天關帝所高

難陳安能舉進士得失悲咸辛十年一主簿鞭箠還吟呻  
安能同市利狙詐忘吾真所得雖倍蓰愧汗霑衣巾聞說  
商洛山深風俗淳自計亦已熟抱書歸隱淪窮年讀經史  
志一疑於神天道有反正豈曰長遭迤諸君勲業了我道  
亦精純禮儀稽在昔政化持平均出山應未晚日月明昌  
辰

代茶榜

歸義寺長老勸余作此詩長  
老姓英字粹中自號木庵

東方有一士來作木庵客嘗觀貝葉書奧義初未識叢林  
蔚青青秀出庭前栢滿甌趙州雪灑向歲寒質師席有微  
嫌授客遠公筆俾之贊一辭智井若為汲低頭謝不敏亦  
頗習詩律以詩代茶榜自我作故實



東古自一士來非木亦谷嘗賦以葉書其遺味亦庶業林  
外為詩  
亦蘇賦  
志一  
亦蘇賦  
志一  
亦蘇賦  
志一

小亨集

會燕入  
元

楊宏道撰

贈裕之

嘗讀田紫芝麗華行惜哉紫芝今不存日者見君詩與文  
知君在嵩少神馬已面西山奔國家三年設科應故事君  
亦未能免俗東入京西門低頭拜君昂頭識君面碧天青  
嶂秋月昇金盃未省田紫芝何以稱矐元乃知紫芝文詞  
固豐艷至於題品人物猶作涇水渾入城市井喧出城草  
木蕃嗟我廢學胃次迫隘但覺擾擾俗物遮眼昏天下本  
多事君子宜慎言譬之山之鄙人終日木石間而不見瓊  
璠

李廷珪墨歌

趙節使治卯平涼運同知張顯之來宴  
於公署之凝香閣致政張相公在座余



亦與馬節使出示李廷珪墨席上試墨余戲以墨  
汁漉酒中飲之明日出此篇二老皆有和詩

輶車下涇川二老歡忘年夜寒辟易凝香閣長檠粲粲金花然平頭奴子捧漆匣錫圭入手輕而堅客卿喬孫滿天下系出隴西獨稱賢座中有客慙菲薄藜苳貯腹空便便朱提飲盞漉芳液玄雲靈霽浮秋泉一酌濡夢傳之柔翰再酌霏蕪穢之靈田祈禳厭勝古亦有合座拊掌嗤且憐君不見將軍欲酣出刀稍作氣欲斬橫海鱣客卿如靈俾我慧悟加諸前待渠宣力復舊封城雅什願讀車攻篇

寄鞏州司農少卿李執剛

潦水已除泥尚濕疽瘡既平膚尚赤去年田瑞據鞏州反細烹糜粥食疲人明示金科懲暴客朝廷好爵不輕授夙夜小心憂重責政成合沓起民謠一片青青襄武石

投鄧州節副劉光甫祖謙

仲秋八月離平涼隴水光寒涇水黃弱妻抱子乘瘦馬服玩附行猶一囊鄠郊藍水不敢住東深杳崔嵬歲洛陽十月戎馬嘶市人散走如驚獐携妻抱子竄山谷倉卒不暇持資糧山高樹密積葉滑側足數步顛且僵倒身枕臂天欲晚頭上肅肅飛嚴霜勞筋苦骨數百里今日得升天子堂一囊服玩不復顧數冊猥豪情難忘君能貸我一茅屋忍饑默待明時昌

戲荅游麟之

游麟之之麟游欲去未去邊風秋鳳翔辟壘壯如鉄從此始免為俘因驚魂悸魄返恒幹故當北望山林羞柰何健筆恣嘲弄大篇長句令人愁



若人

哀痛淄州城再破千里蕭條斷煙火當時逃難逾黃河二  
紀歸來非故眼前十口不安生白頭又復辭先塋若人方  
寸包藏惡害慘於城陷兵

望南極

老人深居未嘗出我欲見之不度德斗量明珠秤稱壁越  
羅蜀錦千萬匹紫沉白檀隨海舶輯之燎之半天赤香霧  
中間巖尊瘞如此庶幾見髣髴汝家搜索有何物布囊破  
裂筐底脫心知不能情未能夜夜中庭望南極

題老子廟

乾壕石壕過峻阪骨煩筋殆思寬平蒼崖小殿揭金榜冷  
泉高樹夕陽明流俗相傳禱靈藥妄以沙土欺聾盲但知

經過記歲月小字壁間題姓名

甘羅廟

峻坂欲盡長坡迎後山未斷前山橫甘羅廟下四山合太  
始鬼物成天道道傍一峰立突兀瘦木上下攢飛甍此即  
片紙附遷史勲業不足煩題評尚憐稚齒據高位因使細  
人輕晚成山間一笑為絕倒多少豎子談功名

南陌梅花詩示張守道守道見和復用前韻

春茅茅屋晨興遲起來倩人為折枝緬懷騷客賦蘭菊蓋  
喻忠信期君知聖垂垂訓惡無禮東家不敢鑽穴窺早梅  
香好動詩興已恐落英嗟後時故園堯李委塵土怨調曾  
託長相思小兒蟣蝨滿黃髮何處亂山尋玉卮

疑夢



書封圓細書旨勤書中字字非虛文鴻鵠垂翅志霄漢飲  
啄不肯隨鷄羣堂前趨走典謁者堂上軟語芝蘭薰出門  
月朔忽月晦敬聽命召寂無聞覆蕉求鹿不知處自猜身  
是淳于棼官街馬過不聞聲但見飛蓋飄青雲

鷓鴣

鷓鴣鷓鴣生炎方有耳未嘗聞北翔鷓鴣鷓鴣何形色北  
人見之應不識前朝鼓吹名鷓鴣上稽下考不見書而今  
歌舞聞見熟試為後生陳厥初東驚有臺高百尺北望驚  
吁半天赤塞垣閑棧夜不扃河南河北無堅壁鷓鴣飛入  
酸棗門青衣行酒都民泣長淮東注連海潮終南山氣參  
青霄大田多稼際沙漠幽州宮闕何嵯峽金天洪覆需雲  
潤內自封畿外方鎮霜葉烟花秋復春妙選細腰踏繡茵

優絲伶竹彈吹闋主人起舞娛筵賓玉帶右佩朱絲繩牌  
如方響縣金銀低頭俯身卷左膝通袖臂搖前拜碧露臺  
畫鼓鳴鼉鳴長管如臂瀆宮聲初如秋天橫一鷓次如沙  
汀鴈將落紅和分行齊拍手婆娑又似風中柳鷓鴣有節  
四換頭每一換時常少休次四本是契丹體前襟條閃靴  
尖踢或如趨進或如却或如酬酢或如揖或如掠髮把鏡  
看或如逐獸張弓射踰躑躅更多端染翰未必形容彈  
主人再拜歡聲沸酌酒勸賓賓盡醉僚屬對起相後先襟  
裾凌亂爭迴旋鷓鴣為樂猶古樂大定明昌事如昨風時  
雨若屢豐年五十年來人亦樂勿言鄭衛亂雅歌人樂歲  
豐如樂何朱門兵衛森彌望門外聞之若天上隗臺梁苑  
烟塵昏百年人事車輪翻倡家蠅營教小妓態度纖妍渾



變異吹笛擊鼓闌闌中千百聚觀雜壯稚昔時華屋罄濃  
歡今日樂棚為賤藝白頭遺士偶來看不竟傷心涕霑袂

懷春怨

妾身可以化石妾手可以縫裳薑桂失地而猶辛桃李非  
時而不芳睡起倚門獨佇立翩翩蝴蝶過鄰墻

邂逅

過燕不見世子丹趙不見平原君煩襟清濯易水風破

欲拂恒山雲天生奇才無古今邂逅辭氣如蘭芬北遊得

此亦可樂繫筑奮鋌何足云定初識高初識飛劉道濟

金陵徐信之牧牛圖

誰貌吳牛馱牧豎建業徐生寓深趣母子孤特失侍侶行  
行暫息烟中樹九十其博何處尋或訛或寢隔山林牽柔

折脆方為劇詎識離羣舐犢心

贈裕州防禦

皇帝二載歲乙酉八月花川墮天狗田瑞據鞏州反省親釋黨可

攻心田瑞之不在結趙連蜀憂掣肘運芻輸粟正整整據

甲執戈徒赴赴聊城朝飛仲連箭城中夏人暮擲惠琳

首借籌功大克渠魁失馬過輕傷利口防禦時為行者即

萬家特旨昇韋虎千里長誥得杜母憶昔軺車到鳳翔特

遣朱衣邀馬走金剗剗橙催賦詩鳳翔善照方丈席上銀

盃行酒無停手許遊蓮幕廁英髦欲馮蘭湯洗塵垢武陵

回首山縱橫薦福打碑雷震吼禦已罷職馬首東之詎

可留鷄肋空持復何有噉風驚聞沙塞馬挈家來覓商巖



叟控弦突騎若憑虛戰格連雲如拉朽洛南屠滅彼何辜  
渾谷奔忙誰敢後仰攀危磴蝸篆壁下墜深阮杵投白血  
屬有幸脫微軀家其豈能存微帚恩全始終屬賢良仁濟  
困窮多福壽借君寶劍買黃牛苟全性命歸南畝

賞菊張濟道家分韻得菊字

鹿車西來聲轆轤夜夜空山草間宿今年蝗旱草亦無懷  
川竹林如帚禿旅人懷抱從何如失喜君家籬下菊况逢  
名勝宜盡歡談笑未終眉暗感賦詩把酒獨移時日下風  
淒體生粟吁嗟世上無唐衢若有唐衢見應哭

詠晴

二月已破春將殘連朝風雨春猶寒烟宵日出好天色城  
隅花柳猶堪觀萋萋芳草平沙路乘興招君共君步恨無

樽酒助清歡賴有溪藤書鄙句荒城勢與河流灣憑高  
望遠開愁顏天低野闊樹如薺幾點翠色符離山寓形  
宇內宜自適吾土他鄉奚所擇與君同立東風中一笑  
相看誰是客

常武殿試護衛歌

夷門上傾瀟水渾東方日出天下明湯盤既銘德日新  
萬國貢篚來燕京朱門霜戟崇元勳鳳毛麟角歌振振  
白弓長箭紅鶴翎紫薇垣外羅天兵鯤鵬變化寔通津  
百年聖神相繼承正大天子壽萬春恒山風暖河源清  
爰得方召為虎臣虎穴生子被奇文殿前較藝羽衛陳  
弓稍拂弦霹靂聲聚星玉版湛玄雲宣城紫毫點姓名  
高門繼世承天恩



謁詩

鈔本

我夢神遊入官府少年掖翁出東廡傍人相仍竊笑語  
 掖翁少年乃宗武須臾呼我簪<sup>傳</sup>楹聞汝頗有能詩聲奈  
 何低首就驅役時為刑部委差官更勿赴我詩壇盟慙惶趨出  
 肩背縮偃、步逸山之麓忽聞笑語愕眙之小橋流水  
 環青竹仙人雜坐陳壺觴舉酒揖我邀我嘗數盃萬慮  
 都不記恍然寢室明晨光人生大抵如夢爾夢飲陶、寤  
 猶喜益知飲酒可忘懷市東走訪劉夫子寧州劉先生玉潤甫  
 衰髮不勝簪研丹點句傳青衿世緣消盡唯好飲縱欲酌  
 我囊無金元年建亥月官有陳省雜滄州陳歌和之嘗欲醉先生省  
 雜豈苟合元年建亥月官有呂諮議真定呂鑑仲寶嘗欲醉先生  
 諮議亦誠意陽月風日如春熙梅花三兩開南枝二官清要

少公事願從先生一訪之

雪晴夜半月出戲效李長吉

瘦日已匿崑崙西太虛漫、朽濁泥濃愁蠹心欲成粉耳  
 根似覺殘蟬嘶孤螢尾暗蝸聲靜銀闕照耀神驚迷冷光  
 直上三萬丈團黃一點通靈犀天花飄盡桂花發陽鳥却  
 避城烏啼樹枝不動印空碧凝雲樹外橫長堤

琪樹歎

初見琪樹稍出墻再見琪樹花飛香涼風蕭、雁南翔峴  
 首山前多稻梁龍沙高馬肥如羊漢陽漢陰為獵場旅雁  
 哀鳴野水傍琪樹晚實天早霜不獨琪花少顏色中州草  
 木皆萎黃

王子端溪橋濛雨圖

存素堂



皇風皞皞吹王民樂哉大定明昌人文章與時相高下黃  
山竹谿麕而醇秦碑晉帖落萬紙明珠白壁非常珍興陵  
佳氣成五色聖孫龍衣居紫宸三十六宮誦佳句翠簾不  
捲楊花春子端振衣遼海後學一變爭奇新黃山驚歎竹  
谿泣鼎鐘騷雅潛精神雲山烟水無常形潑墨不復求形  
真挽弓楊葉百中後衆人擊節高人顰君不見傳呼畫師  
閻立本池上愧汗霑衣中丹青馳譽尚如此溪橋濛雨徒  
自塵淄川賤士長安客品題不慮旁人嗔

小亨集卷三

晚晴

一雨破煩暑獨涵晚晴高高人澹無慮客子若為情殘照  
望中下亂蟬聲裏明冥冥百靈散何處覓虧成

次韻趙司理山甫

身喜霑皇化心慙讚老成青衫初借箸白髮已全生會計  
唯期當康寧未營營如何清夜夢常繞大堤行

留別劉伯成王景伯

公幹文無敵義之字有聲三年今日別千里隻輪行學海  
君能至為山我未成受田如古制應伴野夫耕

別仲經



相逢常共被東縣與西州無策不成事有身空遠遊如君  
勤問學度日亦窮愁濡沫能微濕生涯善自謀

麟遊秋懷

敗葉落還落北山深復深暮雲封遠恨涼吹和微吟鏡裡  
雙蓬鬢霜餘一絮衾求仁又何怨安取四知金

遣興

襄鄧留多日淄青即故鄉落花紫綺席飛燕拂雕梁巢穩  
由知捧風飄未可量履新冠已做上下豈無常

答張仲髦

韓杜遺編在今誰可主盟故人相敬愛健筆過題評風鐸  
不成曲候虫常自鳴吾詩正如此未敢受虛名

陪趙節使遊旬雨亭

西郊迎使節飛蓋轉崇墉石逗楚天雨山巢炭谷龍清溪  
羅帶曲雜樹錦帷重更覺晉公樂

張參幅巾兜姪從政

贈鄭尊師

茫茫雲着地撼撼雨交天篁竹連河上青茅盡海邊棲遲  
聊應化放曠且談玄相對蒲團坐清風為肅然

遊石龍窩

何處浮休宅山公從葛強蒼崖晴散雨紅樹晚凋霜翠琰  
尋詩讀銀瓶湯酒嘗茲遊乘逸興不覺到斜陽

贈馬升公

學出齟鈴外身從筦庫還著書期後世辟教卧空山渺渺  
追前列區區若是班尚為妻子累時復見人間

贈呂鵬翼



燕市重來日東風兩鬢皤行穿鞍馬過意厭客塵多青眼  
常相見朱門不重過如君古漆井澄湛已無波

風雨夜泊

舵鳴風逆水大纜更維舟競起如相約喧呼久未休收燈  
陰漠漠聽雨夜悠悠料得茅齋裡家人為我愁

次韻田長卿

欲伴秦人隱桃源何處尋俯慙魚在藻仰羨雀投林未有  
絲生鬢寧無血染襟回頭望卿國靄靄暮雲深

鑑上人

畏日照城郭誰家庭戶清禪房留過客詩筆見高情仙果  
根株異湘紵節奏明如風行水上文理自天成

次韻趙晉卿二首

寒更不易旦松竹滿庭風未寢覺燈暗欲挑憐燼紅四隣  
飛化蝶一室學冥鴻吾道本如此孰為窮與通

寒更會有旦松竹靜無風一室虛生白半窓明映紅能文  
韓吏部歸隱漢梁鴻吾道本如此孰為窮與通

喜聞特賜麻知幾及第知幾名

麻子明經術詩名亦遠揚連年不中第掃跡欲深藏廣譽  
開宸極新恩照勃黃少時以病罷歸路益生光

抱璞

抱璞人間世從渠知不知但能安義命何用禱神祇乳下  
子初育柔柔蠶亦孳衆人應昧此擾擾競奔馳

重到碭山示白文卿久不歸所寄  
表故有是詩

不解營微利元非市井人麥秋農事遠花月客途貧路隔



魚山水衣餘毫社塵小免無倚賴夢裏鹿臺春

示亨甫

靜退非今日踈慵自昔年平君心上地全我性中天文史  
閑來讀形神困即眠夢中歸故里瑤草碧和烟

偶作

碧草含秋意黃雲起暮容歸鴉昏且噪去鴈遠無踪杯酒  
因猶醉明人邂逅逢身名猶碌碌正望日踈慵

隣野

故宫成市井卜宅地非偏門掩依茅棟身閒樂性天苔花  
侵砌工藜葉蔭窻前有子營家事何須二頃田

阻隆曲寨

十月雷驚蟄黃雲接地陰冰銜丹水細山擁武關深濡沫

思靈沼傷弓失勁林通途施陷穽之子獨何心

麻刺史復職

長風起天末卷忽捲浮雲冰雪春自釋芝蘭久彌薰庶願  
時再用鄒湛世無聞一掬峴山淚樽前分別君

荆楚

荆楚三年客風塵七尺軀青蠅點白壁赤水得玄珠息謗  
能無辨酬息正勉圖憂勤生逸樂魚稻老江湖

唵城

唵城看月色望極若微陰光射星辰暗氣迷閭巷深入和  
為善守蟻附覺難侵我亦耽詩者園中不廢吟

送王飛伯

吟詩何所得白髮早生頭始覺虛名悞應為達士羞梁園



遇飛仙俊氣挾清秋嵩洛引歸思司余故少留

送麻信之

愛客出天性君來心事違窮愁詩興淡風雨杏花稀相對  
忘饑渴高談訂是非穰成二月尾吾亦欲東歸

贈彈琴呂道士

蝸舍侵闔闔興居厭市聲靈官有琴隱一室若冰清境靜  
三尺伏調孤一鳳鳴從今教來往毋送亦毋迎

樂道

白首來何暮青衫寵若鶩浮榮能幾日高節冠生平良吏  
不虛美真儒集大成讀書多樂事六十眼猶明

吾道

衆好當違俗孤清且自成食苗維皎皎止棘信營營莫為

虛名誤宜司微罪行何思復何慮吾道付神明

予彥深

何物如金惜醫來欲致功難遮前路黑驚見缺壺紅北渚  
遺居室東郊寓殯宮勞心成庶事五十六年中

弔解飛卿

一旦傳君逝聞之久愴然孤免幾滅性孀姊已華顛與客  
謁茶去客謂安陸點酥嘗自煎如何從此別誰識是終天

夏雨

坐對雲峰起已欣風腋清螟蝗猶未殄天地豈無情轟礮  
雷音轉蜿蜒電影明滂沱洗繁暑裁言不能成

擊柝

擊柝者君子夜天星正繁絳紗明燕寢黃耳警豪門雀鼠



耗倉粟豺狼踰塞垣容憲求睡穩嗟爾漫喧喧

一鈔本

月下聞笛

三弄傳遺譜誰家清夜吹香飄丹桂子聲裂翠筠枝嗚咽  
星河動悠揚風露悲侵晨拂明鏡綠鬢恐生絲

潁州西湖

曲岸匳明鏡微風皺碧羅誰將比西子我獨憶東坡亭古  
落塗墜露涼荒芰荷放生仁鏡在魚鼈賴息波

鴈

肅肅南飛雁微生也解謀草黃沙磧遠水闊洞庭秋霄漢  
人何慕關山客自愁夕陽堪入畫零亂下汀洲

澄心齋詩

退食公園後焚香即燕居鏡明含萬象水淨見羣魚幕府

當荆楚官曹塞簿書靈臺塵不到作計未為疎

題子產廟

相鄭稱遺愛云亡感聖人養民殊夏日出涕比祥麟故國  
多爲不虛堂若有神褰裳病徒涉歲暮客愁新

劉節副內鄉新居

去職未云久幽人時到門劇談臻性理隨意具盤飧鑿井  
城隅宅買牛江上村聖朝深眷遇安得守田園

夢庵

吾子元居室經營頗用心移花紅滿檻種竹翠成林爰畫  
分三品收書費一金十年方有此安可夢中尋

寓濟源

幾年無定止生理與誰謀欲結黃茅屋如營白玉樓詠歸



沂水暮招隱桂叢幽鄉里稱為善懷我馬少遊

風霾

墻下開蔬圃盤飧得助多春畦不甲坼冷氣奪陽和青失  
南山色白生北渚波暮年能委順彼亦奈無何

言高士美

士美名巖嘗宰藍田承左司局赴京中路為高帥之所因辱時洛南方被兵

王室方求士轅門亦選材  
勳逢彼怒偵伺望塵迴士命  
輕如紙詩名冷若灰君歸無所贈長折浙江梅

病樹吟

病樹仆河濱長吟喻此身  
摧殘已幾日濕朽不堪新  
兩府風烟接十年往復頻  
故人憐我老相見益相親

過濟南宿洪濟院贈海州果上人  
回寄鄉中親友

滄海居何遠慈雲出未還  
將遷僧寶塔改葬空老就禮佛頭山

邂逅逾三宿魚緣見一斑  
預聞親舊在喜色破哀顏

重到靈巖寺

七歲嘗來此於今五十年  
當時隨杖屨名利在林泉  
已廢嗟何及猶存亦偶然  
先塋耕墾後濃露濕荒烟

故人

疾風巢再毀烏鵲却飛迴  
嗟我豈殊此故人安在哉  
重遭難食厄遠冒畏途來  
莫問交疎密交疎亦可哀

哭劉叔京

甲庚俱舊識類聚不同方  
過客傳皆死知君今獨亡  
無兒為繼世有弟託遺孀  
吾道微如縷傷時復自傷

哭王子正

匹婦主中饋雖貧生理存  
一編歲麗則隻影卧黃昏  
漫下



陳蕃榻虛霑文舉樽北平家絕世銜恨入荒原

鈔本

宿普照寺詩

被酒暑增劇漱茶神少清旅人須授館侍者詎忘情方箋  
鋪霜滑虛擣界月明晨興求紙筆枕上有詩成

次韻孟駕之清明會飲城西桃花下

出郭到花塢何勞人遠尋已降詩筆健更怯酒杯深名士  
仍知己清談可淨心新篇誰協律別後欲長吟

濟瀆廟

焔焔謝仙火北風吹欲然重源靈跡在喬木性天全殿宇  
瞻遺構碑詞閱舊鐫後來知有年鳳鳥至何年

慈湖客夜

涼意江城早秋聲客夜多露凋佳樹木月照舊山河爭戰

何時定功名兩鬢晴湖邊營壘近隔水聽笙歌

醴泉寺詩

賢相讀書處黌堂更不開嘗聞先子說直到暮年來失路  
穿谿澗褰裳出草萊山形蒼玉珎古殿倚崔嵬  
老栢參天色流泉直殿迴樹從何代有水自上方來破日  
期留宿殘僧病可哀索然高興盡欲去尚徘徊

七言律詩

留別高君玉

羨君中歲早知還擇勝棲身意自閑二頃良田十畝竹一  
溪流水四圍山客中把酒聊乘興愁裡題詩亦強顏明日  
東風吹破袂仙居回首白雲間

投黃司李

存素堂



永脫來時舊衽衣  
語言面目復何施  
無心求僭士人服  
糊口可為童子師  
過世有緣蒙顧過  
窮途乏力仗扶持  
漢江十月蕭蕭雨  
一夕顛毛半作絲

六月十四日濟瀆事即事

霖雨方能救旱田  
廉纖不稱立秋前  
南風颯颯披蒼竹  
四海浮浮起白烟  
雲漢數章因盡廢  
神虛諸說定虛傳  
鉗罟一勺清泉水  
慙愧他家望有年

記所見

歷下高亭久已灰  
尚堪登覽有荒臺  
艷歌相勸十分飲  
優戲能供一笑咍  
北渚蓮舟迴棹速  
華山烟雨過城來  
翠鈿紅粉愁霑濕  
俄頃斜陽射酒杯

別楊信卿

邂逅株林酒一杯  
亦梁同見菊花開  
浪遊我逐何人至  
應舉君隨計來吏  
漆店夢迴風瑟縮  
鐵樓歌月徘徊又還  
客裏成離別後夜  
思心半握灰

客夜

晦月未生星滿天  
夜涼就枕露簷邊  
漏聲迢遞蟲聲外  
愁思纏綿睡思前  
羹釜慮適丘嫂厭  
綈袍尚有故人憐  
丈夫此事常慵說  
強託新詩句裏傳

贈刁益之

當年投筆去儒宮  
雲翼搏霄負精風  
魏闕殊恩縻好爵  
冀方締績攝元戎  
侯藩戶部悲歌外  
宰樹家山醉眼中  
應接尚無衰憊氣  
不應便作嘯嘯翁

陝州贈揚正卿



毫社相逢歲已深，別來名氏映儒林。  
揚雄既奏河賦，東子賤嘗鳴單父琴。  
洪水豈知人墊溺，南山不與物幽沉。  
東風重會棠陰下，白髮滿頭塵滿襟。

武當山張真人

張公被髮下山來，欲為神明掃火災。  
感召上天垂雨露，指揮平地起風雷。  
槁苗再發還堪刈，枯木重榮不假栽。  
受詔即思歸舊隱，瓊樓玉殿繞崔嵬。

寄武當山張真人

山走西南氣勢尊，大神遺跡至今存。  
冰橫澗下千年凍，雲起巖前萬里昏。  
既有威嚴彰赫赫，詎無厚福護元元。  
真人削行通天地，日月飛出降殿門。

送薛玄卿歸龍虎山

金門詔下羽人歸，欲向山中採蕨薇。  
琥珀懸崖松樹老，琅玕倚澗竹根稀。  
高岩畜雨星辰濕，古石懸雲逕路微。  
養性可無軒冕累，遊塵元不浣仙衣。

送吳真人

具巖威名有祠官，歷祀山名不厭難。  
上帝乘龍遊下土，真人騎鶴降虛壇。  
已刊白玉為封檢，更鑄黃金作祭冠。  
國壽延洪千萬歲，願祈救熟小民安。

贈王數學

誰將陽一對陰二，天地亦無如數何。  
自有生民君子少，歷觀往古亂時多。  
希夷愁極乘騾笑，康節懷深擊壤歌。  
窮變變通吾未究，君家易總尚存麼。

王遠知事

贈劉潤甫用新秋遣懷詩韻



三多錄鍊到精純傑句雄篇若有神琴枕贊成傳後學  
盃賦就繼前人賦警句云似華瀛洲渺渺嘗迷路頭髮蕭  
蕭不滿中倦對青衿把雞肋杖藜思卓故鄉塵

秋懷

幾年遷逝困徒行強倚西風覷菊英夢幻軒裳非定相  
簸揚箕斗但虛名倦談圯上逢黃石欲向山中覓赤城  
四海無人託劍蒼蒼天白日照忠誠

贈朱彥暉

嘗讀香山醉吟傳一觴一咏最關身生平用此忘憂患  
老去安於處賤貧自作白丁辭酒伴揭來青社得詩人  
與君况復生同代尚友千年似隔晨  
送句曲外史張君歸華陽

送君高舉入華陽古洞陰蟠石路荒蔽日旌幢朝旒旒  
飛空瓊珮夜琅琅餐霞已試登仙訣祝竈還修却老方  
見說陶公雖隱去猶將道德佐齊梁

贈楊飛卿

三百周詩出聖門文為枝葉性為根不憂師說無匡鼎  
但喜吾宗有巨源我自般溪移歷下君從汝海到東原  
東原歷下風烟接來往時時得細論

贈盧希甫

般陽兵後步之青古驛荒寒粥夜烹四舍分程曾借宿  
一杯數種不知名諸野草字二千里外新歸客三十年前舊友生  
賓館莫嫌來往數中途霜露已無情

青社別友



灤源清駛鉅城流一撲蕭然上客舟瀕海地朔風送雨幻  
身家遠病逢秋久知此事常難遂無挾投書亦漫求別後  
目閑若相憶中山西北是齊州

施淮馬與鑑上人

嗟嗟牝馬老而瀛况復雙瞳障腦脂相下得之來汶上署  
天忽爾寒到時貧家芻秣應難繼末路庖厨不忍為若踏  
金田宜帑力廢成果脫毛皮

贈元伯

相然清夢逸芳蘭逆旅天教識鳳鸞一榻既回徐孺設綠  
琴來對子期彈下喉久厭江瑤柱入手欣逢銅彈丸既悟  
詩人最佳處肯誇滄溟卷狂瀾

贈李慶之

聞道懷人謝罷榮南風吹我巖入高樹迷村落千重綠山  
切雲霄五朵青徒步歸程無定日相逢屈指周星去年  
十月商於路欲說愁君不忍聽

贈馬君美

波揚溟渤駭長鯨何處熙熙物自春山下有田皆種德天  
涯遊子欲親仁雲烟荏苒風塵遠林壑幽深虎豹馴數冊  
閒書一茅屋此中便可作閒身



小亭集

春陰

元

楊宏道

撰

夢迴鷄唱已多時怪底書窓曉色遲黃道六龍若有耀青  
郊三峴淡無姿葢連芳萼粘金粉葉著柔枝安翠眉問柳  
尋花乘逸興却愁歸路雨絲絲

隨分林泉

綠淨青蔥戶牖邊問誰於此卜終焉江雲陰薄晨炊熟野  
燒光寒夜獨然詞賦麈淫誇陸海傳奇虛誕記壺天徵君  
知足心常足踐履南華齊物篇

直祿原上一醫者  
忘其姓名

壬辰閏九月即事

西山逃難日如年草動風聲止又遷惴惴側行崖際石回



回屢涉谷中泉縱橫蔓刺膚流血憔悴妻孥命在天疲極  
和衣相枕藉夜寒輾轉不成眠

竹庭

點點莓苔一徑深書窓但覺更蕭森涼颼暗墮霏微雪晴  
影勻篩瑣碎金解籜拂雲咸有節披風鳴雨總無心主人  
爰惜勤封殖今日那知失故林

贈鄧帥

順陽江上早梅開一夕風吹斗柄回漢日舒長鈴閣靜楚  
天空闊野鷹來竒才既已蒙三顧霸客何須賦七哀好結  
茅齋為小隱無心求比少城隈

題舞陽侯廟

薦誠何處仰威稜遺像乾維柯影清短砌南薰披草色空  
庭西照碎禽聲攀鱗雖遣風雲會得鹿嘗寒帶礪盟曲逆  
未迴聞顧命將軍方免學韓彭

定庵

社燕賓鴻秋復春窺身南國避兵塵露涼汴水蘋花老風  
暖蘄陽柳葉新遷徙靡常嗟我病吉安無計與君隣親朋  
凋喪家鄉遠羞見定庵庵裏人

贈仲經

端平二年清明夜出襄陽攝唐州司戶是歲十二月  
上旬北遷寓家齊源吾友所寄書隔年方達屠維大  
淵獻五月相遇於齊河復有雙布之贈長句四韻少  
酬佳貺云

南北應無再見期雲翻雨覆事難知大堤歸客來何遠盤



谷幽居信到遲當暑織絺將厚意連朝情話慰相思多君  
已享江湖樂不忘馮陵處陸時馮陵留別詩有馮沫能微  
濕生涯善自謀之句故云

寓居書懷

疎栽枯棘作籬藩隣舍相望不設門去燕來鴻為客憤佩  
蘭懷玉與誰論河名無定亦歸海草曰寄生猶有根但得  
生涯能地著何嫌谷山教家村

送鄭飛卿

晉亡氏族入遼東吾祖君家事略同曲阜臨淄非故國烏  
丸白靄有風華百年勝負興亡裏幾處悲歡離合中別後  
相逢無定在太行山色翠連空

先疇

二紀流離不自由得歸中路復淹留今年再踏東秦地昔

日嘗居南雍州夢裏青衫霑雨露尅來華髮望松楸先疇  
亂後隨為主何處躬耕待有秋

修武春日

春事年年墮渺茫今年蜂蝶亦深藏已從漫與寬詩律更  
覓無何入睡鄉病麥可能風底綠枯雲徒向日邊黃北郊  
秀色堪凝眺塵岔連朝失太行

九日邠州公宴席上奉呈趙節使張相公趙節使子  
文諱伯成

張相公信夫名行信以參知  
政事出為邠州節度使致仕

尚父城東涇水南秋香飄動府潭潭羈懷却喜逢重九此  
席應難得再三縫掖縵胡賓畢集台星列宿影相參罰觥  
滿酌申嚴令要把黃花入鬢簪

臨安楊文秀見惠栢油烟墨而號玉泉者以詩謝之



鸞鳳宿時香葉蕃却因有用斲蟠根蒸蒸膏潤資然燭馥  
馥烟清在覆盆玕剖秘傳江左法若人疑是華陰孫從來  
吾族多高義故遣陳玄款華門

弔元老

康姓顯於山西妻父諱震字震亨幼孤當以廢得  
官過時不就性嗜酒善畫山水交遊當世士大夫  
咸得其歡心寓居涇之屬邑利津泰和丙寅客死  
東光歸其骨藁葬濟水之濱一子元老始六歲惇  
惇無所歸從余來淄川貞祐元年十月望日以羸  
疾卒傷其父無後哀其子天死作詩以弔之

風調水清有典刑傷哉白首見飄零魂隨寒骨來千里  
系遺孤始六齡宿草荒蕪應滿地柔蘭凋落忽空庭旅人

若訪中郎後識語淒涼詠曙星

苦雨示楊仲名

草屋堦平水到門終風苦雨錯朝昏採薪已斷山前路棲  
畝空懷野外村范釜正憂無物爨杜囊何用一錢存豐年  
復有在陳厄風伯雨師真少恩

汴京元夕

一朝別鵲動聲聲伉儷三年曉夢驚當日想君應被害此  
時憐我不忘情杜鵑啼血花空老精衛償冤海未平追憶  
月明合盞夕何堪燈火照春城

冬雨

北風常颺六花飛烟靄溟濛失所宜爐火宵殘聞佩響簾  
氈晨揭晨絲垂正當江上梅開日還似枝頭子熟時七十



衰翁嗟未見考祥何處有人知

題暮雲樓閣圖

深山何用起樓居雲表參差象兩都西晉衣冠崇老氏後  
秦風俗事浮屠人情有感形歌詠匠手無心作畫圖闕里  
蕭條灰燼冷淡烟殘日下平蕪

同袁副使遊西城

秋蔡徐步小溪傍屬玉雙飛水滿塘喬木蒼烟餘故國敗  
衰柳更更殘陽惜無濁酒供秋興誰借扁舟趁晚涼再約  
小亭終一到與君連日倒壺觴  
滄浪之水舞雩風四海何人識此翁聖坐久拚拋世事暫  
來渾欲挽詩窮青山與我真知己白髮臨流少化工今日  
從容天地裏一杯春露笑談中

劉倉副家讀其祖廢齊文集

西職閑曹二十春掛冠歸守冢前麟試評八載齊皇帝何  
似終身宋大臣白霄哀章俄在殯鵲山珠玉不成塵百事  
事往陳編在愛惜留傳屬後人

蘭

葉披花結弱如推澤國忙忙正可哀秀色亦知歸苴菑穰  
芳未必勝玫瑰使君浩蕩乘高興小畹殷懃欲自栽畹三  
也藝蘭覽秀亭下著意幽香無覓處暗中不覺襲人來畹  
故變文田小畹

天際識歸舟圖

平涼行省左右  
司蕭機壁畫

天邊高岸一亭幽江上輕烟疊嶂愁風好可憑乾鵲噪潮  
平遙映白鷗浮公堂敲斤三庚暑意匠經營萬頃秋神迹  
境移應有夢盈盈仙子抱篋篋



馬都幹梅花

江上淒風糝玉塵江梅干本隔城闈不堪幽夢迷前路分  
惠清香賴故人夜挑燈看疎影天寒溫水借陽春他時有  
酒須同賞花底休分主與賓

除日立春

送寒開歲隔晨昏時節相催繡轂翻鳳歷下籌推數始麟  
經援筆記正元陰陽闔闢無非道學術參差有異門吾老  
但知隨所遇併收和氣到芳樽

從鄧帥遊百花洲

絳旆恐驚鷗鷺飛綠楊陰外駐駟騑平輿穩勝雙鸞背極  
目新張萬錦機碁局分曹消永晝酒樽遲月蘸清漪奉陪  
宴賞成新詠佳興無因到鳳譏

酬劉京叔祁

瘦鶴巢西彩鳳東差池雲路有時同偷然放意蒼塵外久  
矣識君文字中洧水絮飛傾蓋梁冰釋贈詩工情知不得  
隣丹穴又整霜毛向曉風

四皓廟

絲莖儀成上下和玉觴為壽醉顏醜寵姬愛子惑方甚賢  
傳謀臣無奈何商嶺白雲封舊隱漢宮鴻鵠動悲歌高墳  
兩兩臨遺廟灌木陰森冒蔓蘿

意行

黃葛衣輕信意行荒烟殘照淡汀金沙灘面印碁跡瑤  
草結梢擊鷺翎終日溪山常闕寂無風蘭芷自芳馨騷人  
佩服幽人宅千古仍存舊典刑



同李吉甫載酒泛順陽江

沃土居人號素侯青林十月似初秋山明朝日常東抱江  
到南陸亦懶流細草平沙閑立馬輕舟短棹不驚鷗將軍  
愛客須沉醉醉裏題詩記勝遊

圓融庵

余不解佛法圓融庵主求說偈言勉強應之如造  
像生花但得傍人言髣髴其真可也聊以此說自

恕云耳

月雖死魄朔初逢冰正堅凝臘未終結就茅茨為佛事削  
成基址自神工生明冉：光凝望解凍深：綠浸空客至  
不妨閑打坐入牕面：響宗風

故里詩

故里蒿萊野鹿呼翛然幽鳥下庭除困鬱何恤澤無水妬  
遇可傷包有魚歷下金蘭唯仲叔門前雲錦萬芙蓉不知  
術：時相會曾念荒城久索居

赴千乘記舟中所見

西郭溪流放畫船北城門梵出清連長山翠壁排空立高  
苑滄波與海連霜渚透光指鏡翳風蒲沉影裊爐烟羈懷  
本自多悲感滿意詩成復粲然

次韻元伯雪

聚星堂畔霏：雪高會賓僚宴郡城若引昔賢為故事可  
能白戰出奇兵寒枝欲宿鳥還去曉遲迷蹤人未行收拾  
殘膏和君句庶幾相慰苦吟情

上楊尚書

戶部名  
字叔玉  
懋



科試榮身道甚夷，做車羸馬若為馳。聖俞仕宦由門廕，德裕譏評敢自欺。惡醉已能真止酒，固窮初不生耽詩。謀生但有依農事，二頃良田未可期。

遣興

誰連誰窮誰後先，揚子戒之失之偏。白雲出岫本無意，彩雉照溪私自憐。莫擬指因思魯肅，何須伏弩殺龐涓。西山深穩有佳處，細斲黃精煮澗泉。

雪滋壠麥雨滋桑，五月薰風九月霜。山擁潼關遮陝右，地傾河水浸睢陽。英雄封建分諸國，主客安和渾五方。莫道書生用無處，也能歌雅美宣王。

柏葉玲瓏色益奇，雪中曾賞歲寒姿。玉壺沉水動詩興，庾嶺梅花勞夢思。得折柬當眼底，欣傳玩副心期。朝昏

又厭尋常見，却憶瀟湘斑竹枝。

哀子

髻鬢哀哀，失所天衣衾草。殞荒烟西南流，寓三千里東北。攀號二十年，負土起墳常在念。刻銘納壙未能遷，此生已矣知無奈。唯願華顛孝道全。

連內鄉見縣令裕之

馬蹄踏破洛南川，回首山城一片烟。入夜前途如抹漆，有時峻嶺若登天。困眠肅肅，飛霜底飢傍冷。流水邊行盡塞垣三百里，眼明初見玉堂仙。

中都二首

龍盤虎踞古幽州，甲子推移僅兩周。佛寺尚為天下最，皇居嘗記夢中遊。清明穀雨香山道，脆管繁弦平樂樓。莫對



遺民談往事，怨渠流淚不能收。  
繁華消歇湛思留，忍見珠宮作土丘。  
海日西沉燕市晚，寒鴻南度薊門秋。  
恭光父子三綱絕，安史君臣百代讎。  
善惡相形褒貶在，世宗更比孝文優。

日落

日落蒼然烟滿城，聚觀如堵沸如羹。  
長春火樹銀花合，不夜瓊樓璧月明。  
未及轉頭飛電過，方將掩耳迅雷驚。  
青衿記得曾看此，此日中州正太平。

蒼波吟

蒼波萬頃溉良田，誰決枝渠注別川。  
臨事縱能知有命，逢秋未免歎無年。  
隄防力復何勞止，稼穡功成若自然。  
欲受餘夫五十畝，寸心慙在老農前。

漢陂

空翠堂中望陂水，岸回山列若無窮。  
鏡銅新拭寶奩坼，機絲未張雲錦空。  
一飯常懷源少府，勞生更甚杜陵翁。  
鳥飛魚泳方自得，慙愧此身如轉蓬。

宣聖廟桃李盛開約鄉中親舊同飲花下

春來桃李便承恩，况復儒宮穩託根。  
喪亂不堪憂故國，英雄猶覺在吾門。  
奈何日月馳雙轂，思與親朋罄一樽。  
共趁東風花下飲，此間雖小勝名園。

將歸阻雨用木庵送行詩韻

麥苗春晚尚如絲，甘澤嘗嗟應候遲。  
六事桑林懷聖德，一篇雲漢賦周詩。  
驕陽入夏為霖雨，遠客通宵役夢思。  
賴有湯休詩句好，披吟正是憶家時。



若人二首

襟懷顏面不相謀，作偽心勞示德休。  
堂上已棲巢幕燕，階前猶繫蹊田牛。  
常居經史為奇貨，欲陷衣冠入濁流。  
暗室伏机微笑出，定知人有破家憂。

勢利場中論結交，煦愉便辟偽如毛。  
乃知貧是試金石，更覺剛欺切玉刀。  
害物陰謀深可畏，附炎諂笑一何勞。  
布衣脫粟資高卧，洗眼殘年看爾曹。

寒食

去年寒食已無家，陌上風塵卷落花。  
今歲清明還是客，城隅烟雨暗殘葩。  
年來年去催衰白，花落花開足嘆嗟。  
風雨閉門無所適，心田方寸亂如麻。

五言長律

自述

為氏因封邑，名家出華陰。  
行藏由治亂，用舍自浮沉。  
五代生民極，末年流毒深。  
華夷兩宰宰，宇宙一刀砧。  
泯滅青牛跡，寂寥白鶴音。  
日升消薄霧，雲斂出高岑。  
開國榮持節，歸田足賜金。  
名駒追老驥，稚桔秀長林。  
鼓角催朝暮，星霜換古今。  
却辭石熊麓，來卜籠溪浚。  
溫飽童耆樂，馨香祖禰歆。  
一朝人事變，萬里塞塵侵。  
火燎傾巢燕，弓驚鍛羽禽。  
半携陳國鏡，百感少原箴。  
擬賦蕪城賦，長吟梁甫吟。  
蕭條君子澤，恒久士人心。  
誰把焦桐木，收為綠綺琴。  
坐中驚倒屣，樓上快開襟。  
才藝如毫髮，忠誠或倍尋。  
相知誓相報，歲月莫駸駸。

贈鄧帥



藝苑昭詞彩經筵味道醇縱橫隨緩頰踴躍執蒙輪博學  
通幽隱奇才邁等倫故當稱俊偉未足靜風塵何術興王  
室中原有世臣雲龍邁嘉會花葉茂長春上下承恩遠東  
西出將頻英聲蜚漢楚威德洽周秦嚴警驅貔虎雅歌集  
鳳麟靈襟澄瀚海汎愛到窮鱗賤子能安命虛名詎起身  
商山深欲隱宛馬到何神恍惚三生夢朝昏九死鄰帥師  
迴烈焰習坎得通津花氣薰蘭閣麻衣拂繡茵晨炊優歲  
計春服起時新遷逝同王粲賢良愧却說散才那致此遇  
物見行仁報德知無地修身益自珍抱孫聞有喜麟趾頌  
振

赴平涼留別趙晉卿

塵世無家客山城落帽風朱門森畫戟綺席拜仙翁宴樂

容疎放提攜失困窮層樓寒色白畫閣夜光紅迎日花枝  
活朝天馬首東壁圭班四岳元凱翊重瞳忍淚辭公子凝  
眸送塞鴻仲宣詞賦在子美草堂空日月孤飛鳥乾坤一  
轉蓬他時若相憶回首望崆峒

別鳳翔治中文文仲

制權酒而征商吏部差監務二員曰監曰同常以  
五月中官給本造周歲所用之麴九月一日新舊  
相代監務相呼我代者為上交代我者為下交余  
自京兆從劉監察先甫到鳳翔而府帥郭公仲元  
囑文仲請余教其子姪於府學麥既熟上交不至  
辭赴麟遊造麴八月上交至而罷監務造麴已竟  
雖上交至例不當罷蓋彼貨吏而罷余也將往卯



州以詩告別

細柳青絲裛孤雲白練輕枝隨金縷斷影起繡衣行日麗  
南山樹烟迷北斗城精瑩太白色鳴噎橐泉聲邃館薰風  
細長繁絳蠟明庭廣趨府史虛席讓書生疇昔文為業因  
緣筆代耕識途隨老馬調舌轉雛鶯小邑那堪處微官有  
底榮低頭拾瓦礫放手棄瑤瓊肺渴煩蒸煖心疲劇繞縈  
虎頭非我相鷄肋有人爭甌墮何勞顧途窮輒愴情一身  
常坎軻半載廢經營積雨乾坤濕高風物象清紆麻難卒  
歲山水杳歸程朔漠衝風黑崑崙殺氣橫啟明編皂隸斜  
照列公卿懷德因施惠酬恩亦竭誠他時驄馬過終始服  
高名

小亨集

元 楊宏道 撰

寓意

白道穿雲去青郊占地耕塹深七棘刺得得斷人行  
花有凌霄者誰當瘠土栽可憐無附附寂寞草間開

南澗

鬱鬱薤高樹茫茫見碧岑風聲成萬籟雲影落輕陰

仲冬

迎水地卑濕仲冬連夜風茅堂何以處春在小爐紅

題張仲謙畫卷

疊嶂寒林杪招提滿暮烟漁歸反顧飛雁背江舡

同張介夫楊信卿賦龍德宮詩



步入西園裏秋風草木長牛羊識牢檻廢殿榜凝香  
闐然草虫圖

遂性方為樂逢我未必愚人何異此一幅草虫圖

遺興

暮齒無筋力嗷嗷哺衆雛緬懷黃甫冉嘗勸陸潛夫

次韻陳又新真人北上

驛驛翩翩祗整歸壽觴捧罷戀慈幃秋風萬里關河道回  
首那堪朔雁飛

贈希白

青柯平上弄雲烟盧氏山中又幾年道學愈精身愈困布  
衣憔悴漢江邊

贈免官安置者

萬騎貔貅闕塞晚兩班鷓鴣踏禁闈覺來飽食黃梁飯却看  
邯鄲夢裏人

遺興

正愁玄鳥巢軍幕又見白魚逐釣絲座側有人顰蹙去更  
煩熟讀董京詩

慈湖客夜

江頭明月照人孤腸斷風繞樹烏夜夜春潮隨月上不將  
客信到慈湖

孟浩然像

先生詩價通江湖乘興西遊到玉除解道氣夢澤澤却言  
多病故人疎

偶題



藏名匿迹黃塵中日抱書案心冥濛塘頭花變兩三色又  
是一年看春風

鈔本

巨木埋根數百年蔚然蒼翠上參天不歸宮闕充梁棟也  
作龍舟濟大川

海上雲來徧地陰波間漏日瀉黃金水車倦踏傷淫潦無  
奈連天雨正深

讀士林

休教行已媿屠沽為學當為君子儒俱是傍人門戶立艾  
且莫莫笑桃符

漫題

都門幾度見秋風楓柘連山樹樹紅海此時回首望黃門  
滿地酒尊空

鄭圻

鄭圻西峻周東傾丘陵破碎山橫縱橫千山萬山過幽谷却  
放秦川如掌平

贈衛處士

甘石書存惜不知老來更與世相違夜涼天雨清如水嘗  
欲因君識少微

宿浚儀公湖亭

夜宿湖亭水氣涼四更風露濕衣裳空濛霧重前山暗屋  
角斜明是月光

兩兩三三白鳥飛背人斜去落漁磯雨餘不遣濃雲散猶  
向前山擁翠微

幾年鄉夢隔江湖此日登臨興不孤小艇欲行無遠近不



愁歸醉要人扶  
能文亦有張公子往歲俄加道士衣載酒白雲山下路擬  
將毫翰與同揮

出京

女弟數行傷別淚翰林兩首送行詩辛勤徒步關西去回  
首觚稜日出時

飛鳳曲

丹穴嘗鳳有鳳凰粲然五色備文章暫時得見却飛去悵  
望碧霄空斷腸

題桃花島圖

記曾海上浴湯泉遙望神仙幾點烟却對畫圖疑是夢推  
移寒暑十三年

楓落吳江吟

詩會中題  
因戲效之

澤國霜餘氣象清蕭蕭丹葉動秋聲綸鈎收畫絲千尺應  
有空舡載月明

旅懷

道途風日令人老巖壑雲霞笑我忙誰解清泉煮白石願  
尋高隱問靈方

宿流泉院

凌山晚發暮流泉東院巖隈有爨烟供佛雙池荷葉小乃

知茲地不宜蓮流泉院二相距三百餘步土人謂之東池

定三年名額刻石龕於殿之  
西壁凌山院在東院東北

倦繡圖

五絨未竟小花枝歌對無言若有思風暖日長人自困也



應如我撥書時

興平道院

坳堂翠積草生平時有中庭鳥雀行日影滿堦全不定好  
風輕泛樹頭聲

次韻裕之元夕山村見寄

山人不見住山村敗履常穿畫門門歌舞滿堂非我事枉  
教紅燭照眇昏

登舞陽市樓

解襟舉酒見南山山際風來五月寒渾似吾鄉三伏日望  
都樓上倚欄干

迎祥觀即事二首

牽牛延蔓覆蒼蒼青涼氣著人如酒醒天外晚風收積雨石

爐澄水白泠泠

紙錢灰冷女巫歸庭樹陰斜覺日移二尺短碑堪與語石  
香爐下獨搢頤

寒江獨釣圖

颯颯霜風亂鬢毛沄沄溪水照緋袍百年不惜身空老懶  
向滄溟掣巨鰲

舟行二首

羞澁行囊任客舟初期十日到齊州歸心晝夜如流水灘  
淺風狂不自由  
盡室東隨賈客船天教歸老舊園田三河千里無青草歲  
在虛危定有年

舟中遇雨



斜風掠盡一重烟雲雨溟濛水接天懊惱葛衣渾濕却船頭還聳作詩肩

奇石

年將四十尚無聞自覺趨蹌不入群閒向水灘尋細石旋指沙土看奇紋

彥深家榴花

小院深沉晝掩扉薰風注意海榴枝新詩題罷空歸去不見纍纍着子時

凍帛圖

內樣金縷金縷紋營營何事女工勤料應純被周南化不識閑愁作夢雲

來復生

正大三年丙戌九月九日生於平涼府

竹萌遺籜化為蘆常恐青林歲晚疎今日又看新笋出節膚膚色願相如

七月十七日夜步息盍簪坊歸二更矣

白紵衫輕兩袂風市橋涼露滴梧桐朱門不鎖清秋月棄與閑坊靜曲中

調李長源

何時一斗鳳鳴酒滿酌與君洗不平男兒年少鬢如漆日落胭脂坡上行

謝茂先家藏王禧伯疎林沐雨圖

伸臂纔能引卷窺修篁如截葉低垂行雲不散山堂暮常記鈎窓卧看時

東風



陰消陽長否還通消長循環默化中天且不言春自好群  
芳總已屬東風

再至鳳翔普照寺

清秋風露晚淒淒、氣徹天高日易西誰把玉簪收拾去綠  
傍猶傍曲欄低

壬辰年門帖子

不求高爵列王臣不願金珠坐繞身但願全家度災厄白  
頭重作太平人

甲午年門帖子

儒館庇身慙廢學官倉供米竟無功授田儻復先王制從  
此歸耕畝畝中

戊戌年門帖子

曾由直道踏亨衢豈謂終身出險途從此知非亦知命鏡  
中休鑷白髭鬚

己亥年門帖子

寒泉遠汲憐兒小白粲親春愧婦勤餽食從今低舉案莫  
教人識五噫君

辛丑年門帖子

生長般溪溪上舟一朝滄海忽橫流黍離麥秀悲歌裏華  
髮歸來萬事休

癸卯年門帖子

兒子形軀似我長新年祝爾願康強但能碌碌全門戶莫  
羨人家畫錦堂

甲辰年門帖子



歲在龍蛇何足慮庭疎蘭玉最堪傷故將西漢緹縈事說  
與君家老孟光家世男少女多餘暮  
年止一男復有五女

乙巳年年門帖子

蒲城來往愧年除頰尾柔毛從酒壺唯有曹君不相棄故

穿深巷送屠蘇曹字  
善良

丙午年年門帖子

素平貞士老還鄉覓食求衣借屋忙三事就中先有一立

錐地上蓋茅堂

丁未年年門帖子

數歲常懷未濟憂欲遷東府與西州厨邊井汲泉甘冷大

半因循為爾留

戊申年年門帖子

南坊妬寵如宮妾北里爭妍若娼娼唯有西隣安義命東  
風也自到茅堂

己酉年年門帖子

己酉再逢鬢未皤平生艱險能經過全家無恙自天祐媚  
疾之人如命何







律